

Roma norĩ

Roma norĩ ma, Paru te te ĩrob'ui'érézê

Ĩbaihâ wasu'uzé

Paru hã Corĩtu na 'ri nho'õmo nhisi âma sãmra ré, ma tô ã ĩbaihâ na hã âma rob'ui'éré. Ma tô sima rosa'rata, Roma u tisiré ĩsazei'wa norĩ hã te te sabu za'ra da, te te po're pu'u za'ra da, 'Re ĩhâimana u'âsi mono âma siptete sina 're nomro mono da. Morĩ õ ré hã, rob'ui'prazé hã te za a'â ti'â Zeruzarê u, ĩsazei'wa norĩ ma, Masédoniza hawi danhoprubzê hã. Paru hã ma tô wama waihu'u za'ra, 'Re ĩhâimana u'âsi mono, sa'êtê na wama 're ĩsõpru mono zéb zarina, ĩ'ra hã wazada dâ'â da, te te we ĩsõmrizém na hã. Paru hã ma tô duré wama waihu'u za'ra, âne: Zezusi hã da te dasina 're ĩ'umnhasi za'ra mono zéb zarina si, te za 'Re ĩhâimana u'âsi mono hã te te 're da'awêsãmri, dawasédê hã te te oto da'âma 're ĩ'ab'madâ'â mono õ zéb zarina. ĩsimiroti 'rata na Mozési te te âma ĩrob'ui'éré hã da te 're ĩ'madâ'â za'ra mono zéb zarina, te te 're da'awêsãmri mono õ di.

Paru te te ĩdazawizé wasu'u

1 ¹ Wa hã Paru, Cristu Zezusihi ma romhuri'wa, wa âma aima rob'ui'éré za'ra wa'wa, Roma na 'ri nho'õmo nhisi âma 're aihâimana za'ra wa'aba mono norĩ ma. 'Re ĩhâimana u'âsi mono hã ma tô ĩ'pisutu, ĩsadawa wasu'u na te tãma 're romhuri mono da, Zezusihi wasu'uwê hã te te wama 're ĩ'awaihu'u mono hã te dama 're wasu'u u'âsi mono da, ĩsadawa para.

² 'Re ĩhâimana u'âsi mono hã ma tô duréihã dama ropisutu siro, ĩwasu'uwê na hã. Duréihã ĩsadawa wasu'u 'rata 'wa norĩ hã, ma tô âne na âma rob'ui'éré sirõmo za'ra, ĩbaihâ na hã. ³ E 'wai wasu'uwê, ã hã. 'Re ĩhâimana u'âsi mono 'ra, Wanhib'apito Zezu Cristuhu wasu'uwê. Ta hã Zezusi hã ti'ai âma dahâiba na dasine 're ĩhâimana mono na, wama waihu'u pese za'ra di, apito Dawihi nhihudu 're morĩ wa. ⁴ Duré 'Re ĩhâimana u'âsi mono 'ra na, wama waihu'u pese za'ra di, dâ'â uptabi nherê, ĩmama hã tiwaihu'u pese na te te hâiwa'utu wa. Duré Timama hawi we ĩmorĩ na hã wama waihu'u pese za'ra di. Duré 're ĩmorĩ wê na zama, wama waihu'u pese za'ra di. ⁵ 'Re ĩhâimana u'âsi mono hã tinhoprubzéb zarina ma tô Cristuhu ma ĩhâiba na roti, te te ĩ'pisutu da, ĩ'pire na te dama 're sadawa wasu'u mono da. Cristuhu ma, te 're romhuri wê mono da, ma tô ĩ'pisutu, ĩnhimirohmurizéb zarina dapoto mono bâ, da te 're

sazei pese za'ra mono da, duré da te 're sazei pese za'ra mono wa, ĩsimiroti si, da te 're 'madâ'â pese za'ra mono da. ⁶ A norĩ wa'aba ma zama, te 're sadawa wasu'u mono da, ma tô ĩpisutu 'Re ĩhâimana u'âsi mono hã, wasiré Zezu Cristuhu nhib'a'uwẽ oto 're anomro aba mono da, te te 're ĩaipisutu za'ra wa'aba mono norĩ ma hã.

⁷ 'Re ĩhâimana u'âsi mono ma, asawi pese za'ra wa'aba di. Taha si ma tô aipisutu za'ra wa'wa, ĩsib'a'uwẽ si oto 're anomro aba mono da, tãma. Taha wa, wa âhãna aima âma rob'ui'ére za'ra wa'wa, Roma na 'ri nho'õmo nhisi âma 're aihâimana za'ra wa'aba mono norĩ ma.

Wamama ma, wa ai'âma 're ĩmreme u'âsi za'ra wa'wa, 'Re ĩhâimana u'âsi mono ma, duré Wanhib'apito Zezu Cristuhu ma zama, ĩsimizawizé hã ai'âma 're hâimana u'âsi za'ra wa'aba mono da, rowẽ u'âsi, âma 're anomro aba mono da.

Roma u, Paru hã datẽme ĩsisatõrizé wasu'u

⁸ Âhãna, wa za ĩnhib'apito âma uimrehẽne ĩwata, ĩmreme na, 'Re ĩhâimana u'âsi mono âma, Zezu Cristuhu nhimipawaptobzéb zarina 're sazei pese za'ra wa'aba mono wa, aiwasu'u za'ra wa'wa hã daro mono bâ da te 're wapari za'ra mono wa. ⁹⁻¹⁰ Wa hã 're ĩsiahãiba zawi mono âna, wa 'Re ĩhâimana u'âsi mono ma, te 're romhuri u'âsi, ĩ'ra wasu'uwẽ hã te dama 're ĩwasu'u mono zém na hã. Wa ai'âma 're ĩsipo're pu'u u'âsi za'ra wa'wa. Wa duré ai'âma 're ĩmreme u'âsi za'ra wa'wa, 'Re ĩhâimana u'âsi mono ma. Tô sena, wa âne na aima rowasu'u za'ra wa'wa, 'Re ĩhâimana u'âsi mono ma, âne hã tãma waihu'u pese uptabi wa. Taha wi si, wa nasi ĩsima rowaptẽre u'âsi âhãna hã, te te sima ĩwẽzéb uwaibaba te te ĩma âma uwaimrami da, âma atẽme ĩmorĩ za'ra wa'aba da. ¹¹ Te asabu su'u za'ra wa'aba da si, wa tô ĩsima rowẽ si'aba're, 'Re ĩhâimana u'âsi mono, Tipẽ'ezani na rowẽ te te dama 're ĩ'apisutu mono zém na, te âma aipawaptob za'ra wa'aba da, asiptete sina âma 're anomro aba mono da. ¹² Atẽme âma ĩwisi za'ra wa'aba wamhã, wa za aihĩni wasipawaptob za'ra ni, Zezusi wa te 're ĩsazei pese za'ra mono zém na, wanhiptete na âma 're wanomro mono da.

¹³ ĩsisãnawã norĩ, âne na aima ĩsiwasu'u za'ra wa'aba da, wa tô ĩsima wẽ, waihu'u za'ra wa'aba da. Wa tô te ĩsima 're rosa'rata u'âsi, te asabu za'ra wa'aba da. Tane nherẽ, atẽme âma ĩmorĩ su'u aba da nherẽ, te marĩ hã ĩma 're hâimana u'âsi, õne u'âsi. Zudezu'õ norĩ hã daro mono bâ 're ĩsi'ubumroi mono hã, ĩwasu'uwẽ hã te tãma 're ĩwasu'u za'ra mono zém na, te te 're saze za'ra mono wa, wa tô te 're awaibu, 'Re ĩhâimana u'âsi mono ma. Tane da, wa tô duré te ĩsima 're rowẽ, airo wa'aba âma asiré zudezu'õ norĩ hã te duré tãma 're awaibui mono da, tame. ¹⁴ E marĩ wa, wa tô ĩsima wẽ, âne na te aipawaptob za'ra wa'aba da. Wa hã uburé te 're da'apawapto mono

da, 'Re ìhâimana u'âsi mono te te ìpisudu. Taha wa, wa za tô te 're da'apawaptob u'âsi, 'ri nho'ômo mono bâ 're ìdahâimana za'ra mono norî hã, duré marã rowi 're ìdahâimana za'ra mono norî hã, duré rowaihu'u pese 'wa norî hã, duré rowaihu'u'ô'wa norî hã. Ta norî hã wa za uburé te 're apawaptob u'âsi, dawaptêrê mono bâ. **15** Taha wa, wa âma atême ìsima rowê uptabi za'ra wa'wa, Roma âma 're aihâimana za'ra wa'aba mono norî ma, ìwasu'uwê na tame te duré aima 're rowasu'u za'ra wa'aba mono da.

Zezihi wasu'uwê nhiptede

16 Wa hã, Zezihi wasu'uwê hã te dama 're wasu'u tô mono da, 're ìnhisé mono ô di. E marî wa. 'Re ìhâimana u'âsi mono hã siptete uptabi wa, ìwasu'uwê na te te âma 're da'anho'reptui mono da, Zezusi te te sina 're ì'umnhasi za'ra mono norî hã. Zudezu norî si ma tô ìsãna'rata hawimhã te te 're sô'reptu za'ra aré. Tane nherê, te oto âhãna hã zudezu'ô norî zama te te 're anho'reptu. **17** Zezihi wasu'uwê hã e marî, wa za wa te âma 're waihu'u za'ra. 'Re ìhâimana u'âsi mono, da te 're saze za'ra mono wapsi, dawasédé hã te te oto da'âma 're ì'ab'madâ'â mono ô zarina, te te 're ìda'awêsãmri mono zé, taha wasu'u. Duréihã Habatuti hã, 'Re ìhâimana u'âsi mono zadawa wasu'u 'rata 'wa hã ma tô âne na âma rob'ui'ére:

“Ni'wam norî hã, 'Re ìhâimana u'âsi mono te te 're saze za'ra mono wamhã, ta norî si te za te te 're awêsãmri, 'Re ìhâimana u'âsi mono hã, ìwasédé hã te te oto âma 're ì'ab'madâ'â mono ô zarina, po're'ô nherê, te te 're hã za'ra mono tô da. Ta norî si te za duré rowê u'âsi, âma 're hâimana za'ra.”

Âne na ma tô ìwasu'u na âma rob'ui'ére.

Dapo're âna 're ìdanomro mono na rowasu'u

18 'Re ìhâimana u'âsi mono hã ma tô âne hã wama waihu'u sirômo za'ra, dapo're'ô na 're ìdanomro mono norî hã za te te 're ìda'ahã za'ra mono zém na. Ta norî hã te tipê'ê na te te sima 're rosa'rata wasété u'âsi za'ra. Hâimana wasété uptabi na, te duré dama 're hâimana u'âsi za'ra. Ta norî hã tiwasété si te te 're 'manharî za'ra mono wa, te 'Re ìhâimana u'âsi mono nhimiroti tô sena uptabi hã te te dawî 're 'wa'rutu za'ra, âne na roti ìwê hã da te 're waihu'u za'ra mono tô da. **19** 'Re ìhâimana u'âsi mono 're ìhâimana mono zé hã, da te 're ìwaihu'u za'ra mono zéb da hã, dama waihu'u pese di. E marî wa. 'Re ìhâimana u'âsi mono hã dawî 're si'udã mono ô wa. Uburé marî hã te te ì'apoto mono hã sô'awi da te 're ì'madâ'â za'ra mono zéb zarina, te da te 're waihu'u za'ra, 're ìhâimana mono zé hã. Taha wa, da te 're ìwaihu'u za'ra mono zéb da hã dama waihu'u pese nherê, dapo're âna 're danomro mono wa, te 'Re ìhâimana u'âsi

mono hã te te 're da'ahã za'ra. ²⁰ Duréihã ãsãna'rata hawimhã, 'Re ãhãimana u'ãsi mono, ma tô te te ro'apoto, tiwaihu'u pese na. Tiwaihu'u pese na te te ro'apoto mono wa, ta hawim haré te ãsimiwaihu'u pese zém na, duré tô sena 're ãhãimana mono na, da te ãma 're waihu'u pese za'ra, ãhãiba hã da te 're 'madã'ã waihu'u za'ra mono õ nherẽ. E marĩ zarina tawamhã, 'Re ãhãimana u'ãsi mono, 're ãhãimana mono na te za tô sena na da te ãma 're waihu'u pese za'ra. 'Re ãhãimana u'ãsi mono hã uburé marĩ hã te te ã'apoto mono hã da te 're ã'madã'ã za'ra mono zéb zarina, te oto da te ãma 're waihu'u za'ra, ãwaihu'u pese na, duré tô sena õne u'ãsi 're ãhãimana mono na. Taha wa, tô sena 're hãimana mono nherẽ, da te dasiwi 're udã waihu'u za'ra mono õ di za, 'Re ãhãimana u'ãsi mono hã. ²¹ Ta hã tô sena 're ãhãimana mono na, da te dasiwi 're waihu'u za'ra mono nherẽ, tô sena da te dasiwi 're ãhãimana wazé mono na, da te tãma ãma 're uwaimrami za'ra mono õ di, 'Re ãhãimana u'ãsi mono ma hã. Duré sõprub uptabi nherẽ, ãma 're dawata za'ra mono õ di. Taha upana, te marĩ na si siwa'ru da te 're rosa'rata wasété za'ra. Dapẽ'ẽ 're, robra u'ãsi 're dahãimana za'ra mono wa, te danhimirosa'rata na da te 're upa za'ra. ²² Dapo're'õ na 're ãdanomro mono norĩ hã uburé marĩ hã te te 're waihu'u pese za'ra mono newa, te taré sina 're wata za'ra, dama. Tane nherẽ, te ta norĩ hã simiza'rese ãna 're nomro. ²³ 'Re ãhãimana u'ãsi mono upana, te ta norĩ hã rob'manharĩ ãma si 're wata za'ra, a'uwẽ na dahãiba 'manharĩ ãma, duré si hãiba ne 'manharĩ ãma, duré abaze hãiba ne 'manharĩ ãma, duré di'i na 're ãnomro mono norĩ hãiba ne 'manharĩ ãma.

²⁴ Ta norĩ hã simiza'rese'õ uptabi na 're hãimana u'ãsi za'ra mono wa, ma tô 'Re ãhãimana u'ãsi mono hã te te sima ãma 're aroti, ãne: "Ta norĩ hã po're za'ra õ wa, wa za oto rême za'ra. Te tãma 're roti za'ra mono õ di za oto. Si'uihã na te za oto 're hãimana za'ra." ãne ma tô 'Re ãhãimana u'ãsi mono hã te te sima ãma 're aroti, ta norĩ ãma hã. Taha wa, te oto marĩ ãwasété si te te sima 're ãwẽ u'ãsi za'ra mono zéb zarina, te te 're 'manharĩ u'ãsi za'ra, ta norĩ hã. Tihãiba na zama te duré 're siwasété uptabi za'ra oto, si'uihã na. ²⁵ 'Re ãhãimana u'ãsi mono nhimiroti hã tô sena nherẽ, te ãmreme upana aimawi si te te 're wapari za'ra, tô sena'õ hã. Ropoto'wai upana, te ãsimipoto ãma si 're wata za'ra, ta norĩ hã.

'Re ãhãimana u'ãsi mono ãma si, 're dawata u'ãsi za'ra mono za. Õhõ si, tô sena hã.

²⁶ Tawamhã dapo're'õ na 're ãdanomro mono norĩ hã, Ropoto'wa nhimipoto ãma si 're dawata za'ra mono wa, ma tô oto 'Re ãhãimana u'ãsi mono hã te te 're da'arême, dawasété si da te dasima 're ãwẽ za'ra mono zéb zarina si, dahãiba na 're dasiwasété za'ra mono da, dasi'uihã na. ãne da hã, 'Re ãhãimana u'ãsi mono hã te te

dama 're apisutu mono õ nherẽ, te dasi'uihâ na pi'õ si'uiwa na dasina 're dawasété za'ra. **27** Tane aibâ norĩ hã pi'õ na dasina 're ãdamro za'ra mono zéb upana, te aibâ si'uiwa na si te te sina 're rosa'rata wasété uptabi za'ra, pi'õi upana, aibâ si'uiwa 're ãsi'ruiwapari za'ra mono na. Dasi'uihâ na te aibâ si'uiwa na dasina 're dawasété za'ra. Taha wa, te za 'Re ãhâimana u'âsi mono hã te te 're da'ahâ za'ra, dapo're'õ si, da te dasi'ãma 're ãmanharĩ za'ra mono zéb uwaibaba, 're danomro mono wa.

28 Dapo're'õ na 're ãdanomro mono norĩ hã, 'Re ãhâimana u'âsi mono nhimiroti tô sena hã te te siwi 're wẽ'õ pese za'ra mono wa, te za 'Re ãhâimana u'âsi mono hã te te 're arẽme, si'uihâ na te te sima 're ãrosa'rata wasété za'ra mono zéb uwaibaba si, tiwasédé hã te te 're 'manharĩ u'âsi za'ra mono da. **29** Ta norĩ hã wasété uptabi na te 're hâimana za'ra. Marĩ zô si te te sima 're rob'ruiwapari za'ra. Te duré te te dama 're rob'manharĩ wasété za'ra. Marĩ na te te 're da'ruiwapari u'âsi za'ra. Te duré te te 're danhimro. Siti'ru sina, te ta norĩ hã dazô 're nomro, te te dama 're nharĩ za'ra mono da. Sadawa nhipese uptabi na, te 're hâimana za'ra. Niha te te dama 're rob'manharĩ za'ra mono da, te da'ãma te te sima 're rosa'rata wasété u'âsi za'ra. Taré te te sima 're dabâsi wasété u'âsi za'ra duré. **30** Daza're'ra nherẽ, te duré ta norĩ hã te te sima 're dabâsi wasété za'ra. 'Re ãhâimana u'âsi mono hã te te duré siwi 're ruiwapari. Te duré te te dama 're nharĩ wasété u'âsi za'ra. Danhipai u dama pire na dama 're hâimana za'ra mono newa, te râwi tipẽ na sina 're wata za'ra. Taha wa, te sô'awi timreme na dama 're siwasu'u za'ra, marĩ tâma ãwaihu'u pese za'ra na. Marĩ te te 're ãwaihu'u za'ra mono zéb zarina si te te 're 'manharĩ za'ra, marĩ ãwasétére hã. Timama norĩ nhimiroti hã te te 're wapari za'ra mono õ di duré. **31** Marĩ ãwasété zô si, te ta norĩ hã sima 're sôpré. Simiroti na saprĩ ahã na te 're hâimana za'ra. Da'ãma 're pẽ'ézé za'ra mono õ di. Duré da'ãma 're siwamri za'ra mono õ di. **32** 'Re ãhâimana u'âsi mono hã ma tô ãne na da'ãma sima roti siro, dapo're'õ na 're danomro mono wa, ãsiré ãrata za 're ãdahâimana u'âsi za'ra mono õ na hã. Dapo're'õ norĩ ma hã, ãne hã tâma waihu'u pese za'ra di. Tane nherẽ, te tihâimana wasété si te te sima 're ruiwapari u'âsi za'ra, te te 're rẽme za'ra mono ãna. Tane nherẽ, uburé tiwasédé hã te te 're ãmanharĩ za'ra mono zém nhipai u, te duré marĩ ãwasédé hã te te 're 'manharĩ za'ra. Ni'wam norĩ hã ãsine 're hâimana wasété za'ra mono wa, te ta norĩ si te te 're wêsãmri za'ra.

Ïpo're'õ norĩ, 'Re ãhâimana u'âsi mono te te siwi 're ãawẽ'õ mono zé wasu'u

2 ¹A norĩ wa'wa hã, dapo're'õ na 're ãdanomro mono norĩ ãma, ãwasédé hã ãma 're sa'ra za'ra wa'aba mono wamhã, te za 're aiwasété za'ra wa'aba mo. E marĩ wa. Dasine aiwasédé hã 're 'manharĩ

za'ra wa'aba mono wa, aiwa. Taha wa, dasine 're aihâimana za'ra wa'aba mono nherẽ, dawasédé hã da'ama 're sa'ra za'ra wa'aba mono wamhã, te za 'Re îhâimana u'âsi mono hã te te 're aiwẽ'õ pese za'ra wa'wa dasiré. Taha wa, aiwasété ãna 're aihâimana za'ra wa'aba mono zém na 're asi'madââ waihu'u za'ra wa'aba mono õ di za. ² 'Re îhâimana u'âsi mono hã dapore'õ na 're îdanomro mono norĩ hã te te 're î'awaihu'u mono zéb zarina, te tô te te 're awẽ'õ pese, î'uwaibaba si. ãne hã, uburé wama waihu'u pese za'ra di. ³ Tane nherẽ, a norĩ wa'wa hã dawasédé hã da'ama 're isa'ra za'ra wa'aba mono na, te aiwasédé hã 're îmanharĩ za'ra wa'aba mo. E 'Re îhâimana u'âsi mono nhimihâzé wi, 'rãwi 're asisõ'reptu za'ra wa'aba mono da bâ, te ãne 're îmanharĩ za'ra wa'aba mo. ⁴ Até te za ãne asima 're înharĩ za'ra wa'aba mo: "Re îhâimana u'âsi mono hã simizawi pese uptabi di. Dasi'uihã na dawasédé hã da te 're 'manharĩ u'âsi za'ra mono nherẽ, da'ama 're wa'a su'u mono õ di. Taha wa, îwasédé te 're 'manharĩ mono nherẽ, te te 're î'ahãri su'u mono õ di." ãne hã asi'uihã na asi'ama 're rosa'rata za'ra wa'aba mono õ di za. 'Re îhâimana u'âsi mono hã aiwasété wi 're aipizari za'ra wa'aba mono da si, te simi'ẽ na te te 're ai'madââ za'ra wa'wa, simizawi pese uptabi na. E ãne hã zahadu aima waihu'u za'ra wa'aba õ di bété. ⁵ A norĩ wa'wa hã aipẽẽ tete u'âsi, te 're aihâimana za'ra wa'aba mo. Taha wa, 'Re îhâimana u'âsi mono hã te za ropsi'utõrĩzéb u hã nimahã na bâdã hã îwa îwaptã'ázéb ãma, dazu aihã za'ra wa'wa, dawasété wa, za te te îda'awẽ'õzéb ãma hã. Tame te za oto tinhimihâzé hã dama ãma uwaimra, î'uwaibaba si. ⁶ Marĩ hã da te 're îmanharĩ za'ra mono zéb uwaibaba, te za 'Re îhâimana u'âsi mono hã te te dama 're awa'ãbã, îwẽ na hã duré îwasété na hã. ⁷ Ni'wam norĩ si te marĩ hã simi'ẽ na te te dama 're 'manharĩ u'âsi za'ra, îwẽ hã. Ta norĩ hã 'Re îhâimana u'âsi mono si te te 're wêsãmri za'ra mono da, te sina 're simipari za'ra, duré î'rata 're îsi'ubumroi u'âsi mono zé, te te tãma 're apisutu mono da. Ta norĩ ma si, te za tô 'Re îhâimana u'âsi mono hã te te 're apisutu, 're îsi'ubumroi u'âsi mono zéb da hã, î'rata. ⁸ Duré ni'wam norĩ hã sima si te marĩ na te te 're rosa'rata za'ra, hãiba pisutu ãma 're hâimana za'ra mono da. Ta norĩ hã uburé marĩ îwẽ hã te te siwi 're wẽ'õ za'ra, marĩ îwasété na si 're hâimana za'ra mono da. Ta norĩ si te za 'Re îhâimana u'âsi mono hã sa'ëté te te 're ahã za'ra, po're õ wa. ⁹ Uburé dawasété si, da te 're îmanharĩ za'ra mono norĩ hã te za te te 're robzépata za'ëté za'ra, zudezu norĩ hã, duré zudezu'õ norĩ zama. ¹⁰⁻¹¹ E ni'wam norĩ hã taré zudezu na 're hâimana za'ra mono wa, te za tinhimihâzé hã te te tãma 're ba'a za'ra, 'Re îhâimana u'âsi mono hã. Mare di. Taha zarina, tinhimihâzé hã te te tãma 're ba'a za'ra mono õ di za. Duré e ni'wam norĩ hã taré zudezu na 're hâimana za'ra mono wa, te za îwẽ hã te te tãma 're anhomri, danhipai u. Mare di. Uburé aiwapsi 'Re îhâimana

u'âsi mono ma hã, dapoto mono bâ. Tane nherê, uburé ïwê si te te 're ïmanharĩ za'ra mono norĩ ma si, te za 'Re ïhâimana u'âsi mono hã ïwê hã te te tãma 're anhomri, zudezu norĩ ma, duré zudezu'õ norĩ ma zama. Rowê uptabi si, te za ta norĩ ma si te te 're apisutu. Ta norĩ si te za te te 're awêšãmri.

12 'Re ïhâimana u'âsi mono nhimiroti na, duréihã Mozési te te ïrob'ui'érezé hã zudezu'õ norĩ ma, tãma 're hâimana za'ra mono õ di. Tãma 're hâimana za'ra mono õ nherê, tiwasété na si 're hâimana za'ra mono wamhã, e 'Re ïhâimana u'âsi mono 'rata 're ïsi'ubumroi u'âsi mono zéb da hã, te za te te sina 're uwaimrami za'ra. Mare di. Te te sina 're uwaimrami za'ra mono õ di za. 'Re ïhâimana u'âsi mono nhimiroti 'rata na rob'ui'ére hã zudezu norĩ ma si, te 're hâimana za'ra. Taha wa, ta norĩ hã tiwasédé te te 're 'manharĩ za'ra mono wa, te za 'Re ïhâimana u'âsi mono hã tinhimiroti na rob'ui'ére zarina, te te tãma 're arowairébé, ïwasété na te te 're ïawaihu'u mono zéb uwaibaba. 13 E 'Re ïhâimana u'âsi mono nhimiroti 'rata na rob'ui'ére hã, taré dapo're na da te 're wapari za'ra mono nherê, te za 'Re ïhâimana u'âsi mono hã te te 're da'awêšãmri. Mare di. ïsimiroti zarina 're dahâimana wê za'ra mono wapsi, te za te te 're da'awêšãmri, 'Re ïhâimana u'âsi mono hã. 14 'Re ïhâimana u'âsi mono nhimiroti na Mozési te te ïrob'ui'érezé hã zudezu'õ norĩ ma, tãma 're hâimana za'ra mono õ di. Tãma 're hâimana za'ra mono õ nherê, si'uihã na ïsimiroti zarina 're hâimana wê za'ra mono wamhã, 'Re ïhâimana u'âsi mono ma, te za te te tãma ãma 're uwaimrami za'ra, tãma 're hâimana za'ra mono õ nherê, 'Re ïhâimana u'âsi mono nhimiroti na ïbaihã hã. 15 Ta norĩ hã si'uihã na 're hâimana wê za'ra mono wamhã, 'Re ïhâimana u'âsi mono nhimiroti hã ïpêê 're, tãma 're ïhâimana u'âsi za'ra mono zé, te wasu'u. Duré ïwê hã te te dama 're 'manharĩ za'ra mono wamhã, rãwi te za tipêê na 're sisaze za'ra. Duré marĩ ïwasédé hã te te 're 'manharĩ za'ra mono wamhã, rãwi te za tiwasété na 're sisãmri za'ra. Taha wa, tipêê na rãwi 're sisaze za'ra mono wamhã, duré rãwi tiwasété na 're sisãmri za'ra mono wamhã, 'Re ïhâimana u'âsi mono nhimiroti, ïpêê 're, tãma 're ïhâimana u'âsi za'ra mono zé, te wasu'u. 16 ãne hã ïwasu'u'wê na te dama 're ïrowasu'u mono zéb zarina, te za tô nimahã na tiromhãiba, 'Re ïhâimana u'âsi mono nhimipisutuzéb zarina, Zezu Cristu hã da'ãma ïsipo'ozéb da hã. 'Rãwi dasima si da te 're ïrosa'rata za'ra mono na te za oto da'awaihu'u. Taha zarina te za dama arowairébé oto, Cristu hã.

**Mozési hã 'Re ïhâimana u'âsi mono nhimiroti na te te
ïrob'ui'érezém na rowasu'u**

17 Zudezu norĩ, ãhãna wa za ai'ãma rob'ui'ére za'ra wa'wa. A norĩ wa'wa hã, danhipai u 'Re ïhâimana u'âsi mono te te 're asawi pese

uptabi za'ra wa'aba mono na, te dama 're asiwasu'u za'ra wa'aba mo, ïsib'a'uwẽ 're anomro aba mono wẽ te. 'Re ïhâimana u'âsi mono nhimiroti na Mozési te te ïrob'ui'érezé hã, aima wa'aba si 're hâimana za'ra wa'aba mono wẽ te, te ato sina 're anomro aba mo, aima wa'aba si 're hâimana za'ra wa'aba mono wa, 'Re ïhâimana u'âsi mono hã te te 're aiwẽsãmri za'ra wa'aba mono da newa, aiwasédé hã te te oto ai'ãma 're ï'ab'madâ'ã za'ra wa'aba mono õ zarina. **18** 'Re ïhâimana u'âsi mono te te aima 're ï'apisutu aba mono zéb zarina 're ï'manharĩ za'ra wa'aba mono zéb da hã, aima waihu'u pese za'ra wa'aba di. Duré 'Re ïhâimana u'âsi mono nhimiroti 'rata na rob'ui'ére hã ma tô 're ïwaihu'u za'ra wa'aba mo, ãma 're anomro wẽ wa'aba mono da.

19 ãne na te duré asi'ãma si 're ïrosa'rata upa za'ra wa'aba mo: “Wa norĩ si datob'a ne 're ïdanomro mono norĩ hã, wa wa te 're simro, tô sena. Robra u'âsi 're ïdanomro mono norĩ ma, wa wa te 're rowa'a za'ra. **20** Duré 're ïdahâimana wẽ za'ra mono zéb da hã, da te 're ïwaihu'u za'ra mono õ norĩ ma hã, wa wa te 're roti za'ra ïwẽ na, duré ai'uté ne hâimana nhimiza'rese ãna 're ïhâimana za'ra mono norĩ ma zama.” ãne na te asi'ãma 're ïrosa'rata upa za'ra wa'aba mo. Duré 'Re ïhâimana u'âsi mono nhimiroti 'rata na rob'ui'ére hã aima 're hâimana za'ra wa'aba mono wẽ te, te duré ãne na asi'ãma 're ïrosa'rata upa za'ra wa'aba mo: “Wa norĩ ma si, wama waihu'u pese za'ra di, uburé roti ïwẽ hã tô sena uptabi hã.” ãne na te duré asi'ãma 're aiwata za'ra wa'aba mo. **21** E marĩ wa, a norĩ wa'wa hã dama 're roti za'ra wa'aba mono nherẽ, 'rãwi duré asima zama 're roti za'ra wa'aba mono õ di. Marĩ na dawĩ 're danhipsaihuri za'ra mono tõ da, dama 're roti za'ra wa'aba mono nherẽ, te a norĩ wa'aba zama marĩ na dawĩ 're asipsaihuri za'ra wa'aba mo. **22** Duré damro na dasiwi 're danhipsaihuri za'ra mono tõ da, dama 're roti za'ra wa'aba mono nherẽ, te duré a norĩ wa'wa hã aimro na asiwi 're asipsaihuri za'ra wa'aba mo. Duré uburé romhãiba 'manharĩ hã 'Re ïhâimana u'âsi mono upana, ãma 're ïdawata za'ra mono zé hã asiwi 're wẽ'õ pese za'ra wa'aba mono nherẽ, te 'ri para 're ïsimasa mono zéb u 're asisisi aba mo, marĩ, 're simi'uri za'ra wa'aba mono da. **23** A norĩ wa'wa hã zudezu na da te 're aiwaptẽrẽ za'ra wa'wa, 'Re ïhâimana u'âsi mono nhimiroti 'rata na rob'ui'ére hã aima wa'aba si 're hâimana mono wẽ te, te dama asina 're ïwasu'u za'ra wa'aba mo. Tane nherẽ, ïsimiroti si 're 'madâ'ã za'ra wa'aba mono õ di. Duré asiwi 're wazéb za'ra wa'aba mono õ di. Taha zarina, zudezu'õ norĩ ma hã tãma wẽ za'ra õ di, 'Re ïhâimana u'âsi mono hã. **24** ãne ma tô duréihã ai'ãma rob'ui'ére sirõmo za'ra wa'wa, 'Re ïhâimana u'âsi mono zadawa wasu'u 'rata 'wa hã:

“A norĩ wa'wa hã zudezu na 're aihâimana za'ra wa'aba mono, 'Re ïhâimana u'âsi mono nhimiroti zarina si 're

aihâimana za'ra wa'aba mono õ wa, te zudezu'õ norĩ hã 'Re ãhâimana u'âsi mono ãma te te 're waseté za'ra.”

Ãne ma tô duréihã ai'ãma rob'ui'ééré za'ra wa'aba ni, ãbaihã na hã.

25 'Re ãhâimana u'âsi mono nhimiroti 'rata na rob'ui'ééré hã 're 'madã'ã pese za'ra wa'aba mono wamhã, ã'uwaibaba te za 're asihãiwata nhihãri za'ra wa'aba mo. Tane nherẽ, ãsimiroti si 're 'madã'ã pese za'ra wa'aba mono õ wamhã, sihãiwata nhihãri ãna 're ãnomro mono norĩ ne, te za tãma 're aihâimana za'ra wa'aba mo, 'Re ãhâimana u'âsi mono ma hã aiwa. 26 Zudezu'õ norĩ hã sihãiwata nhihãri ãna 're nomro mono nherẽ, ãsimiroti 'rata na si 're hãimana wẽ za'ra mono wamhã, ãsib'a'uwẽ ne, te za 'Re ãhâimana u'âsi mono hã te te 're 'madã'ã za'ra, zudezu norĩ ne. 27 A norĩ wa'wa hã zudezu na 're aihâimana za'ra wa'aba mono hã, 'Re ãhâimana u'âsi mono nhimiroti 'rata na rob'ui'ééré hã 're 'madã'ã pese za'ra wa'aba mono õ di, ãbaihã na rob'ui'ééré hã aima 're hãimana za'ra wa'aba mono nherẽ, duré asihãiwata nhihãri ré 're aihâimana za'ra wa'aba mono nherẽ. Tane nherẽ, ni'wam norĩ hã zudezu'õ norĩ hã sihãiwata nhihãri ré, 're hãimana za'ra mono õ nherẽ, te 'Re ãhâimana u'âsi mono nhimiroti 'rada hã te te 're 'madã'ã pese za'ra. Taha zarina te za 'Re ãhâimana u'âsi mono hã te te siwi 're aiwẽ'õ pese za'ra wa'wa, te te 're aihã za'ra wa'aba mono da, zudezu'õ norĩ si ãsimiroti hã te te 're 'madã'ã pese za'ra mono wa, ai'upana za'ra wa'aba. 28-29 A norĩ wa'wa hã, e asihãiwata nhihãri ré 're anomro aba mono wa, te 'Re ãhâimana u'âsi mono nhib'a'uwẽ uptabi na 're aihâimana za'ra wa'aba mo. E danho'a uburé marĩ hã zudezu hãimanazéb zarina si 're 'manharĩ za'ra wa'aba mono wa, te za 'Re ãhâimana u'âsi mono nhib'a'uwẽ uptabi hã 're anomro aba mo. Mare di. Ãne hã ã'uwaibaba nherẽ, ã'uwaibaba õ di, 'Re ãhâimana u'âsi mono ma hã. 'Rãwi aipẽ'ẽ 're, ãsimiroti hã aima 're hãimana u'âsi za'ra wa'aba mono wapsi, tawapsi te za ãsib'a'uwẽ uptabi na 're aihâimana za'ra wa'aba mo, 'Re ãhâimana u'âsi mono pẽ'ẽzani nhimipawaptob zarina si. 'Re ãhâimana u'âsi mono nhimiroti 'rata na rob'ui'ééré hã danho'a 're ãwapari za'ra wa'aba mono zém na, tawamhã, ãsib'a'uwẽ uptabi na 're anomro aba mono õ di za. 'Rãwi aipẽ'ẽ 're, ãsimiroti hã aima 're hãimana u'âsi za'ra wa'aba mono wapsi, tawapsi te za ãsib'a'uwẽ uptabi na 're aihâimana za'ra wa'aba mo. ãsib'a'uwẽ uptabi na 're ãhâimana za'ra mono norĩ hã ti'ai ãma ré, da te 're wẽsãmri za'ra mono dai õ nherẽ, te 'Re ãhâimana u'âsi mono si te te sima 're wasu'u wẽ za'ra.

'Re ãhâimana u'âsi mono hã, tô sena na te te dama 're ã'aropisutu mono zém na rowasu'u

3 1 Tawamhã zudezu na 're ã'aihâimana za'ra wa'aba mono zé hã, e taré, te bété asihãiwata nhihãri ré 're anomro aba mo. E taré,

'Re ihâimana u'âsi mono ma hã. 2 Mare di. Tô sena tãma hã, zudezu na 're aihâimana za'ra wa'aba mono zé hã. Tãma wê di, 'Re ihâimana u'âsi mono ma hã. E niha, wa za tawamhã âne hã waihu'u za'ra ni, zudezu norĩ 're ihâimana za'ra mono zé hã. Duréihã 'Re ihâimana u'âsi mono hã ma tô zudezu norĩ si te te sima 're awê, ïsimiroti na rob'ui'ére 'rada hã uburé da'udâna te te 're 'madâ'â pese za'ra mono da, dawi simani tã da. 3 Tane nherê, ni'wam norĩ hã zudezu norĩ hã 'Re ihâimana u'âsi mono nhimiroti zarina 're ïnomro mono na hã te te tãma âma 're uwaimrami za'ra mono õ di. E tawamhã 'Re ihâimana u'âsi mono hã asa te te tãma âma 're uwaimrami za'ra mono õ di za, uburé marĩ na te te tãma âma 're ïropisutu za'ra mono zéb zarina. 4 Te za tô te te tãma âma 're uwaimrami u'âsi za'ra, te te tãma 're ï'aropisutu mono zéb zarina. Uburé ti'ai âma dazadawa nhipese na dasima 're dahâimana za'ra mono nherê, 'Re ihâimana u'âsi mono si, sadawa nhipese õ di, tô sena. Duréihã ma tô âne na âma rob'ui'ére Dawi hã, 'Re ihâimana u'âsi mono âma hã:

“A hã marĩ na dama 're roti mono wamhã, tô sena asadawa nhipese õ na te za da te 're aiwaihu'u za'ra, tô sena asimiroti hã. Duré ni'wam norĩ hã asadawa nhipe te te ai'âma 're sa'ra mono wamhã, ta norĩ si ïsadawa nhipese na te za da te dasiwi 're waihu'u za'ra, ai'upana.”

Ãne na ma tô duréihã rob'ui'ére Dawi hã, ïbaihã na hã.

5 Ni'wam norĩ hã te âne na te te si'âma 're rosa'rata upa za'ra: “Wa norĩ hã wahâimana wasété na si, wa za oto 're wahâimana za'ra, 're ïwanomro wasété uptabi mono na, da te 're wawaihu'u za'ra mono wa, 'Re ihâimana u'âsi mono si wasété âna 're ïmorĩ wê uptabi na, da te 're waihu'u za'ra mono da, wanhipai u. Tawamhã, wahâimana wasété na 're wahâimana za'ra mono nherê, e te za te te 're wa'ahã za'ra, 'Re ihâimana u'âsi mono hã. Mare di. Te te 're wa'ahã za'ra mono õ di za.” Ãne te ni'wam norĩ hã te te si'âma 're rosa'rata upa za'ra. 6 E tawamhã ï'uwaibaba te ta norĩ hã âne na hã te te 're rosa'rata za'ra. Mare di. ï'uwaibaba õ di. 'Re ihâimana u'âsi mono hã te tô ï'uwaibaba si te te 're da'ahã za'ra. ï'uwaibaba na si te marĩ na te te dama 're arowairébé. Ãne zarina te te dama 're arowairébé mono õ 'wa'âhã, aré te te da'awê'õ waihu'u õ di, za da'âma ïsipo'ozéb âma hã, 'Re ihâimana u'âsi mono hã.

7 Até ni'wam norĩ hã te za duré âne na te te si'âma 're rosa'rata upa za'ra: “Wa norĩ hã wawasédé, wa te 're 'manharĩ za'ra mono wamhã, até te za âne na da te wa'âma 're rosa'rata za'ra: ‘Õ norĩ hã wasété uptabi na te 're nomro. 'Re ihâimana u'âsi mono si, te wê uptabi na 're hâimana, õhõ si siwaprosi.’ Ãne na te za 'Re ihâimana u'âsi mono si 're ïmorĩ wê uptabi na, da te dasiwi 're waihu'u za'ra,

wawasété si, wa te 're ĩmanharĩ za'ra mono na, da te 're ĩwawaihu'u za'ra mono zém na hã. E tawamhã ĩ'uwaibaba, 'Re ĩhâimana u'âsi mono, wawasédé te te wa'âma 're ĩaza'ra mono zéb da hã. Mare di. ĩ'uwaibaba ô di." Āne na te duré ni'wam norĩ hã te te si'âma 're rosa'rata upa za'ra. ⁸ Taha zarina te duré te te sima 're nharĩ za'ra: "Wawasété si, wa za tô wa te 're 'manharĩ u'âsi za'ra, 'Re ĩhâimana u'âsi mono si ĩwẽ uptabi na, da te dasiwi 're ĩwaihu'u za'ra mono zéb da hã." Ni'wam norĩ hã ma tô āne na ĩnhimiroti wasédé hã ĩ'âma sa'ra, ĩsi'uihã na āne hã te āma ĩwaihu'u za'ra newa. Ma tô ĩ'âma wasété za'ra. Taha wa, te za 'Re ĩhâimana u'âsi mono hã ta norĩ si siwi wẽ'ô pese za'ra, ĩ'uwaibaba.

Dahâimana wasété na 're ĩdahâimana za'ra mono na rowasu'u

⁹ Tawamhã wa norĩ hã zudezu norĩ hã e taré zudezu na 're wahâimana za'ra mono wa, te za, zudezu'ô norĩ hâimanazém nhipai u, te te 're wa'awẽsãmri, 'Re ĩhâimana u'âsi mono hã. Mare di. Uburé aiwapsi tãma 're ĩdahâimana za'ra mono zé hã. Uburé dahâimana wasédé hã da te 're ĩmanharĩ za'ra mono na si te 're dahâimana za'ra, zudezu norĩ hã duré zudezu'ô norĩ zama. Dawasété hawi, dasi'uihã na 're dawairébé waihu'u mono ô di, dama siptete wa, dawasédé hã. Āne, wa tô aima waihu'u pari za'ra wa'wa. ¹⁰ Duréihã ma tô āne na ni'wam norĩ hã āma rob'ui'ére za'ra:

"Ni'wam norĩ hã si'uihã na 're ĩnomro wẽ mono zém na, 'Re ĩhâimana u'âsi mono te te 're ĩwasu'u wẽ za'ra mono zéb da hã, robaba di. Uburé 're ĩdanomro wasété mono na si, te 're dahâimana za'ra.

¹¹ Duré ni'wam norĩ hã āne te te waihu'u za'ra ô di, dawẽ na 're ĩdanomro mono zé hã. Duré ni'wam norĩ hã 'Re ĩhâimana u'âsi mono zô 're sôpré mono ô di, ĩhâimanazém na te te 're ĩwaihu'u za'ra mono zéb da hã. Āne hã tãma robaba uptabi di, 'Re ĩhâimana u'âsi mono ma hã.

¹² A'uwẽ mono bâ ma tô 'Re ĩhâimana u'âsi mono wi, 're dasipizari za'ra.

Dasi'uihã na marĩ ĩwẽ hã da te 're 'manharĩ waihu'u za'ra mono ô di. Taré ma tô 're danomro. Ni'wam norĩ hã marĩ ĩwẽ hã te te 're 'manharĩ za'ra mono ô di. Mare uptabi di.

¹³ Uburé danhoto hã wasété di. Wasété uptabi di.

Danhoto wasété na te dazadawa nhipese na, da te dasima 're nharĩ wasété za'ra.

Duré wahi hã te te 're dahâzu mono wa, ti'wa wa'u na te te 're ĩdanhimroi mono ne, te damreme na da te dasima 're nharĩ wasété za'ra, rowẽ hã da te dasiwi 're uprosi za'ra mono da.

- 14 Damreme ïwasété uptabi na si te dasi'ãma da te 're wasété za'ra.
- 15 Dasi'aba're na te duré 're dasi'u'a za'ra. Dasi'aba're na te duré 're dasisimro.
- 16 Daro mono bâ 're danomro mono sidâpâsi, te da te dasiwi 're rowamnarĩ u'âsi za'ra. Taha wa, te dasisa'u hã robzei'õ u'âsi 're dahâimana za'ra.
- 17 Rowẽ na 're ïdahâimana za'ra mono zéb da hã, marĩ hã ïwẽ hã da te dasima 're 'manharĩ waihu'u za'ra mono õ di.
- 18 'Re ïhâimana u'âsi mono zama, da te dasiwi 're hâimana wazé mono õ di.”

Ãne na ma tô 'Re ïhâimana u'âsi mono nhimiroti na da'ãma rob'ui'ére sirõmo za'ra.

19 Duréihã 'Re ïhâimana u'âsi mono nhimiroti na ma tô Mozési hã rob'ui'ére, zudezu norĩ ma, õhõ na si ãma 're hâimana za'ra mono da. Taha wa, 'Re ïhâimana u'âsi mono nhimiroti 'rata na rob'ui'ére hã 're hâimana sirõmo mono wa, ni'wa hã tiwẽ na 're ïmorĩ wasété õ na dama 're siwasu'u waihu'u mono õ di. Uburé dawasété na 're dasisãmri za'ra mono da si, te dama 're hâimana, rob'ui'ére 'rada hã, duré 'Re ïhâimana u'âsi mono, dawasété na te te 're ïda'awẽ'õ mono zé hã da te dasina 're waihu'u za'ra mono da.

20 E 'Re ïhâimana u'âsi mono nhimiroti 'rata na rob'ui'ére zarina, marĩ hã da te 're ïmanharĩ wẽ za'ra mono na, te za te te sima da'ãma 're aroti, dawasédé hã te te oto da'ãma 're ab'madâ'â tõ mono da, taha zarina te te oto 're da'awẽsãmri mono da, dapo're'õ nherẽ, te te 're da'ahã za'ra mono tõ da. Mare di. Taha nai õ di. Uburé marĩ hã da te 're ïmanharĩ wasété za'ra mono na, 'rãwi 're dasiwaihu'u za'ra mono da si, te dama 're hâimana, rob'ui'ére 'rada hã.

'Re ïhâimana u'âsi mono te te 're ïda'awẽsãmri mono zém na rowasu'u

21 Tane nherẽ, 'Re ïhâimana u'âsi mono ma tô oto dama waihu'u, te te 're ïda'awẽsãmri mono zém na hã, sõ'awi da te oto 're ïwaihu'u za'ra mono zéb da hã. 'Re ïhâimana u'âsi mono hã te te sima da'ãma 're aroti mono õ di, uburé marĩ hã da te 're ïmanharĩ wẽ za'ra mono zéb zarina, dawasédé hã te te oto da'ãma 're ïab'madâ'â mono õ zéb da hã, taha zarina te te oto 're ïda'awẽsãmri mono zéb da hã. Duréihã 'Re ïhâimana u'âsi mono nhimiroti 'rata na rob'ui'ére'wa norĩ hã ma tô ãne na ãma rob'ui'ére za'ra, 'Re ïhâimana u'âsi mono te te 're ïda'awẽsãmri mono zém na hã. 22 Zezu Cristu, Danho'reptui'wa na da te dasina 're ïumnhasi za'ra mono zém na si, ma tô 'Re ïhâimana u'âsi mono hã te te sima da'ãma 're aroti, dawasédé hã te te oto da'ãma 're ab'madâ'â tõ mono da, taha zarina si te te oto 're

da'awēsāmri mono da, dawasété na 're danomro mono nherẽ, te te oto 're da'ahâ za'ra mono tõ da. Uburé Zezu Cristu te te 're ãsaze za'ra mono norĩ si, te te oto 're awēsāmri. ãne hã aiwapsi te uburé tãma 're hãimana za'ra, zudezu norĩ hã, duré zudezu'õ norĩ zama. **23** A'uwẽ mono bâ te uburé dawasété na 're danomro. Taha wa, te 'Re ãhãimana u'ãsi mono nhiti 're dahãimana za'ra, 're ãmorĩ wẽ uptabi nhiti. **24** Tane nherẽ, 'Re ãhãimana u'ãsi mono nhiti 're dahãimana za'ra mono nherẽ, Zezusi te te 're ãsaze za'ra mono norĩ hã te te 're awēsāmri, da'ãma 're ãpẽ'ézé mono zéb zarina, asa tãma 're ãdasiwa'ãbã za'ra mono zéb zõ, sina 're simnhasi mono ãna. Cristu Zezusi hã tidã'ãzém na ma tõ da'awa'ã. Taha wa, ma tõ dawasété hawi te te 're da'awaibu. Taha na si te oto 'Re ãhãimana u'ãsi mono hã te te 're da'awēsāmri, dawasédé hã za oto te te da'ãma 're ã'ab'madã'ã mono õ zéb zarina. **25** 'Re ãhãimana u'ãsi mono hã ma tõ Zezusi hã pisutu, dazada ãdã'ãzém na dawasédé, da te 're ãmanharĩ za'ra mono zé hã te te dama 're apari mono da, taha zarina tiwi 'rusimani da, ãwa'rãmi da'ãma 're pẽ'ézé mono da. Duré taha na si te te 're ãda'awēsãmri mono zé hã, 'rãwi da te dasina 're waihu'u za'ra mono da, ma tõ ãne da pisutu, Zezusi hã. Zezusi hã da te 're sazei pese za'ra mono wapsi, te za dawasédé hã te te dama 're apari. 'Re ãhãimana u'ãsi mono hã da'ãma 're wa'a su'u mono õ wa, dawasédé hã te te da'ãma 're ab'madã'ã mono õ di aré. **26** Tane nherẽ, ãhãna hã dawasédé hã da te 're ãmanharĩ za'ra mono zém na, te te da'ãma 're ab'madã'ã mono ãna 're hãimana mono õ di oto. Te oto te te ãma 're da'ab'madã'ã u'ãsi, uburé marĩ hã ã'uwaibaba si te te 're ã'ab'manharĩ wẽ mono na, da te dasina 're waihu'u za'ra mono da, duré uburé Zezusi hã da te 're ãsazei pese za'ra mono norĩ hã te te 're ãda'awēsãmri mono na, da te dasina 're waihu'u za'ra mono da.

27 E tawamhã wasi'uihã na, wa za wawẽ na wasina 're wawata za'ra, 'Re ãhãimana u'ãsi mono te te 're ãwa'awēsãmri mono na hã. Mare di. E marĩ wa. 'Re ãhãimana u'ãsi mono nhimiroti si, wa te 're ãmadã'ã pese za'ra mono na, te te sima wa'ãma 're aroti mono õ na dã'ãsina, taha zarina wawasédé hã te te wa'ãma 're ab'madã'ã tõ mono da. Taré, Zezusi hã wa te 're ãsazei pese za'ra mono na, te te sima wa'ãma 're aroti, taha zarina wawasédé hã te te oto wa'ãma 're ab'madã'ã tõ mono da, taha zarina te te 're wa'awēsãmri mono da. **28** ãne hã wa tõ wasina waihu'u pese za'ra ni oto. Tõ sena, Zezusi hã da te dasina 're umnhasi za'ra mono wapsi, te za tõ 'Re ãhãimana u'ãsi mono hã te te sima da'ãma 're aroti, dawasédé hã te te oto da'ãma 're ã'ab'madã'ã mono õ zéb zarina, te te oto 're ãda'awēsãmri mono zéb da hã. Ta hã te te sima da'ãma 're aroti mono õ di, ãsimiroti na rob'ui'ére 'rata zarina, marĩ hã uburé da te 're ãmanharĩ wẽ za'ra mono na, dawasédé hã te te oto da'ãma 're ã'ab'madã'ã

mono õ zéb da hã, taha zarina te te duré 're ãda'awësãmri mono zéb da hã. ãne wasu'u zarina, wa tô wa norĩ hã wasina waihu'u pese za'ra ni oto. ²⁹ E zudezu norĩ nhib'apito si, te 'Re ãhãmmana u'ãsi mono hã 're hãmmana. E zudezu'õ norĩ ma hã, 're hãmmana mono õ di bété. Ta norĩ ma zama te duré 're hãmmana. ³⁰ 'Re ãhãmmana u'ãsi mono hã tô sena, misire uburé Danhib'apito uptabi hã. Zezusi hã te te 're ãsazei pese za'ra mono zéb zarina si, te za te te sima ãma 're aroti, ãwasédé hã te te oto ãma 're ab'madâ'â tã mono da, taha zarina si te te oto 're awësãmri mono da, zudezu norĩ hã, duré zudezu'õ norĩ zama. ³¹ Zezusi hã da te dasina 're ã'umnhasi za'ra mono zém na si, 'Re ãhãmmana u'ãsi mono hã dawasédé hã te te oto da'ãma 're ab'madâ'â tã mono da, te te sima da'ãma 're aroti mono wamhã, e tawamhã, 'Re ãhãmmana u'ãsi mono nhimiroti 'rata na rob'ui'ééré hã, wama hã taré hã. E wa te 're 'madâ'â pese za'ra mono õ di za. Wa za tô taha zama, wa te 're 'madâ'â pese za'ra, tô sena wa.

Abra'ãhã wasu'u, 'Re ãhãmmana u'ãsi mono te te 're ãsazei pese mono zém na

4 ¹ ãhãna hã wasiré zudezu norĩ hi'rada, wa za aima wasu'u za'ra wa'wa, Abra'ã hã. ² Ta hã uburé marĩ hã te te 're ã'ab'manharĩ wẽ mono na, 'Re ãhãmmana u'ãsi mono, ãwasédé hã te te oto ãma 're 'madâ'â mono tã da, te te sima ãma roti 'wa'ãhã, duré taha zarina Abra'ã hã 'rãwi tiwẽ na sina 're wata mono 'wa'ãhã, te aré tô sena 'rãwi sina 're wata. Tane nherẽ, marĩ hã te te 're ã'ab'manharĩ wẽ mono na, 'rãwi sina 're wata waihu'u mono õ di Abra'ã hã, taha zarina 'Re ãhãmmana u'ãsi mono hã te te sima ãma roti õ wa, ãwasédé hã te te oto ãma 're ã'madâ'â mono õ zarina, te te ãwësãmrizéb da hã. ³ Duréihã Abra'ãhã wasu'u na, ma tô ni'wa hã ãma rob'ui'ééré, ãne na hã:

“Abra'ã hã 'Re ãhãmmana u'ãsi mono si, ma tô te te sina 're umnhasi u'ãsi, te te tãma ãropisutuzém na hã. Taha ãma si, ma tô sasõ. Taha wa, ma tô 'Re ãhãmmana u'ãsi mono hã sima ãma roti, ãwasédé hã te te oto ãma 're 'madâ'â tã mono da, duré taha zarina si te te oto wësãmri da. Taha wa, tãma wẽ uptabi di, 'Re ãhãmmana u'ãsi mono ma hã.”

ãne ma tô Abra'ãhã wasu'u na ãma rob'ui'ééré ni'wa hã, ãbaihã na hã. ã hã Abra'ã hã, marĩ hã te te 're ã'ab'manharĩ wẽ mono na, 'rãwi sina 're ãwata mono õ zé wasu'u. ⁴ Ni'wam norĩ hã te te dama 're romhuri za'ra mono wamhã, da te 're ãpawa'ãbã za'ra mono ré, te 're hãmmana za'ra. E sõpru wa, te za taré ãsib'apito hã rob'ui'prazé hã te te tãma 're sõmri za'ra. Mare di. Sõpru wa, te te tãma 're sõmri za'ra mono õ di. Te te tãma 're ãromhuri za'ra mono zé wa'rãmip si, te za te te tãma 're

sômri za'ra, ĩpawa'â hã. ⁵ Tanei õ di, 'Re ĩhâimana u'âsi mono hã. Marĩ hã da te 're ĩmanharĩ wẽ za'ra mono na, te rãwi 're dasi'madã'â ze za'ra, taha na si 'Re ĩhâimana u'âsi mono hã dawasédé hã te te oto da'ãma 're ĩab'madã'â mono õ na, te te sima da'ãma 're aroti mono newa. Tane nherẽ, te te sima da'ãma 're aroti mono õ di, taha na dawasédé hã te te oto da'ãma 're ab'madã'â tõ mono da, taha zarina te te oto 're ĩda'awêsãmri mono zéb da hã. 'Re ĩhâimana u'âsi mono hã da te dasina 're umnhasi za'ra mono wapsi, te za te te sina 're da'awêsãmri, dawasédé hã za oto te te da'ãma 're ab'madã'â mono õ wa, duré dawasété na 're danomro mono nherẽ, te te 're da'ahã za'ra mono tõ da. ⁶ 'Re ĩhâimana u'âsi mono te te sima da'ãma 're aroti mono õ di tõ, uburé marĩ hã da te 're ĩmanharĩ wẽ za'ra mono zéb zarina, dawasédé hã te te oto da'ãma 're ĩab'madã'â mono õ zéb da hã, taha zarina te te oto 're ĩda'awêsãmri mono zéb da hã. Da te 're ĩsaze za'ra mono zém na si te oto te te 're da'awêsãmri tõ. Taha zarina, dama 're ĩrowẽ uptabi za'ra mono zém na hã, ma tõ Dawi hã ãne na ãma rob'ui'ééré, duréihã:

⁷ "Ni'wam norĩ ma hã, 'Re ĩhâimana u'âsi mono hã ĩwasédé te te oto ãma 're 'madã'â za'ra mono õ wamhã, ta norĩ ma si, tãma 're rowẽ za'ra mono di za, ĩwasété na oto ãma 're po're pu'u za'ra mono õ wa, ta norĩ ãma hã.

⁸ 'Re ĩhâimana u'âsi mono hã ĩwasédé hã te te oto ãma 're sa'rata za'ra mono õ wa, tãma 're rowẽ za'ra mono di."

Ãne na ma tõ Dawi hã ãma rob'ui'ééré, dama 're ĩrowẽ uptabi za'ra mono zém na.

⁹ Ãne hã, e sihãiwata nhihãri ré 're ĩnomro mono norĩ si, te za rowẽ uptabi na 're nomro. E ã norĩ si, te wasu'u, Dawi hã. Mare di. Sihãiwata nhihãri ãna 're ĩnomro mono norĩ zama, te wasu'u. Ãne na, wa tõ aima waihu'u pari za'ra wa'wa, Abra'ãhã wasu'u na rob'ui'ééré hã, duréihã:

"Abra'ã hã 'Re ĩhâimana u'âsi mono si, ma tõ te te sina 're umnhasi u'âsi, te te tãma ĩropisutuzém na hã. Taha ãma si ma tõ sasõ. Taha wa, ma tõ 'Re ĩhâimana u'âsi mono hã sima ãma roti, ĩwasédé hã te te oto ãma 're 'madã'â tõ mono da, duré taha zarina si te te oto wêsãmri da. Taha wa, tãma wẽ uptabi di, 'Re ĩhâimana u'âsi mono ma hã."

Ãne, wa tõ aima waihu'u za'ra wa'wa. ¹⁰ E tawamhã Abra'ã hã sihãiwata nhizãri sirõmo, ma tõ 'Re ĩhâimana u'âsi mono hã sima ãma roti, te te wêsãmri da. Mare di. Sihãiwata nhizãri õ ré, ma tõ wêsã. ¹¹ 'Re ĩhâimana u'âsi mono hã, Abra'ã hã te te sina ĩumnhasi pese zém na si, ma tõ wêsã, sihãiwata nhizãri õ nherẽ. Taha wa, sihãiwata nhizãri õ ré, Abra'ã hã, 'Re ĩhâimana u'âsi mono te te ĩwêsãmrizém na hã, te wama wasu'u, tõ sena na uburé da te 're

ĩwaihu'u za'ra mono zéb da hã. Taha wa, Abra'ã hã uburé 'Re ãhãimana u'ãsi mono, da te dasina 're ãumnhasi za'ra mono norĩ hi'rada, ta hã. Sihãiwata nhĩhãri õ nherẽ, 'Re ãhãimana u'ãsi mono te te 're ãawẽsãmri mono norĩ hi'rada. ¹² Duré, ãsihãiwata nhĩhãri ré norĩ hi'rada, zudezu norĩ hi'rada. E tawamhã sihãiwata nhĩhãri ré 're hãimana za'ra mono wa, te ta norĩ hi'rada hã 're hãimana, Abra'ã hã. Mare di. Abra'ã hã sihãiwata nhizãri õ ré, 'Re ãhãimana u'ãsi mono te te ãsazei pese ne, ãsine te te 're ãsazei pese za'ra mono norĩ hi'rata si, te 're hãimana, Abra'ã hã.

Abra'ãhã ma, 'Re ãhãimana u'ãsi mono te te ãropisutuzé wasu'u

¹³ Duréihã 'Re ãhãimana u'ãsi mono hã Abra'ãhã ma, ma tô ropisutu, uburé danhipti'ai mono bã te te tãma 're anhomri mono da, ãsihudu norĩ ma ropibu ma, ãsihudu sidãpãsi. E ãsimiroti hã uburé te te 're 'madã'ã pese uptabi mono wa, duré nimahã na marĩ na misi ãsimiroti na te te upai õ wa, ma tô ãne na tãma ropisutu. Mare di. Taha wab õ di. 'Re ãhãimana u'ãsi mono te te ãsazei pese na, te te wẽsãmri wa, ma tô ãne na tãma ropisutu siro. ¹⁴ 'Re ãhãimana u'ãsi mono nhimiroti 'madã'ã'wa norĩ hã zudezu norĩ hã, ãsimiroti te te 're ã'madã'ã pese za'ra mono zéb zarina, 'Re ãhãimana u'ãsi mono, ta norĩ ma, uburé danhipti'ai mono bã te te tãma 're ãanhomri mono da hã, te te ropisutu 'wa'ãhã, taré te aré da te 're saze za'ra, 'Re ãhãimana u'ãsi mono hã. Marĩ dai õ di aré. Taré te aré 'Re ãhãimana u'ãsi mono hã dama ropisutu, daro hã te te dama 're ãanhomri mono zém na hã. Dama hã, aré marĩ õ di. ¹⁵ 'Re ãdahãimana wẽ za'ra mono zéb da hã, dasi'uihã na da te dasima 're ãpisutu za'ra mono zé hã dama 're hãimana za'ra mono õ 'wa'ãhã, aré da te ãma 're upai waihu'u za'ra mono õ di. Tane, 'Re ãhãimana u'ãsi mono nhimiroti na Mozési te te ãrob'ui'érezé hã dama 're hãimana za'ra mono õ 'wa'ãhã, aré da te ãma 're upai waihu'u za'ra mono õ di duré. Tane nherẽ, te tô dama 're hãimana, ãsimiroti na rob'ui'ére 'rada hã. Taha wa, da te 're waihu'u pese za'ra mono nherẽ, da te 're 'madã'ã pese za'ra mono õ wamhã, 'Re ãhãimana u'ãsi mono te te 're ãda'ahã za'ra mono zé, te wasu'u.

¹⁶ Tawamhã e marĩ hawi, ma tô 'Re ãhãimana u'ãsi mono hã Abra'ãhã ma ropisutu, ãsihudu norĩ ma ropibu ma. Abra'ã hã te te ãsazei pese zém hawi, ma tô tãma ropisutu. Te te tãma ãropisutuzé wa'rãmi, asa tãma ãsiwa'ãbãzéb zõ 're ãsimnhasi mono õ na, da te dasina 're ãwaihu'u pese za'ra mono zéb da hã, ma tô 'Re ãhãimana u'ãsi mono hã Abra'ã te te ãsazei pese zém hawip si, tãma ropisutu. E Mozési nhimi'ui'ére 'madã'ã'wa norĩ ma si, te 'Re ãhãimana u'ãsi mono nhimiropisutuzé hã tãma 're hãimana za'ra, zudezu norĩ te te

're ãsazei pese za'ra mono norĩ ma si. Mare di. Abra'ã hã, 'Re ãhãimana u'ãsi mono si te te sina ã'umnhasi ne, uburé 're ãdahãimana za'ra mono norĩ ma zama, te tãma 're hãimana za'ra, 'Re ãhãimana u'ãsi mono nhimiropisutuzé hã. E marĩ wa. Abra'ã hã uburé wahi'rata wa, uburé wasiré ãsazei'wa norĩ hi'rata wa. 17 Duréihã ni'wa hã ma tô ãne na 'Re ãhãimana u'ãsi mono mreme na rob'ui'ééré, Abra'ãhã ãma hã:

“Wa hã wa tô aipisutu, daro mono bã da te dasina 're ã'umnhasi za'ra mono norĩ hi'rata na, da te 're asisi za'ra mono da.”

Ãne ma tô 'Re ãhãimana u'ãsi mono nhimipisutuzém na ãma rob'ui'ééré. 'Re ãhãimana u'ãsi mono nhimiropisutuzé hã, tô sena. Pire uptabi di. E marĩ wa. Ô hã tô sena, 're hãimana mono wa. Taha si, ma tô Abra'ã hã te te sina 're umnhasi u'ãsi. Taha si, 're dadã'ã za'ra mono nheré, dahãiwa'utu'wa hã te 're hãimana. Taha si marĩ ô ré, Ropoto mono 'wa hã. 18-19 Duréihã Abra'ã hã 100 na ãma ãwahubzéb u hã romhutu na ma tô 'Re ãhãimana u'ãsi mono hã tãma ropisutu, ãne: “Asihudu sidãpãsi, da'ahã uptabi di za.” Ãne rob'ui'ééré 'rata na ãwasu'u hã. Abra'ã hã romhutu na ma tô tidã'ázé hã sina waihu'u, ãhãiba sib'uware na hã oto. Timro zama ma duré waihu'u, 'ra waihu'u ô na, Sara hã. Tane nheré, siptete sina ma tô 'Re ãhãimana u'ãsi mono si saze, za ã'ra te te tãma ãsõmrizém na hã. Te te 're wawãi mono ãna, te sô 're simipari u'ãsi, 'Re ãhãimana u'ãsi mono nhimiropisutuzéb zô hã, marĩ hã tãma hãimana ô nheré, sô 're ãsimipari mono zéb da hã. Taha wa, ma tô 'Re ãhãimana u'ãsi mono hã pisutu, daro mono bã da te 're ãsazei pese za'ra mono norĩ hi'rata na, da te 're sisi za'ra mono da. 20 'Re ãhãimana u'ãsi mono te te tãma ãropisutuzém na hã te te ãma wawãi ô di. ãmreme hã te te ãsazei pese zéb zarina, ma tô siptete uptabi na 're hãimana. Te duré ãma 're wata u'ãsi. 21 'Re ãhãimana u'ãsi mono te te tãma ãropisutuzé hã za te te tãma ãma ãuwaimramizéb zô, te te 're sazei pese u'ãsi. Te te sazei utõrĩ ô di, Abra'ã hã. 22 Taha wa, te te ãsazei pese na ma tô sima ãma roti 'Re ãhãimana u'ãsi mono hã, ãwasédé hã te te oto ãma 're 'madã'ã mono tã da, taha zarina te te wësãmri da, duré po're'õ nheré, za te te azãri tã da, dame. 23 Duréihã rob'ui'ééré 'rata na Abra'ãhã wasu'u hã, 'Re ãhãimana u'ãsi mono te te ãwësãmrizém na hã, taha wasu'u si ô di. 24 Wa norĩ zama, wa te wasina 're ã'umnhasi za'ra mono norĩ hã te za duré te te 're wa'awësãmri, Wanhib'apito Zezusihi hãiwa'utu'wa, wa te wasina 're ã'umnhasi za'ra mono norĩ hã. 25 'Re ãhãimana u'ãsi mono hã ma tô Zezusi hã dama tisõ, da te dasiwi wĩrĩ da, wawasété na 're wanomro mono wa. Ma tô duré hãiwa'utu, taha na te te 're wa'awësãmri mono da, wawasédé hã te te oto wa'ãma 're ab'madã'ã tã mono da, 'Re ãhãimana u'ãsi mono hã.

Cristuhu zazei'wa, toi u'âsi 're ïnomro mono zé wasu'u

5 ¹Wanhib'apito Zezu Cristu hã ma tô wazada tidâ'â za'ra, wa'upana. Taha wa, 'Re ïhâimana u'âsi mono hã ma tô te te sima wa'âma 're aroti, wa te 're ïsazei pese za'ra mono na, wawasédé hã te te oto wa'âma 're ab'madâ'â tō mono da, taha zarina si te te duré 're wa'awēsāmri mono da, wawasété na 're wanomro mono nherē, te te 're wa'ahâ za'ra mono tō da. Taha wa, rowē u'âsi, wa oto âma 're wanomro, 'Re ïhâimana u'âsi mono âma hã. ²Zezusi hã wa te wasina 're umnhasi za'ra mono wa, te 'Re ïhâimana u'âsi mono hã ïwē si te te wama 're ab'madâ'â. Taha na si, wa oto wa norī hã 're wahâimana za'ra. Niwapsi te za 'Re ïhâimana u'âsi mono hã te te wama 're apisutu, ïwaih'u'u pese zarina ïhâiba na rowa'a za'ētē na ïsiré 're wahâimana u'âsi za'ra mono da, rowē uptabi na. Taha wa, wato sina, wa sô 're wanhimipari za'ra, wa te 're sazei utōrī za'ra mono âna. ³Duré Cristuhu zazei'wa, 're wanomro mono 'ru te, da te wama 're rob'manharī za'ra mono wa, wa te 're robzépata za'ra mono ré, wa watoi u'âsi 're wahâimana za'ra ône haré, wa te 're ïrobzépata za'ra mono zéb zarina, ôhō âma si wanhiptete sina 're ïwahâimana za'ra mono zéb da hã, wa te wasima âma 're sa'ētē za'ra mono wa. Âne hã wa te wasina 're waihu'u'u pese za'ra mono wa, wa za watoi u'âsi 're wahâimana za'ra. ⁴Tawamhã wanhiptete sina, âma 're ïwahâimana za'ra mono zéb da hã, wa te tâma âma 're uwaimrami za'ra mono wamhã, te za 'Re ïhâimana u'âsi mono hã wa'âma 're wata za'ra. Tawamhã wa'âma 're ïwata za'ra mono zém na, wa te wasina 're waihu'u'u za'ra mono wamhã, marī te te wama 're ï'apisutu mono zéb zô, wa te 're wawã za'ra mono âna, wa za wasina 're wanhimipari u'âsi za'ra. ⁵Âne zô si 're wanhimipari za'ra mono wamhã, taré sô 're wanhimipari za'ra mono ô di za. Taré, wa te wasina 're umnhasi baba za'ra mono ô di za. E marī wa. 'Re ïhâimana u'âsi mono hã Tip'ēzani te te wama 're ï'anhomri mono na, tinhimizawi pese zé hã te te wama 're awaihu'u'u mono wa, taré, wa te wasina 're umnhasi baba za'ra mono ô di za. Taha wa, taré sô 're wanhimipari za'ra mono ô di za, marī ïwē hã te te wama 're ï'apisutu mono zô hã.

⁶Duréhã 're ïdahâimana za'ra mono na'rata zém hawimhã, marī da te 're ï'manharī wē za'ra mono zém na hã 'Re ïhâimana u'âsi mono te te da'âma sima 're aroti mono ô di, taha zarina dawasédé hã te te oto da'âma 're ab'madâ'â tō mono da, duré dapo're'ô nherē, te te 're da'ahâ za'ra tō mono da. Ta hawim haré, dahâimana wē zém na 'râwi 're dasi'madâ'â waihu'u'u za'ra mono ô di, dawasédé hã te te da'âma 're ï'ab'madâ'â mono ô zarina, te te 're ïda'awēsāmri mono zéb da hã, 'Re ïhâimana u'âsi mono hã. Taha ré, ma tô Cristu hã dazada dêrâ, uburé dawasété na 're ïdahâimana za'ra mono norī

zada, 'Re ìhâimana u'âsi mono, bådâ te te ãma ìpisutuzé hã ìwa ìwaptã'ázém na. **7** Ni'wa hã uburé danhimiroti wẽ hã te te 're 'madââ pese mono nherẽ, taha upana ìda'matââ da hã, mare di. Ni'wa hã da'ãma 're ìsiwamri mono, 're 'maihâimana mono wamhã, taha upana si ìda'matââ da hã, áté te za 're si'madââ za'ra. **8** Tanei õ di, 'Re ìhâimana u'âsi mono nhimizawizé hã. Wa norĩ hã wawasété na 're wahâimana za'ra mono nherẽ, ma tô Cristu hã pisutu, wazada dââ da, wa'upana. ãne hã ma tô 'Re ìhâimana u'âsi mono hã te te wama 're awaihu'u, te te 're ìwa'azawi pese mono zém na hã. **9** Zezusi wazada ìdâ'ázém na, ma tô 'Re ìhâimana u'âsi mono hã te te 're wa'awêsãmri, wawasédé hã te te oto wa'ãma 're ì'ab'madââ mono õ zarina. ãne wa, te za duré Zezusi hã tidâ'ázém na te te 're wa'anho'reptu, 'Re ìhâimana u'âsi mono nhimiházé wi, ro hã za ìsi'utõrĩzéb ãma hã. **10** 'Re ìhâimana u'âsi mono nhitob'ru, wa aré 're wanomro. Tane nherẽ, ti'ra dâ'ázém na ma tô wa'ãma 're siwadi za'ra oto. Tawamhã ìsiwadi oto 're wahâimana za'ra mono wa, te za tô oto Zezusi hã te te 're wa'anho'reptu, dââ nherẽ, apâ hãiwa'utu wa, dââ ãna 're hâimana u'âsi mono wa za oto. **11** Tane nherẽ, taha si õ di. 'Re ìhâimana u'âsi mono ãma, wa duré watoi u'âsi 're wahâimana za'ra, Wanhib'apito Zezu Cristu dâ'ázém na, wa'ãma 're siwadi za'ra mono wa oto.

Adãhã wasu'u, Cristuhu wasu'u me

12 Tawamhã e ma hawi, ma tô dawasédé hã tinhana'rata. Adã hã ma tô duréihã tiwasété 'rata. Ta hawimhã ma tô dawasédé hã te te ropé, uburé dapoto mono bâ. Ta hawim haré, te aihĩni 're dadââ u'âsi za'ra, dawasété na 're danomro mono wa. **13-15** Dawasété ãna 're ìdahâimana za'ra mono zéb da, 'Re ìhâimana u'âsi mono nhimiroti hã dama 're hâimana za'ra mono õ nherẽ, dawasédé hã te te da'ãma 're aza'ra mono õ di, 'Re ìhâimana u'âsi mono hã. Tane nherẽ, duréihã Mozésihi ma, tinhimiroti hã te te waihu'u õ ré, duré te te rob'ui'ére õ ré, te dawasété na si 're dahâimana u'âsi za'ra. Ìsimiroti na rob'ui'ére hã dama 're hâimana za'ra mono õ nherẽ, dawasété na si 're dahâimana za'ra mono wa, ma tô Adãhã wasété na'rata hawim haré 're dadââ u'âsi za'ra, 'Re ìhâimana u'âsi mono nhimiroti hã dapẽ 're, dama 're hâimana za'ra mono nherẽ, da te dasina tãma ãma 're uwaimrami za'ra mono õ wa. Mozésihi ma, za oto 'Re ìhâimana u'âsi mono, tinhimiroti te te ìwaihu'uzéb u hã, dawasété na si 're danomro u'âsi mono wa, ma tô 're dadââ u'âsi za'ra. Adãhã wi, 'Re ìhâimana u'âsi mono, rob'rã te te sawi nherẽ, te te sadawa 'madââ ãna, ma tô tiwasédé hã 'manha. ãne hã Adãhã wasété ne, aiwa da te 're 'manharĩ za'ra mono õ nherẽ, ma tô aihĩni 're dadââ u'âsi za'ra, 'Re ìhâimana u'âsi mono te te dama ìrotizé hã, sõ'awi dama 're hâimana za'ra mono õ nherẽ.

Adã hã wasété na'rata wamhã, ma tô ïpire uptabi hã 'manha, tiwasédé hã. Taha uirĩ na si, ma tô Zezusi hã marĩ ïpire uptabi hã 'manha duré ïwê hã, ti'ai ãma 're morĩ ré. Taha wa, Zezusihi ne Adã hã, marĩ ïsine ïpire hã te te 'manharĩ wa. Tane nherê, aiwab ô di, ïsimi'manharizé hã. 'Re ïhâimana u'âsi mono hã ïwê te te dama 're ï'anhomri mono hã, Adãhã wasété nei ô di. Adã hã tiwasédé te te ï'manharizém hawi, ma tô oto uburé 're dadâ'â u'âsi za'ra, tô sena. Tane nherê, 'Re ïhâimana u'âsi mono hã ïwê hã te te dama 're ï'ab'manharĩ mono zé hã pire uptabi di, Adã hã tiwasédé te te ï'manharizém nhipai u. Wê uptabi di. E marĩ tawamhã, 'Re ïhâimana u'âsi mono, ïwê hã te te dama 're ï'ab'manharĩ mono zé hã. Zezusi hã sisawi ãna tihâiba na te te 're ïda'azawi pese mono na, ma tô te te dama 're ab'manharĩ wê, tinhoprubzéb zarina. **16** Adã hã tiwasédé te te ï'manharizém hawim haré, te dawasédé hã da te 're 'manharĩ u'âsi za'ra oto. Taha zarina, ma tô 'Re ïhâimana u'âsi mono hã te te siwi 're da'awê'ô pese, dawasédé hã te te da'ãma 're ï'awaihu'u mono zéb zarina. Tane nherê, ta hawim haré, dawasédé hã da te 're 'manharĩ u'âsi za'ra mono nherê, dama ïsôprubzém na te oto da'ahã na te te 're da'awêsãmri 'Re ïhâimana u'âsi mono hã, ï'ra dazada ïdâ'ázém na. ãne wa, 'Re ïhâimana u'âsi mono, dama 're ïsôpru mono zé hã, pire uptabi di, Adãhã nhimi'manharizé ma hã. **17** Tô sena aibã hã misi, tiwasédé te te ï'manharĩ na'rata hawi, ma tô oto 're dadâ'â u'âsi za'ra. Tane nherê, Zezu Cristu hã aibã misi nherê, ïsimi'manharizé hã pire uptabi di, aibã tiwasédé te te ï'manharĩ na'rata zém nhipai u. Wê uptabi di. 'Re ïhâimana u'âsi mono hã ïwê uptabi hã te te tâma 're ï'apisutu mono norĩ si, te za hâimana pire na ïsire 're hâimana u'âsi za'ra, tinhoprubzê hã te te tâma 're ï'anhomri mono norĩ si. ïsôprubzê hã te te 're ïda'awêsãmri mono zé, te wasu'u. Cristu ïdâ'ázém na te za hâimana pire na ïsire 're hâimana u'âsi za'ra.

18 Aibã hã misi tiwasédé hã te te ï'manharizém hawi, ma tô 'Re ïhâimana u'âsi mono hã uburé te te 're da'awê'ô pese, dawasédé hã te te da'ãma 're ï'awaihu'u mono zéb zarina. Tane, misi Zezusihi nhimi'manharĩ wê zém na, te za oto 'Re ïhâimana u'âsi mono hã te te 're da'anho'reptu, dapê'ê 're, dadâ'â u'âsi ne 're ïdanomro mono zém hawi, ï'rata 're dahâimana u'âsi za'ra mono da oto. **19** Aibã hã misi nherê, 'Re ïhâimana u'âsi mono te te ïwapari ô hawimhã, ma tô oto uburé dawasété na si 're dahâimana za'ra. Tane duré, aibã hã misi nherê, 'Re ïhâimana u'âsi mono te te ïwapari pese zém hawi te za oto 'Re ïhâimana u'âsi mono hã te te 're da'awêsãmri, Zezu Cristu te te ïwapari pese zém hawimhã.

20 Durêihã 'Re ïhâimana u'âsi mono hã ma tô Mozésihi ma tinhimiroti hã waihu'u, te te ãma rob'ui'ére da, ãma 're dasipo're

pu'u za'ra mono wa, dawasédé hã da te oto dasina 're waihu'u za'ra mono da. Tane nherê, ma tô dawasédé hã da te dasima 're sa'êtê u'âsi za'ra. Tane nherê, dawasédé da te dasima 're isa'êtê za'ra mono zém nhipai u, ma tô 'Re îhâimana u'âsi mono hã te te dama 're arob'manharĩ wê, da'âma 're îsiwamri u'âsi mono zéb zarina. ²¹ ãne na rowasu'u na, wa za oto aima 'rãsutu za'ra wa'wa. Dawasété na si 're danomro u'âsi mono wa, ma tô aré dapê'ê 'remhã, dadâ'â ne 're dahâimana u'âsi za'ra, 'Re îhâimana u'âsi mono nhiti. Tane nherê, tinhimizawi pese zéb zarina, ma tô 'Re îhâimana u'âsi mono hã Wanhib'apito Zezu Cristu dâ'âzéb zarina te te sima 're wa'awê, taha zarina si rowê uptabi na 're wanomro u'âsi mono da oto.

'Re îdanomro mono zép té wasu'u

6 ¹ 'Re îhâimana u'âsi mono hã, simizawi pese uptabi di. Te wa'âma 're pê'êzê u'âsi. Taha wa, wawasédé hã wa te 're 'manharĩ za'ra mono nherê, tinhimizawizé hã te te wawi 're azawi mono õ di. Wawasédé, wa te 're î'manharĩ za'ra mono zé hã, te duré te te wama 're apari. E tawamhã, wawasédé, wa te 're î'manharĩ za'ra mono zé hã te te wama 're apari mono nherê, wa za wawasédé hã duré apâ wa te 're 'manharĩ u'âsi za'ra, apâ te te duré wama 're apari zahu mono da. E taha da, wa za wawasété u'âsi 're wahâimana za'ra. ² Mare di. 'Re dadâ'â za'ra mono wa, marĩ zô, da te oto 're îrob'ruiwapari za'ra mono õ ne, wa norĩ hã wawasété zô, wa te oto 're rob'ruiwapari za'ra mono õ di za. Taha wa, wawasédé hã wa te duré 're 'manharĩ zahu za'ra mono õ di za oto. ³ Wa norĩ hã â dawabzuri, wa te 're 'manharĩ za'ra mono wamhã, Cristu Zezusihi siré, 'râwi oto 're îwanomro mono zé, te wasu'u, simisutu. Îsiré oto 're îwanomro mono ne, wa tô duré îsiré 're wadâ'â za'ra, simisutu. ãne hã aima waihu'u pese za'ra wa'aba di. ⁴ Tawamhã, â dawabzuri hã oto wa te 're 'manharĩ za'ra mono wamhã, â da te 're îwanhamra mono zé, Cristuhu siré 're îwadâ'â za'ra mono zé, te wa'âma simir'é. Ab're 're, îsiré da te 're îwanheme mono zéb zama, te wasu'u. E marĩ da, wa tô Zezusihi siré 're wadâ'â za'ra. Cristu hã dâ'â nherê, ãmama hã tiwaihu'u pese na te te îhâiwa'utu ne, 're îwanomro mono zép tém na si, oto 're îwahâimana za'ra mono zéb da hã, wa tô îsiré 're wadâ'â za'ra, wa norĩ hã. ãne wa'âma îsimir'ézé hã.

⁵ Wa norĩ hã Cristuhu siré, wa tô 're wadâ'â za'ra, wawasété zô, wa te oto 're rob'ruiwapari za'ra mono õ wa, 're dadâ'â za'ra mono wa, marĩ zô, da te oto 're îrob'ruiwapari za'ra mono õ ne. ãne hã simisutu ma tô 'Re îhâimana u'âsi mono hã wahâiba na atob za'ra, Cristuhu tême. Duré Cristu hã dâ'â uptabi nherê, ãmama te te îhâiwa'utu ne, te za duré wa norĩ hã te te 're wa'ahâiwa'utu. Taha na te za duré Cristuhu tême wahâiba na atob za'ra, 'Re îhâimana

u'âsi mono hã. **6** Wawasété na 're iwanomro 'rata mono zé hã, tâibâ oto. Cristu hã wedepo'o nnonhi'rãmi na idâ'â ne, ma tô 'Re ihâimana u'âsi mono hã te te wama 're a'uprosi, 're iwanomro 'rata mono zé hã. Marĩ iwasétére si, wa te wasima 're i'ruiwapari u'âsi za'ra mono zém hawi, te te 're wa'anho'reptui mono da, ma tô te te wama 're a'uprosi, 're iwanomro 'rata mono zé hã. Wawasédé hã wa te 're sahâri waihu'u za'ra mono ãna, 're wanomro mono tã da, ma tô te te wama 're a'uprosi. ãne hã wama waihu'u pese za'ra di. **7** 'Re dadâ'â za'ra mono wamhã, dawasédé hã da te 're 'manharĩ waihu'u za'ra mono õ di oto. Tane, 're idâ'â za'ra mono norĩ ne, Cristuhu siré 're wadâ'â za'ra mono wa, wawasédé hã wa te 're 'manharĩ u'âsi za'ra mono õ di za oto. **8** Taha wa, Cristuhu siré 're wadâ'â za'ra mono wa, wa za wa te wasina 're waihu'u pese za'ra tô sena na, za isine 're iwahâiwa'utu za'ra mono zéb da hã, duré isiré za 're iwahâimana u'âsi za'ra mono zém na hã. **9** ãne na, wa tô duré wasina waihu'u pese za'ra ni. Cristu hã dâ'â uptabi nherẽ, 'Re ihâimana u'âsi mono te te hâiwa'utu wa, taha wa, niwamhã tidâ'â na te te sahu õ di za, idâ'âzé hã sib'uware wa oto, Zezusih ma hã. **10** Dâ'â wamhã, misi haré ma tô dawasété nhipetezé hã uprosi. Taha wa, oto dâ'â parimhã, Timama ma, te oto 're hâimana u'âsi, Cristu hã. **11** Taha wa, te za ãne na asi'ãma 're irosa'rata za'ra wa'aba mo: "Re dadâ'â za'ra mono wa, marĩ zô, da te oto 're irob'ruiwapari za'ra mono õ ne, wawasété zô, wa te oto 're rob'ruiwapari za'ra mono õ di za, wa norĩ hã. 'Re ihâimana u'âsi mono ma, wa te oto 're iromhuri za'ra mono da si, wa za oto 're wahâimana za'ra. Cristu Zezusih ãma si, wa za oto 're wahâimana za'ra." ãne si te za asima ãma 're irosa'rata za'ra wa'aba mo.

12 Rãwi marĩ na asima 're irosa'rata wasété za'ra wa'aba mono zé hã 're madâ'â za'ra wa'aba mono tã da, te za aiwasété wi asina 're asiptete za'ra wa'aba mo, aipẽ'ẽ na. **13** Marĩ iwasédé hã 're 'manharĩ za'ra wa'aba mono tã da, te za aihâiba hã 're imadâ'â pese za'ra wa'aba mo, aihâiba hawim na marĩ 're 'manharĩ za'ra wa'aba mono tã da. 'Re atâ'â za'ra wa'aba mono wa, 'Re ihâimana u'âsi mono te te 're i'aihâiwa'utu za'ra wa'aba mono ne, te 're aihâimana za'ra wa'aba mo, 're anomro aba mono zép tém na hã. Taha wa, te za 'Re ihâimana u'âsi mono ma si, 're asisõmri za'ra wa'aba mo, misi haré. Taha ma si, te za aihâiba hã 're isõmri za'ra wa'aba mo õne haré, marĩ iwẽ si ãma 're imanharĩ za'ra wa'aba mono zéb da hã. **14** 'Re ihâimana u'âsi mono nhimiroti 'rata na rob'ui'ére hã asina tãma ãma 're i'uwaimrami za'ra wa'aba mono zéb zarina, aiwasédé hã te te oto ai'ãma 're ab'madâ'â aba mono tã da, 're asi'madâ'â za'ra wa'aba mono õ di za. Tinhimizawi pese zém na si, ma tô 'Re ihâimana u'âsi mono hã ai'ãma 're pẽ'ézé za'ra wa'wa, aiwasété na

're aihâimana za'ra wa'aba mono nherê. Taha zarina si, ma tô te te 're aiwêsâmri za'ra wa'wa. Taha wa, te za aiwasété wi asina 're asiptete u'âsi za'ra wa'aba mo oto.

'Re ãhâimana u'âsi mono ma, 're ãdasisômri za'ra mono zé wasu'u

15 Tawamhã átê ãne te za asima 're ãnharĩ za'ra wa'aba mo: “Re ãhâimana u'âsi mono nhimiroti na Mozési te te ãrob'ui'érezé hã wa te 're ãmadâhã pese za'ra mono zéb zarina, te te sima wa'ãma 're aroti mono õ di, taha zarina wawasédé hã te te oto wa'ãma 're ab'madâhã tã mono da, taha zarina te te 're wa'awêsâmri mono da. Tinhimizawi pese zéb zarina si, ma tô te te 're wa'awêsâmri, wawasété na 're wahâimana za'ra mono nherê, wa'ãma 're pê'ézé za'ra mono wa. Taha wa, wa za wawasédé hã duré apã wa te 're 'manharĩ u'âsi za'ra õne u'ã, 'Re ãhâimana u'âsi mono hã dawasété nherê, simizawi pese wa.” ãne na asima 're rosa'rata za'ra wa'aba mono õ di za. Tô'ã. 16 A norĩ wa'wa hã dama 're romhuri za'ra wa'aba mono da, aihâiba hã dama 're sômri za'ra wa'aba mono wamhã, taha nhimiwada'uri na si, te za tô 're aihâimana za'ra wa'aba mo. ãne hã aima waihu'u pese za'ra wa'aba di. Tane, aihâiba hã aiwasété ma, 're sômri za'ra wa'aba mono wamhã, te za tô ãma 're asiwasété za'ra wa'aba mo. Taha zarina te za atãhã u'âsi ne, 're aihâimana za'ra wa'aba mo, aipê'ê 're, 'Re ãhâimana u'âsi mono nhiti. Tane nherê, 'Re ãhâimana u'âsi mono ma, aihâiba hã 're sômri za'ra wa'aba mono wamhã, taha nhimiwada'uri na si te za 're aihâimana za'ra wa'aba mo. Tawapsi te za oto te te 're aiwêsâmri za'ra wa'wa. 17 Aiwasété na si, ma tô aré 're aihâimana u'âsi za'ra wa'aba mo, 're saharĩ waihu'u za'ra wa'aba mono ãna. Tane nherê, ãne 're aihâimana za'ra wa'aba mono õ di oto. 'Re ãhâimana u'âsi mono te te aima 're ãroti za'ra wa'aba mono zép si, te oto 're ãmadâhã pese za'ra wa'aba mo. Taha wa, 'Re ãhâimana u'âsi mono ãma si, wa za 're wawata za'ra. 18 'Re ãhâimana u'âsi mono hã tinhiptetezé hã ma tô te te aima 're sômri za'ra wa'wa, aiwasété ãna oto ãma 're anomro aba mono da. Ma tô duré aima si'apito za'ra wa'wa, aiwê na si oto tãma 're aihâimana za'ra wa'aba mono da. 19 'Re ãdahâimana za'ra mono zém na, wa tô aima ãma romnhimiréé za'ra wa'wa, ãnhimirowasu'u na hã asi'uihã na sada asimirosa'rata nhiptete waihu'u za'ra wa'aba õ wa. Aihâiba hã aiwasété ma, ma tô 're ãsômri za'ra wa'aba mo aré, taha na si 're aihâimana za'ra wa'aba mono da, aihâiba na asina 're aiwasété za'ra wa'aba mono da. Tane nherê, aihâiba hã 'Re ãhâimana u'âsi mono ma si, te za oto 're ãsômri za'ra wa'aba mo, taha nhimiroti na si oto 're aihâimana za'ra wa'aba mono da, aihâimana wê uptabi na.

20 Aiwasédé hã 're saharĩ waihu'u za'ra wa'aba mono ãna, 're aihâimana za'ra wa'aba mono ré, 'Re ãhâimana u'âsi mono te te

aima 're ĩroti za'ra wa'aba mono zéb zarina 're aihâimana za'ra wa'aba mono õ di aré. ²¹ Aiwasété na si 're aihâimana za'ra wa'aba mono ré, e marĩ ma tô aima 're hâimana za'ra wa'wa, 're ĩmanharĩ za'ra wa'aba mono zé wa'rãmimhã, ãma aima 're ĩrowê za'ra wa'aba mono zéb da hã. Robaba di. Taha na asimi'manharĩ wasété za'ra wa'aba zém na ãma 're aséb za'ra wa'aba mono di oto. ãne si, da te 're 'manharĩ u'âsi za'ra mono wamhã, dapẽ'ẽ 're, dadâ'â u'âsi ne, te za tô 're dahâimana za'ra. ²² Tane nherẽ, 'Re ĩhâimana u'âsi mono hã tinhiptetezé hã ma tô te te aima 're sômri za'ra wa'wa oto, aiwasété ãna ãma 're anomro aba mono da oto. Ma tô duré aima si'apito za'ra wa'wa, taha ma si oto 're romhuri za'ra wa'aba mono da. Taha wa, ma tô, tiwi 're asisawi za'ra wa'aba mono ãna, aihâiba hã tâma 're ĩsômri za'ra wa'aba mo. Taha wa'rãmi te za rowê uptabi na ĩrata 're aihâimana u'âsi za'ra wa'aba mono zé hã te te aima 're apisutu 'wa oto. ²³ Dawasété na si 're ĩdanomro mono zé wa'rãmi, te za dadâ'â u'âsi ne 're dahâimana za'ra dapẽ'ẽ 're, 'Re ĩhâimana u'âsi mono nhiti. Wanhib'apito Cristu Zezusihi ãma si 're danomro mono wapsi, te za 'Re ĩhâimana u'âsi mono hã sôpru wa, te te dama 're apisutu, ĩrata 're ĩdahâimana u'âsi za'ra mono zéb da hã, asa tâma 're ĩdasiwa'âbã za'ra mono zéb zô, sina 're simnhasi mono ãna.

Ĩmro'õ norĩ mrozém na rowasu'u na ĩsimiré

7 ¹ ĩsisãnawã norĩ, 'Re ĩhâimana u'âsi mono nhimiroti 'rata na rob'ui'ére hã aima waihu'u pese za'ra wa'aba di. Taha wa, ãhãna ĩnhimi'ui'ére na te aima ĩrowasu'u za'ra wa'aba zé hã, aima waihu'u pese za'ra wa'aba di za duré. Ni'wa hã ti'ai ãma 're hâimana mono ré, te za 'Re ĩhâimana u'âsi mono nhimiroti hã pire na tâma 're hâimana, ti'ab ré 're ĩdanomro mono zém na roti hã. Tane nherẽ, dâ'â wamhã oto, tâma 're hâimana mono õ di za oto, ĩsarina 're ĩhâimana mono zéb da hã. E marĩ wa. Tô oto dâ'â wa. ² ãne na wa za aima romnhimiré'é za'ra wa'wa. Pi'õ norĩ hã ĩmro hã tiwi 're dâ'â za'ra mono õ ré, 'Re ĩhâimana u'âsi mono nhimiroti 'madâ'â sina, te te 're rême waihu'u za'ra mono õ di za. ĩmro tiwi 're dâ'â za'ra mono wapsi, te za oto 're mro za'ra, 'Re ĩhâimana u'âsi mono nhimiroti zarina, aimawi aibã na, pi'õi wi ĩmro 're dâ'â za'ra mono wa, timro na te te 're sahu tõe za'ra mono da, te te ãma roti õ wa, 'Re ĩhâimana u'âsi mono hã. ³ Tane nherẽ, pi'õ norĩ hã ĩmro hã tiwi 're dâ'â za'ra mono õ nherẽ, aibã aimawi ré 're hâimana za'ra mono wamhã, 'Re ĩhâimana u'âsi mono nhimiroti zarina 're hâimana za'ra mono õ wa, te za ĩpo're'õ hã da te ãma 're sa'ra, pi'õ norĩ ãma hã, tihâiba na tiwasédé te te 're 'manharĩ za'ra mono wa. ĩmro tiwi 're dâ'â za'ra mono wapsi, te za oto 're mro za'ra, aibã aimawi na. Tawapsi tihâiba na tiwasédé hã te te 're 'manharĩ za'ra mono õ di za, apã 're

mro za'ra mono wa. Āne hã aima waihu'u pese za'ra wa'aba di. ⁴ Īsisānawã norĩ, tane duré, a norĩ wa'wa hã. Cristu hã wedepo'o nhonhi'rãmi na asada dâ'â za'ra wa'aba wa, ma tô ĩsiré 're atâ'â za'ra wa'aba mo. Taha wa, 'Re ĩhâimana u'âsi mono nhimiroti 'rata na rob'ui'ééré hã asina tãma ãma 're ĩuwaimrami za'ra wa'aba mono zéb zarina, aiwasédé hã te te oto ai'ãma 're ab'madâ'â aba mono tō da, 're asi'madâ'â za'ra wa'aba mono õ di za. Tâibâ oto. 'Re ĩhâimana u'âsi mono te te ĩhâiwa'utu nhib'a'uwē si, wa oto 're wanomro, taha ma si, wa te oto 're romhuri za'ra mono da, ĩwē na si. Pi'õi wi, ĩmro tiwi 're dâ'â za'ra mono wamhã, ĩsimiroti hã te te 're wapari za'ra mono õ di za oto. 'Re mro zahu za'ra mono wapsi, te za duré timro tém nhimiroti hã te te 're 'madâ'â pese za'ra. Tane hã 'Re ĩhâimana u'âsi mono nhimiroti 'rata na rob'ui'ééré hã asina tãma ãma 're ĩuwaimrami za'ra wa'aba mono zéb zarina, 'Re ĩhâimana u'âsi mono, aiwasédé hã te te oto ai'ãma 're ab'madâ'â aba mono tō da, 're asi'madâ'â za'ra wa'aba mono õ di za oto, pi'õi wi ĩmro 're dâ'â za'ra mono wa, ĩsimiroti te te oto 're ĩ'madâ'â za'ra mono õ ne hã. Tâibâ oto. Cristuhu ãma si, te za oto 're anomro aba mo, pi'õ hã apã 're ĩmro zahu za'ra mono norĩ, timro tém nhimiroti te te 're ĩwapari pese za'ra mono ne. ⁵ Wahâimana wasété na 're wahâimana za'ra mono ré, wa tô marĩ ĩwasété zô si, wa te 're rob'ruiwapari za'ra aré. Taha ré, 'Re ĩhâimana u'âsi mono nhimiroti 'rata na rob'ui'éérézê hã, wawasété ãna 're ĩwanomro mono zé waihu'uzéb da, wama 're hâimana za'ra mono nherē, duré wama waihu'u pese za'ra nherē, taha upana si, wa tô marĩ ĩwasété zô si, wa te 're rob'ruiwapari za'ra, tô õhõ zô si, 'Re ĩhâimana u'âsi mono te te wawi 're ĩ'azawi mono zô si. Taha zarina wa tô aré wapē'ē 're, wadâ'â u'âsi ne 're wahâimana za'ra, 'Re ĩhâimana u'âsi mono nhiti. ⁶ Tane nherē, 'Re ĩhâimana u'âsi mono hã ma tô te te wama 're apisutu oto, ĩsimiroti na rob'ui'ééré 'rada hã wa te wasina tãma ãma 're ĩuwaimrami za'ra mono zéb zarina, wawasédé hã te te wa'ãma 're ĩ'ab'madâ'â mono zéb da, 're wasi'madâ'â za'ra mono tō da oto. ĩsimiroti na rob'ui'ééré 'rada hã wa te wasina tãma ãma 're ĩuwaimrami za'ra mono zéb zarina, te te 're ĩwa'anho'reptui mono zéb zô, 're wanhopré mono sina, wa te oto tãma 're romhuri za'ra mono õ di, 're ĩwahâimana 'rata za'ra mono zém na hã. Īpē'ēzani hã te te wama 're ĩ'aroti mono zéb zarina si, wa oto wa te tãma 're romhuri za'ra, wahâimanazép tém na si.

'Re ĩhâimana u'âsi mono nhimiroti, da te oto ĩwaihu'u za'ra zéb zarina, dawasété na 're ĩdasiwaihu'u za'ra mono zé wasu'u

⁷ Tawamhã e 'Re ĩhâimana u'âsi mono nhimiroti 'rata na rob'ui'ééré hã wasété di, Mozési te te ãma ĩrob'ui'ééré na hã. Mare di. Wasété õ di. Āhã wasu'u hawi, wa tô wa hã ĩwasété na ĩsiwaihu'u, 'rãwi. Āne,

'Re ihâimana u'âsi mono nhimiroti 'rata wasu'u hã: "Marĩ ïwê hã dawĩ 're 'ruiwapari za'ra wa'aba mono õ di za." Æne hã te waihu'u õ 'wa'âhã, aré ïwasété na ïsiwaihu'u õ di, marĩ te ïsima ï'ruiwaparizém na hã. ⁸ Æhã wasu'u na te oto waihu'u wamhã, marĩ hã te dawĩ 're ï'ruiwapari mono zéb da si, wa tô te ïsima 're rosa'rata u'âsi, 're ihâimana wasété mono zéb zarina. 'Re ihâimana u'âsi mono nhimiroti 'rata na rob'ui'ére hã dama waihu'u za'ra õ wa, dawasété na 're dasisãmri waihu'u za'ra mono õ di. Wa hã bété. 'Re ihâimana u'âsi mono nhimiroti 'rata wasu'uzéb zarina si, wa tô ïsiwaihu'u, ïwasété na hã. ⁹⁻¹⁰ Duréihã 'Re ihâimana u'âsi mono nhimiroti 'rata na rowasu'u hã te waihu'u õ nherê, wa tô aré ïsi'âma rosa'rata na te 're upa. ïwasété na 're ïsi'madâ'â mono ãna, wa tô 're ihâimana. Tane nherê, ïsimiroti 'rata na rob'ui'ére wasu'u hã te oto waihu'u wamhã, ãne na te oto ïsi'âma 're rosa'rata mono õ di. 'Re ihâimana u'âsi mono ma, ïwasété na aré 're ihâimana mono zém na hã wa tô ïsi'âma waihu'u. ïdâ'â u'âsi, wa tô aré 're ihâimana, ïpê'ê 're. 'Re ihâimana u'âsi mono hã ma tô tinhimiroti 'rata na rob'ui'ére hã wama sômri za'ra, wa te wasina tâma 're ï'uwaimrami za'ra mono zéb zarina, rowê uptabi na ãma 're wanomro wê mono da. Tane nherê, te ïsina tâma uwaimrami õ di, wa hã. Taha wa, wa tô aré ïdâ'â u'âsi 're ihâimana u'âsi, 'Re ihâimana u'âsi mono nhiti. ¹¹ 'Re ihâimana u'âsi mono nhimiroti 'rata si te 're ï'madâ'â pese mono na, ïwasédé hã te te oto ï'âma 're 'madâ'â tã mono da, te te sima ï'âma roti da newa, wa tô aré ïnhimiza'rese ãna 're ihâimana. Taha zarina, wa tô aré ïpê'ê 're, ïdâ'â u'âsi 're ihâimana, 'Re ihâimana u'âsi mono nhiti.

¹² Tane nherê, ïsimiroti 'rata na Mozési te te ïrob'ui'ére hã wê uptabi di. ïsarina si te wama 're hâimana, ïwê uptabi si. ¹³ E tawamhã, 'Re ihâimana u'âsi mono nhimiroti 'rata na rob'ui'ére hã wê uptabi nherê, e taha zarina, wa tô aré ïpê'ê 're, ïdâ'â u'âsi 're ihâimana. Mare di. ïwasété na 're ihâimana 'rata mono zéb zarina si, wa tô aré ïdâ'â u'âsi 're ihâimana. Taha zarina, wa tô 're ihâimana wasété mono zém na ïsina waihu'u. Uburé marĩ ïwasédé hã da te 're ïmanharĩ za'ra mono zé hã ïwasété uptabi na wa tô duré waihu'u.

Paru hã 'rãwi tinhimirosa'rata wasété na ïsi'wapézé wasu'u

¹⁴ 'Re ihâimana u'âsi mono nhimiroti 'rata na Mozési te te ãma ïrob'ui'ére hã e ma hawimhã. ïpê'êzani hawip si. Tane nherê, ta hawimhã, wa hã 're ihâimana mono õ di. A'uwê hãiba na 're ïmorĩ wa, wa ihâimana nhib'uware na 're ihâimana, ïsi'uihã na ïsina ïnhiptete waihu'u õ na hã. 'Re ihâimana wasété mono zé ma si, wa ihãiba hã te 're sômri u'âsi. ¹⁵ ïnhimiza'rese ãna, wa duré 're ihâimana, ïwasédé hã te 're ïmanharĩ mono zém na, te ïsina waihu'u õ wa, 'rãwimhã. Uburé marĩ ïwê si te 're ab'madâ'â mono da nherê, taha

si te 're 'madââ mono õ di. Uburé marĩ hã te 're ab'manharĩ tõ mono da, te ãsiwi 're awẽ'õ mono nherẽ, wa tõ te te 're ab'manharĩ tõ, ãwẽ upana. **16** Uburé marĩ hã te 're ab'manharĩ tõ mono da, te ãsiwi 're awẽ'õ mono nherẽ, ãwẽ upana te 're ab'manharĩ mono wamhã, wa ãsina waihu'u, 'Re ãhãimana u'ãsi mono nhimiroti 'rata na rob'ui'éré, ãwẽ si 're ãhãimana mono na hã, ãsarina si. **17** Uburé marĩ ãwasédé hã te 're ab'manharĩ mono da, te ãsima 're awẽ mono õ nherẽ, ãwasédé hã ãpẽ'ẽ 're, ãma 're ãhãimana mono zéb zarina, wa te te 're ab'manharĩ u'ãsi tõ, te ãsiwi 're wẽ'õ waihu'u mono ãna. **18** Marĩ ãwẽ hã ãpẽ'ẽ 'remhã ãma 're hãimana mono õ di. ãne hã ãma waihu'u pese di. Uburé marĩ ãwẽ si te 're ab'manharĩ mono da, te ãsima 're awẽ mono nherẽ, te ãsina 're uwaimrami waihu'u mono õ di, ãsi'uihã na hã. **19** Uburé marĩ ãwẽ si te 're ab'madââ mono da nherẽ, taha si te 're 'madââ mono õ di. Taha upana, wa ãwasété si te 're ab'manharĩ, ãne hã te 're ab'manharĩ tõ mono da, te ãsiwi 're awẽ'õ mono nherẽ. **20** Uburé marĩ ãwasédé hã te ãsima 're awẽ'õ mono nherẽ, te 're ab'manharĩ mono wamhã, e ãsi'uihã na te ãsima ãwézéb zarina, wa te te 're ab'manharĩ. Mare di. ãwasédé hã ãpẽ'ẽ 're, ãma 're ãhãimana u'ãsi mono zéb zarina si, wa te te 're ab'manharĩ.

21 ãne hã wa tõ uburé ãsina waihu'u, 're ãhãimana mono zém na hã. Marĩ ãwẽ si te 're ab'manharĩ u'ãsi mono da, te ãsima 're wẽ mono nherẽ, wa ã'upana marĩ ãwasété zõ si 're ãsipizari, te ãsiwi 're awẽ'õ waihu'u mono ãna. **22** Wa hã 'Re ãhãimana u'ãsi mono nhimiroti wẽ wasu'u na hã 'rãwi wa tõ te ãsima 're wẽ u'ãsi, ãpẽ'ẽ 'remhã. **23** Tane nherẽ, aimawi 're ãhãimana mono zéb da hã, te ãma 're hãimana u'ãsi, ãpẽ'ẽ 'remhã, ãnhimirosa'rata wasédé hã. ãpẽ'ẽ 'remhã ãnhimirosa'rata wasédé hã duré ãnhimirosa'rata wẽ hã te 'rãwi nherẽ, 're si'wapé u'ãsi zahuré, ãwasédé hã te 're ãmanharĩ mono zéb da hã, duré te ãsima 're ãwẽ mono zéb zarina, ãwẽ hã te 're ãmanharĩ mono zéb da hã. Ni'wam norĩ hã danhimiwada'uri zarina si 're hãimana za'ra mono wamhã, marĩ hã te te sima 're ãwẽ za'ra mono zéb zarina, te te 're 'manharĩ waihu'u za'ra mono õ di. Tane duré, wa hã marĩ ãwẽ si te 're ab'manharĩ u'ãsi mono da, te ãsima 're wẽ mono nherẽ, marĩ ãwasédé hã ãpẽ'ẽ 'remhã ãma 're ãhãimana mono zarina, wa marĩ ãwasédé hã te 're ab'manharĩ tõ. **24-25** Wa hã ãwasété u'ãsi 're ãhãimana mono zém na, 'rãwi 're ãsipo're pu'u mono wa, wa 're ãsiwẽ'õ u'ãsi. 'Re ãhãimana u'ãsi mono nhimiroti zarina si 're ãhãimana u'ãsi mono da, te ãsima 're rosa'rata wẽ u'ãsi mono nherẽ aré, tane nherẽ, ãpẽ'ẽ 're, ãwasédé hã ãma 're ãhãimana u'ãsi mono zéb zarina si, wa 're ãhãimana u'ãsi tõ. E 'wa hã te za ãne wamhã, ãnho'reptu, ãpẽ'ẽ 're, ãdãâ u'ãsi 're ãhãimana mono zém hawimhã. 'Re ãhãimana u'ãsi mono si te za ãnho'reptu, ãdãâ u'ãsi 're ãhãimana mono zém hawi, Wanhib'apito Zezu

Cristuhu nhimipawaptobzéb zarina hã. Taha wa, wa oto taha ãma si 're ïwata u'âsi.

'Re ïhâimana u'âsi mono pê'êzani te te dama 're ï'awê mono zéb zarina si, 're ïdanomro wê mono zé wasu'u

8 ¹ Taha wa, Cristu Zezusihi ãma 're ïnomro mono norĩ hã, 'Re ïhâimana u'âsi mono te te siwi 're awê'õ mono õ di za oto. Taha zarina, te te hã za'ra õ di za. ² 'Re ïhâimana u'âsi mono pê'êzani hã ma tô te te 're wa'apisutu, Cristu Zezusihi ãma si 're wanomro wê u'âsi mono da. Taha zarina, ma tô ïwasété u'âsi 're ïhâimana mono nherê, ïnho'reptu, ïpê'ê 're, ïdâ'â u'âsi aré 're ïhâimana mono zém hawi. Tiwaihu'u pese na ma tô ãne hawi ïnho'reptu. ³ 'Re ïhâimana u'âsi mono nhimiroti 'rata na Mozési te te ïrob'ui'érezé hã wa te 're ï'madâ'â pese za'ra mono zéb zarina, te te sima wa'ãma 're aroti mono õ di za 'Re ïhâimana u'âsi mono hã, wawasédé hã te te oto wa'ãma 're ab'madâ'â tõ mono da, taha zarina te te oto 're wa'awêsãmri mono da. E marĩ wa. Wawasété u'âsi wahâimanazém hawi, wanhib'uware na 're wanomro u'âsi mono wa. Taha wa, wa te wasina 're uwaimrami waihu'u za'ra mono õ di, 'Re ïhâimana u'âsi mono nhimiroti 'rata na rob'ui'ére hã. Wawasété si, wa te 're ï'manharĩ za'ra mono zé hã ma tô te te siwi 're awê'õ pese, 'Re ïhâimana u'âsi mono hã. Taha wa, ma tô ti'ra hã we satõ ti'ai u, da'upana dazada dâ'â da, dawasété u'âsi 're ïdahâimana za'ra mono zém hawi, te te 're da'anho'reptui mono da. Ti'ai ãma dahâiba na ma tô 're mo, Cristu hã. Tane nherê, dasine ti'ai ãma hã tiwasédé hã te te 're ab'manharĩ mono õ di, tihâiba na hã. ⁴ ãne ma tô 'Re ïhâimana u'âsi mono hã 'manha, ïsimiroti na rob'ui'ére hã wa te wasina 're ïuwaimrami za'ra mono zéb da hã, ïpê'êzani, wa te 're ï'madâ'â pese za'ra mono zéb zarina, wapê'ê 're wanhimirosa'rata wasété na 're wahâimana za'ra mono õ wamhã. ⁵ Ni'wam norĩ hã 're ïhâimana wasété za'ra mono ma si, tihâiba te te 're ïsõmri u'âsi za'ra mono norĩ hã ta norĩ hã te siwa'ru râwi te te sima 're ïwê za'ra mono zéb zarina si, te te 're rosa'rata wasété u'âsi za'ra. Tane nherê, ni'wam norĩ hã 'Re ïhâimana u'âsi mono pê'êzani nhimiroti zarina si 're ïhâimana za'ra mono norĩ hã, ta norĩ si te te sima 're rosa'rata wê u'âsi za'ra, ïpê'êzani te te tãma 're ïwê za'ra mono zéb zarina si. ⁶ Ni'wam norĩ hã tihâimana wasété ma si, tihâiba te te 're sõmri u'âsi za'ra mono wamhã, ta norĩ hã te za tipê'ê 're, dâ'â u'âsi 're hâimana za'ra, 'Re ïhâimana u'âsi mono nhiti. Tane nherê, ni'wam norĩ hã 'Re ïhâimana u'âsi mono pê'êzani te te tãma 're ïwê za'ra mono zéb zarina si, 're hâimana wê za'ra mono wamhã, ta norĩ si te za 'Re ïhâimana u'âsi mono 'rata 're hâimana u'âsi za'ra, robzei u'âsi na. ⁷ Ni'wam norĩ hã siwa'ru râwi te te sima 're ïwê za'ra mono zéb

zarina si, te te 're rosa'rata wasété u'âsi za'ra mono wamhã, ta norĩ hã te za 'Re ãhãimana u'âsi mono nhitob'ru 're hãimana za'ra. Ta norĩ hã 'Re ãhãimana u'âsi mono nhimiroti te te 're 'madã'ã za'ra mono õ di. Te te 're 'madã'ã waihu'u za'ra mono õ di, tô. **8** Ni'wam norĩ hã tihãimana wasété ma, tihãiba te te 're sãmri u'âsi za'ra mono wamhã, ta norĩ ma, 'Re ãhãimana u'âsi mono hã tãma 're toi waihu'u za'ra mono õ di za.

9 Tane nherẽ, a norĩ wa'wa hã aipẽ'ẽ 're, aiwasédé hã aima 're ãhãimana za'ra wa'aba mono zéb zarina, 're anomro aba mono õ di oto. 'Re ãhãimana u'âsi mono pẽ'ẽzani te te aima 're ãpisutu za'ra wa'aba mono zéb zarina si, te oto 're aihãimana wẽ za'ra wa'aba mo, ãpẽ'ẽzani hã sena na aipẽ'ẽ 're, 're sãmra za'ra wa'aba mono wamhã. Ni'wam norĩ ma, ãpẽ'ẽzani, ãpẽ'ẽ 're, tãma 're hãimana za'ra mono õ wamhã, ta norĩ hã Cristuhu nhib'a'uwẽ 're hãimana za'ra mono õ di. **10** A norĩ wa'wa hã Cristu, aipẽ'ẽ 're, aima 're hãimana za'ra wa'aba mono nherẽ, niwamhã te za aihãiba za'ra wa'wa hã aiwi 're si'utõrĩ za'ra wa'wa, aiwasédé hã aima 're hãimana za'ra wa'aba mono wa. Tane nherẽ, 'Re ãhãimana u'âsi mono te te 're ãaiwêsãmri za'ra wa'aba mono zéb zarina si, te za ãpẽ'ẽzani hã te te 're aipisutu za'ra wa'wa, ãrata 're asimroi u'âsi aba mono da. **11** 'Re ãhãimana u'âsi mono hã Zesusihi hãiwa'utu'wa hã, ãpẽ'ẽzani te aipẽ'ẽ 're, 're sãmra za'ra wa'wa. Tô õ hã Cristu te te ãhãiwa'udu hã te za aihãiba hã niwamhã aiwi 're si'utõrĩ pese za'ra wa'aba mono nherẽ, te te 're aihãiwa'utu za'ra wa'wa, ãpẽ'ẽzani hã aipẽ'ẽ 're, 're ãsãmra za'ra wa'aba mono zéb zarina.

12 ãsisãnwã norĩ, taha wa, wapẽ'ẽ 'remhã wanhimirosa'rata wasété na 're ãwahãimana za'ra mono zé hã, mare di za oto. **13** Aipẽ'ẽ 'remhã asimirosa'rata wasété na 're aihãimana za'ra wa'aba mono wamhã, te za atã'ã u'âsi ne 're anomro aba mo, 'Re ãhãimana u'âsi mono nhiti. 'Re ãhãimana u'âsi mono pẽ'ẽzani nhimipawaptobzém na, uburé aiwasédé 're ãmanharĩ za'ra wa'aba mono zé hã asiwi 're uprosi pese za'ra wa'aba mono wapsi, te za 're aihãimana u'âsi za'ra wa'aba mo, 'Re ãhãimana u'âsi mono 'rata. **14** Uburé 'Re ãhãimana u'âsi mono pẽ'ẽzani 'madã'ã sina 're ãhãimana za'ra mono norĩ si, te 'Re ãhãimana u'âsi mono 'ra, 're nomro, ãpẽ'ẽzani te te 're ãsimroi wẽ mono norĩ hã. **15** E marĩ da, ma tô 'Re ãhãimana u'âsi mono hã Tipẽ'ẽzani te te aima 're sãmri za'ra wa'wa. E ãsimirob'manharizé ma, 're aipahi za'ra wa'aba mono sina, tãma 're romhuri za'ra wa'aba mono da, ma tô te te aima 're sãmri za'ra wa'wa. Mare di. Taha dai õ di. 'Re ãhãimana u'âsi mono hã ai'ãma 're 'ra za'ra wa'aba mono da si, ma tô te te aima 're sãmri za'ra wa'wa, Tipẽ'ẽzani hã. Taha nhimipawaptobzéb zarina, wa 'Re ãhãimana u'âsi mono hã wa te 're 'mahãrã za'ra, ãne: "Wamama, Wamama." ãne wa te 're

ĩmahârâ za'ra mono zé hã. **16** Wa norĩ hã 'rãwi wapě'ě 're, wa tô wa te wasina 're waihu'u pese za'ra, 'Re ãhâimana u'âsi mono 'ra oto 're ãwahâimana za'ra mono na. Duré Ĩpě'ězani hã te te wama 're ĩ'awaihu'u mono zéb zarina zama, wa tô 'rãwi wa te wasina 're waihu'u za'ra, ĩ'ra oto 're ãwahâimana za'ra mono na. **17** 'Re ãhâimana u'âsi mono 'ra, oto 're wanomro mono wa, marĩ ĩwě na tinhib'a'uwě ma, 're ĩsõpru mono zéb da, te te tãma 're ĩropisutu za'ra mono zéb ré, wa za 're wahâimana za'ra. Duré uburé marĩ ĩwě na Cristuhu ma, ĩsõprubzéb da, te te tãma ĩropisutuzéb ré, wa za ĩsiré 're wahâimana za'ra. Zesusihi ne, wa te 're robzépata za'ra mono wamhã, wa za ĩsine rowě uptabi na 're wahâimana za'ra.

'Re ãhâimana u'âsi mono, tizazei'wa norĩ ma, za ĩwě te te tãma 're ĩ'apisutu mono zé wasu'u

18 Ti'ab ré, wa te 're ĩrobzépata za'ra mono zé hã, taré, 'Re ãhâimana u'âsi mono, za ĩwě hã te te wama 're ĩ'apisutu mono zé ma hã. Tô sena, wa tô ãne na waihu'u, wa hã. **19** 'Re ãhâimana u'âsi mono hã uburé te te ĩ'apoto mono hã, simisutu te umnhasi sina sô 're simipari za'ra, bådã ĩwa ĩwaptã'ázéb zô, uburé ti'ra na sô'awi za te te oto dama ĩwasu'u hãiré za'ra zô. **20-21** 'Re ãhâimana u'âsi mono, marĩ te te ĩ'apoto mono hã te wasété na 're hâimana za'ra, a'ã. Tinhimipoto mono bâ, niha tãma 're ãhâimana za'ra mono zéb da, te te tãma 're apisutu mono nherě, te te sina tãma ãma 're uwaimrami za'ra mono õ di. Siwa'ru te a'ã 're hâimana za'ra, siwamnarĩ na. Tane nherě, ãne na si'uihã na 're hâimana za'ra mono õ di. 'Re ãhâimana u'âsi mono si, ma tô tãma pisutu za'ra, siwa'ru a'ã 're hâimana za'ra mono da. Niwapsi uburé marĩ te te ĩ'apoto mono hã wasété u'âsi 're ãhâimana za'ra mono hawi, te za anho'reptu. Taha zô, wa sô 're wanhimipari u'âsi za'ra, siwamnarĩ ãna oto 're hâimana za'ra mono da. Tawamhã wasine, robzei u'âsi te za oto 're hâimana za'ra, 'Re ãhâimana u'âsi mono 'ra, oto 're wanomro mono wa, rowě u'âsi 're ãwahâimana za'ra mono ne. **22** Pi'õi ãma, ĩwasã 're sépu'u za'ra mono wamhã, te za 're wab'ětě za'ra, 're séptãã za'ra mono hã. Tane te za duré uburé marĩ hã 'Re ãhâimana u'âsi mono te te ĩ'apoto mono hã a'ã 're wab'ětě za'ra, ti'ab ré, wasété na 're ãhâimana za'ra mono zém hawi 're wairébé mono hã. ãne hã wama waihu'u pese za'ra di oto. **23** Tane nherě, uburé ropodo hã ta norĩ si 're wab'ětě za'ra mono õ di. Wa norĩ zama, wa 're wawab'ětě u'âsi za'ra, 'Re ãhâimana u'âsi mono hã tinhoprubzéb zarina, ĩmorĩ'rata na Tipě'ězani, te te wama 're anhomri mono wa, wapě'ě 're, 're ĩsãmra u'âsi mono da hã. 'Rãwi wapě'ě na, wa 're wawab'ětě u'âsi za'ra, 'Re ãhâimana u'âsi mono hã uburé ti'ra na sô'awi za te te oto dama ĩwawas'u hãiré za'ra zéb zô, 're

wanhimipari za'ra mono ré. Duré ti'ab ré, wanhib'uware na wahâimana wasété na 're îwahâimana za'ra mono zém hawi, za te te 're îwa'awaibui mono zéb zô, 're wanhimipari za'ra mono ré, wa 're wawab'ëtê u'âsi za'ra. 24-25 'Re îhâimana u'âsi mono, îwê si za te te wama 're î'apisutu mono zéb zô, wa te 're wawã za'ra mono âna, sô 're îwanhimipari za'ra mono zéb zarina, ma tô te te 're wa'anho'reptu. Ti'ab ré, marĩ zô 're wanhimipari za'ra mono ré, wa te oto 're 'madâ'â za'ra mono wamhã, e wa za ône u'âsi sô 're wanhimipari za'ra. Mare di. Tâibâ oto, sô 're îwanhimipari za'ra mono zé hã za. Marĩ zô 're îwanhimipari za'ra mono zé hã, zahadu wa te 're 'madâ'â za'ra mono ô ré si, wa za tô wanhiptete sina sô 're wanhimipari u'âsi za'ra, wa te 're sazei utõrĩ za'ra mono âna.

26 Tane duré 'Re îhâimana u'âsi mono, îwê hã za te te wama 're î'apisutu mono zéb zô, wasina sô 're wanhimipari wa'a za'ra mono wamhã, Îpê'êzani si te za te te 're wa'apawapto, sô 're wanhimipari wa'a za'ra mono tã da. Duré, wa norĩ hã niha 'Re îhâimana u'âsi mono ma, wasi'ãma 're îwamreme zusi mono zéb da hã, wa te wasina tãma âma 're uwaimrami waihu'u za'ra mono dai ô nherê, te za Îpê'êzani si wa'ãma 're mreme u'âsi, 'Re îhâimana u'âsi mono ma, wahâiba mono bâ, wa'ãma 're pê'êzé uptabi mono sina. Wasi'uihã na îwê hã wa te tiwi 're îwaptêrê za'ra mono zém na, wa te tãma âma 're uwaimrami waihu'u za'ra mono dai ô nherê, te ôhõ si wa'ãma 're mreme u'âsi, te te 're wa'apawapto mono da, Îpê'êzani hã. 27 'Re îhâimana u'âsi mono hã dapê'ê 're, uburé danhimirosa'rada hã tãma waihu'u pese di. Taha wa, Îpê'êzani nhimirosa'rada hã tãma waihu'u pese di duré. 'Re îhâimana u'âsi mono te te tãma 're î'awê mono zéb uwaibaba si, te Îpê'êzani hã îsib'a'uwê norĩ âma 're mreme u'âsi. 28 'Re îhâimana u'âsi mono zawi pese 'wa norĩ da, marĩ îwasédé hã ahâ na sada 're hâimana za'ra mono nherê, te za 'Re îhâimana u'âsi mono hã îwê si te te tãma 're apisutu îwa'rãmi, te te sima 're î'awê mono zéb zarina, tinhib'a'uwê da, te te sima 're î'apisutu mono norĩ ma hã. Âne hã wama waihu'u pese za'ra di oto wa norĩ hã. 29 Duréihã marĩ ô ré hã, 'Re îhâimana u'âsi mono te te sima âma îrotizéb zarina, te te sima 're îwa'apisutu mono norĩ hã, î'ra ne, tô Zezusihi ne, oto 're wahâimana za'ra mono da, ma tô duré te te 're wa'apisutu siro. Ta hã uburé îsazei'wa norĩ dub'rada, 're hâimana mono da, ma tô âne te te 're wa'apisutu siro, sima. 30 Duré 'Re îhâimana u'âsi mono te te sima 're îwa'apisutu mono norĩ hã ma tô te te sima 're wa'awê, îtême 're wanomro mono da, wa te 're saze za'ra mono da. Tawamhã îtême 're wanomro mono wamhã, ma tô duré te te 're wa'awêsãmri, wawasédé hã te te oto wa'ãma 're î'ab'madâ'â mono ô zarina. Ma tô duré te te wama 're apisutu siro, niwapsi î'ra Zezusi 're îmorĩ wê uptabi ne, 're wahâimana za'ra mono da oto.

Cristuhu nhimizawi pese zé hã dawí ĩsi'utõrĩ'õzé wasu'u

³¹ Re ĩhâimana u'âsi mono hã ãne hã te te wama 're apisutu mono wamhã, e niha za tawamhã. Ta hã, wa niwĩ oto 're hâimana za'ra mono wa, e 'wa hã te za wa'ãma ai'uté. Mare di. Uburé wanhitob'ru norĩ nhiptetezê hã, tarére 'Re ĩhâimana u'âsi mono ma hã. ³² Re ĩhâimana u'âsi mono hã ti'ra te te wawi sawi za'ra õ di, wazada dâ'â za'ra tõ da. Wa'udâna ma tô wama sômri za'ra tô, te te wawi sawi ãna. E tawamhã uburé marĩ ĩwê hã te te wama 're anhomri mono õ di za. Te te wawi 're azawi mono ãna, te za tô te te wama 're anhomri, 'Re ĩhâimana u'âsi mono hã. ³³⁻³⁴ Wa norĩ hã 'Re ĩhâimana u'âsi mono, tinhib'a'uwê da, te te sima 're ĩwa'apisutu mono norĩ si, ma tô te te 're wa'awêsãmri, wawasédé hã te te oto wa'ãma 're ĩ'ab'madâ'â mono õ zarina. E ni'wam norĩ hã wawasédé te te wa'ãma 're sa'ra mono da bâ bété. Ni'wam norĩ hã, wawasédé te te wa'ãma 're sa'ra waihu'u mono õ di za oto. ãne wa za duré aima waihu'u za'ra wa'wa. Cristu Zezusi hã ma tô wazada dârâ, wa'upana. Apâ ma tô duré hâiwa'udu. Taha wa, te oto Timama nhimire niwĩ 're sãmra, dama pire na. Timama ma, te duré te te 're wa'awasu'u wê u'âsi, wazada ĩdâ'âzêb zarina, wawasédé hã te te wa'ãma 're ab'madâ'â tó mono da oto. ãne wa, e ni'wam norĩ hã wawasété na te te wama 're nharĩ zahu za'ra mono da bâ oto. Mare di. ³⁵ Cristu hã te te 're wa'azawi pese uptabi. E 'wa hã te Cristuhu nhimizawi pese zém nhiti te te 're ĩwa'azani mono da hã, 're hâimana. Ni'wai õ uptabi di. Tane nherê, áté wa za a'â wa te 're robzépata za'êtê za'ra. Até marĩ ĩwasédé hã te za a'â wazô 're wairébé. Até ĩsazei'wa 're wanomro mono wa, te za a'â da te wama 're rob'manharĩ wasété za'ra. Até mra hã wa za a'â wa te 're sépata za'ra. Até wanhibrob ãna, wa za a'â 're wahâimana za'ra. Até te za duré a'â da te wama 're amhâzépa za'ra, da te 're wanhimroi mono da. Até te za duré da te 're wanhimro. E tawamhã, ãne na wa te 're robzépata za'ra mono 'ru te, te za Cristu te te 're ĩwa'azawi pese mono zé hã, wawi 're si'utõrĩ za'ra. Mare di. Wawi 're si'utõrĩ waihu'u za'ra mono õ di za. ³⁶ Duréihã apito Dawi hã ma tô ãne na wa'ãma rob'ui'ééré siro, za wa te 're ĩrobzépata za'ra mono zém na hã:

“Wamama, 'Re ĩhâimana u'âsi mono, wa norĩ hã asib'a'uwê 're wanomro mono wa, wama romnhimimnhasi u'âsi na, wa 're wahâimana za'ra, da te 're wanhimroi mono õ'umnhasite. Pone'êrebâi ãma 're dapê'êzé za'ra mono ãna, dasazêb da, da te 're ĩsimroi mono ne, te da te dasima 're wawê za'ra, da te 're wanhimroi mono da, da te 're wa'ruiwaparĩ za'ra mono wa oto.”

ãne duréihã Dawi hã te te wa'ãma ĩrob'ui'ééré sirõmo za'ra hã, te 're hâimana, ĩbaihã na hã.

37 E tawamhã, uburé marĩ ĩwasédé hã wazada 're ĩhâimana za'ra mono zéb zarina, te za Cristu te te 're ĩwa'azawi pese mono zé hã wawi 're si'utõrĩ za'ra. Mare di. Uburé marĩ na da te wama 're rob'manharĩ wasété za'ra mono da nherê, ta hã te te 're ĩwa'azawi pese mono, te za te te 're wa'apawapto, Cristuhu si, wanhitob'ru norĩ ãma wa te ãma 're ai'uté pese za'ra mono da. 38 Uburé marĩ hã wazada 're ĩhâimana za'ra mono zém hawi, 'Re ĩhâimana u'âsi mono hã tinhimizawi pese zé hã te te wawi 're ĩ'azani mono da hã, mare di. ãne na sena na, wa tô ĩsina waihu'u, wa hã. Wahâiba ré ré 're wahâimana za'ra mono wamhã, duré oto 're wadâ'â za'ra mono nherê, tinhimizawi pese zé te te wawi 're azani mono õ di za. Duré ĩhâiba'õ norĩ hã ĩsib'apito norĩ zama, te te wawi 're sani waihu'u za'ra mono õ di, 'Re ĩhâimana u'âsi mono te te 're ĩwa'azawi pese mono zé hã. Duré, ã bātã na marĩ hã wazada 're hâimana za'ra mono 'ru te, te te wawi 're azani mono õ di za, tinhimizawi pese zé hã, 'Re ĩhâimana u'âsi mono hã. Duré niwamhã uburé marĩ hã za wazada 're hâimana za'ra mono 'ru te, te te wawi 're ĩ'azani mono da hã, mare di za tô. 39 Uburé marĩ hã hâiwa na 're ĩsimasa mono hã duré ti'ai 'rowi 're ĩhâimana za'ra mono hã te te wawi 're sawi waihu'u za'ra mono õ di za, 'Re ĩhâimana u'âsi mono nhimizawi pese zé hã. Uburé 'Re ĩhâimana u'âsi mono te te ĩ'apoto mono hã, niwamhã te te wawi 're sani waihu'u za'ra mono õ di za tô, ĩsimizawi pese zé hã. Robaba uptabi di. Wanhib'apito Cristu Zezusihi ãma si 're wanomro mono wa, te te 're wa'azawi pese uptabi, 'Re ĩhâimana u'âsi mono hã, õne u'âsi.

Izarazéhé nhihudu norĩ, 'Re ĩhâimana u'âsi mono te te sima 're ĩ'apisutu mono zé wasu'u

9¹ Tô sena, wa za aima rowasu'u za'ra wa'wa. Wa hã Cristuhu te, 're ĩmorĩ wa, 're ĩzadawa nhipese mono õ di. 'Re ĩhâimana u'âsi mono p'êzani te te ĩma ĩwaihu'uzéb zarina, duré r'âwi ĩp'ê'ê na te ĩsi'ãma 're ĩrosa'rata mono zéb zarina, wa tô waihu'u, dama 're ĩzadawa nhipese mono õ na hã. 2-3 ĩsiré zudezu norĩ ãma hã, ãma 're ĩp'ê'êzé uptabi za'ra mono di, Cristu hã te te siwi 're wê'õ za'ra mono wa. Taha wa, te duré ĩwi 're robzei'õ pese, ĩp'ê'ê remhã. Ta norĩ ãma 're ĩp'ê'êzé uptabi za'ra mono wa, wa aré te ĩsima 're rosa'rata u'âsi ĩp'ê'ê na, 'Re ĩhâimana u'âsi mono ma, ĩsipisutu da, ĩ'upana za'ra te te 're ĩwê'õ mono da, duré Cristuhu nhiti, ĩ'upana 're ĩhâimana u'âsi za'ra mono da. ãne hã 'Re ĩhâimana u'âsi mono hã te te ĩma 'manharĩ dai õ nherê, wa taré ĩsiwaihu'u, ĩsiré zudezu norĩ ãma 're ĩp'ê'êzé uptabi za'ra mono zém na. ãne na, wa tô aima ĩsiwasu'u za'ra wa'wa, 're ĩzadawa nhipese mono õ na hã. 4 Ta norĩ hã 'Re ĩhâimana u'âsi mono nhimipisudu, te 're hâimana za'ra. Ta

norĩ ãma, ma tô 're 'ra za'ra, 'Re ìhâimana u'âsi mono hã. Ta norĩ ma si, ma tô rowa'a na aré ì'rata 're sãmra za'ra rãwi, ìwaihu'u pese zé hã duré ìhâimana wê zé hã te te waihu'u za'ra da. Simisutu siré, ãma 're hâimana u'âsi za'ra mono da, ma tô duré marĩ ìwê hã te te tãma 're apisutu. Ìsimiroti na Mozési te te ìrob'ui'érezé hã ma tô duré tãma sômri za'ra. Ta norĩ ma, ma tô duré 're siwaihu'u za'ra, ì'uwaibaba si ãma 're ìwata za'ra mono zéb da hã. Ta norĩ ma, ma tô duré ahâ na te te tãma 're aropisutu, zudezu norĩ ma, za te te tãma ãma 're ì'a'uwaimrami mono zém na hã. ⁵ Wahi'rata norĩ nhihudu uptabi, te ta norĩ hã 're hâimana za'ra, dama ìpire uptabi za'ra norĩ nhihudu. Cristu hã zudezu hâiba na, ma tô podó, ti'ai ãma. Cristu hã ta hã, 'Re ìhâimana u'âsi mono, uburé marĩ hã te te 're ì'ab'madâ'â mono. Taha ãma uburé 're wawata u'âsi za'ra wa'aba mono. Tô sena, wa ãne na aima ãma rowasu'u za'ra wa'wa.

⁶ E tawamhã, Izarazéhé nhihudu norĩ hã Cristu te te siwi 're wê'ô za'ra mono wa, te te tãma ãma 're a'uwaimrami mono ô di, 'Re ìhâimana u'âsi mono, te te tãma 're ìropisutu za'ra mono zém na hã. Ma tô te te tãma ãma 're a'uwaimrami, tô. Izarazéhé nhihudu norĩ hã, 'Re ìhâimana u'âsi mono nhimipisudu hã aihĩni 're hâimana za'ra mono ô di, ìsib'a'uwê uptabi, 're nomro mono da. ⁷ Duré Abra'ãhã nhihudu sidâpâsi ìsihudu norĩ hã, ìsihudu ahâ na za 're ìhâimana za'ra mono na, 'Re ìhâimana u'âsi mono te te tãma ìropisutuzéb zarina, aihĩni uptabi, ãma 're hâimana za'ra mono ô di, 'Re ìhâimana u'âsi mono 'ra uptabi hã 're ìhâimana za'ra mono na hã. Duréihã 'Re ìhâimana u'âsi mono hã ma tô ãne na Abra'ãhã ma ropisutu, romhã ré: “Izatihi nhihudu norĩ si, te za ìnhib'a'uwê uptabi hã 're hâimana za'ra.” ãne ma tô tãma waihu'u siro, 'Re ìhâimana u'âsi mono hã. ⁸ Taha wa, Abra'ãhã nhihudu mono norĩ hã 'Re ìhâimana u'âsi mono 'ra, aihĩni 're ìnomro mono ô na, te wasu'u ã hã, duréihã Abra'ãhã ma, 'Re ìhâimana u'âsi mono te te ìwaihu'uzém na. Abra'ã hã 'Re ìhâimana u'âsi mono nhimiropisudu hã te te ãma ìsaze ne, tane duré ìsimiropisutu na, da te 're ìsaze za'ra mono norĩ si, te za Abra'ãhã nhihudu ne oto 're dahâimana za'ra. ⁹ Duréihã 'Re ìhâimana u'âsi mono hã Abra'ãhã ma, te te ìropisutuzé hã, ãne ìsimiroti wasu'u hã: “Wahub amo na, wa za duré we atême wi, tô ã a'amo za duré ìwa ìwaptã'ázém na. Tawamhã apã we atême ìwisi ô ré, te za Saraha ma ì'ra podó, aibã na.” ãne duréihã Abra'ãhã ma, 'Re ìhâimana u'âsi mono te te ìropisutuzé hã.

¹⁰ Tawamhã Saraha 'ra hã ma tô tiprédu oto, Izati hã. Ta hã wahi'rada. Prédu wamhã, ma tô timro, Rebecaha ãma. Ta hã ma tô duré ti'ra, ì'ra maparane ìsi'ubza hã, aibã zahuré hã. ¹¹⁻¹² Tane nherê, ìdi'i 're, zahadu hâimana zahuré nherê, duré marĩ ìwê hã te

te waihu'u zahuré õ nherẽ, zahadu marĩ ĩwasédé hã te te duré waihu'u zahuré õ nherẽ, ma tô ãne 'Re ĩhâimana u'âsi mono hã tâma waihu'u siro, Rebecaha ma: “Īdub'rada hã te za tinoi ma wapu na 're hâimana.” ãne ma tô 'Re ĩhâimana u'âsi mono hã ĩno si sima pisutu, tidub'rata ma, pire na 're hâimana mono da. E marĩ hã te te 're ĩmanharĩ wẽ zahuré mono zéb zarina, ma tô ĩno si sima pisutu, 'Re ĩhâimana u'âsi mono hã. Mare di. Taha wab õ di. Si'uihã na te te sima ĩwẽzéb uwaibaba, ma tô sima pisutu, ĩno si. **13** ãne na hã 'Re ĩhâimana u'âsi mono zadawa wasu'u'wa hã ma tô ĩmreme na rob'ui'ééré, ĩbaihã na hã: “Zacoho si, ĩma sawi di. Eza'uhu si, wa tô ĩsiwi wẽ'õ.” ãne 'Re ĩhâimana u'âsi mono, si'uihã na te te sima ĩwẽzéb zarina, Zaco te te sima ĩpisutuzé hã, ĩdub'rata upana.

14 Até ãne na te za asima 're ĩrosa'rata za'ra wa'aba mo: “'Re ĩhâimana u'âsi mono hã te te sima ĩwẽzéb zarina, ĩno si te te sima ĩpisutu na hã ma tô ãma upa. ĩuwaibaba õ di.” ãne na hã asima ãma 're rosa'rata za'ra wa'aba mono õ di za. ĩuwaibaba si te te dama ãma 're a'uwa'imrami u'âsi, 'Re ĩhâimana u'âsi mono hã. Te te dama ãma 're a'upai mono õ di. **15** Duréihã Mozésihi ma, ma tô ãne na siwasu'u: “Ni'wam norĩ ãma 're ĩpẽ'ézé za'ra mono da, te ĩsima 're wẽ za'ra mono wamhã, wa za tô ãma 're ĩpẽ'ézé za'ra, ãma 're ĩsiwãrĩ za'ra mono da, ta norĩ ãma hã. Duré ni'wam norĩ ãma 're ĩpẽ'ézé za'ra mono da, te ĩsima 're wẽ za'ra mono õ wamhã, ãma 're ĩpẽ'ézé za'ra mono õ di za tô, ta norĩ ãma hã, te 're apawapto mono da.” ãne Mozésihi ma, ĩsiwaihu'uzé hã, 'Re ĩhâimana u'âsi mono hã. **16** Taha wa, da te dasima 're ĩwẽ za'ra mono zéb zarina, te te 're da'apisutu mono õ di, da'ãma 're ĩpẽ'ézé mono zém na hã, 'Re ĩhâimana u'âsi mono hã. Duré dasi'uihã na sô 're ĩdasiwasutu za'ra mono na, te te 're da'apisutu mono õ di, da'ãma 're ĩpẽ'ézé mono zém na hã. Si'uihã na te te sima 're ĩda'awẽ mono zéb zarina si, te za tô da'ãma 're pẽ'ézé, da'ãma 're ĩsiwãrĩ mono zéb da hã. **17** Duréihã ma tô Mozési hã ãne na ãma rob'ui'ééré, 'Re ĩhâimana u'âsi mono hã apito Para'oho ma te te ĩrowasu'uzém na, ãne:

“Wa hã wa tô aipisutu, dama asi'apito da. Wa tô duré nasi ai'rãnhito, asimirosa'rata nhiptete na aihâimana mono da, a'ã. Wa tô duré nasi aima rob'manharĩ wasété, ĩnhimiwaihu'u pese zém na, da te 're ĩwaihu'u za'ra mono da, duré daro mono bâ ĩnhisi na, da te 're ĩwaihu'u pese za'ra mono da oto.”

ãne duréihã apito Para'oho ma, ĩsiwasu'uzém na ma tô ĩbaihã na ãma rob'ui'ééré, Mozési hã. **18** Taha wa, 'Re ĩhâimana u'âsi mono hã ni'wam norĩ ãma 're pẽ'ézé za'ra mono da, te te sima 're wẽ za'ra mono wamhã, te za tô ãma 're pẽ'ézé za'ra, ãma 're siwãrĩ za'ra mono da. Duré te te sima 're ĩda'awẽ mono zéb uwaibaba, te za te te 're

da'a'rãnhito, danhimirosa'rata wasété nhiptete na a'â 're dahâimana za'ra mono da.

'Re îhâimana u'âsi mono, te te sima 're îda'awě mono zéb zarina si, marĩ hã te te dama 're î'apisutu mono zé wasu'u

19 *Âté ni'wam norĩ hã ãne wa'rãmi te za te te îma 're nharĩ za'ra, asiré 're aihâimana za'ra wa'aba mono norĩ hã. Âté ãne te za ta norĩ hã te te îma 're nharĩ za'ra: "Re îhâimana u'âsi mono hã danhimirosa'rata wasété nhiptete na a'â 're dahâimana za'ra mono da, te te 're da'a'rãnhito mono wamhã, ãne wamhã, e niha te za te te siwi 're da'awě'õ. Te te siwi 're da'awě'õ waihu'u mono õ di za. E 'wa hã, te 'Re îhâimana u'âsi mono nhimipisutu da, hâimana nhiptete na 're hâimana. Robaba di. Ni'wai õ di." Âté, ãne te za ni'wam norĩ hã te te îma 're nharĩ za'ra, te te 're waihu'u za'ra mono õ nherẽ. 20 E a norĩ wa'wa hã 'Re îhâimana u'âsi mono ma, aipire za'ra wa'aba bâ, te za ãne na îma 're ãnharĩ za'ra wa'aba mo. Piza na zé 'manharĩ hã, e ti'manharĩ'wa te za sina sadanharĩ za'ra, ãne: "E marĩ da, ma tô ãne îwa'ab'manha." ãne na te te sina sadanharĩ waihu'u za'ra õ di za. 21 Î'manharĩ'wa hã te te sima îwězéb uwaibaba si, te za zé hã te te 're ab'manharĩ, piza na. Zé hã te te su pese wamhã, misi te za oto sada ub'rã. Tawamhã te za sima rosa'rata, piza maparane te te sima 'manharĩ da, ãma. Tawamhã te te î'manharĩ 'rada hã, wě uptabi na te za 'manha, î'madâ'â ze da hã. Duré îhâiba amo hã si'aba'ré na te za 'manha, wě prã na, ta hã marĩ da si 're hâimana mono da, taré.*

22 Tane te za duré 'Re îhâimana u'âsi mono hã wa'manharĩ'wa hã marĩ hã te te wama 're apisutu, zé 'manharĩ'wa ne. Te te sima 're îwě mono zéb zarina, te za uburé marĩ hã te te dama 're apisutu, îwě hã duré îwě prã hã. Ta hã te te sima 're wě u'âsi, tiwaihu'u pese na dapo're'õ norĩ hã te te 're ahâ za'ra mono da, taha zarina îsimihã nhiptetezém na da te dasina 're waihu'u za'ra mono da. Tane nherẽ, te te siwi 're î'awě'õ pese mono norĩ ãma hã, 're wa'a su'u mono õ di, za te te 're îda'uprozi za'ra mono norĩ ãma hã. 23 ãne hã ma tô duré te te sima 're wě, pire na 're îhâimana wě uptabi mono zém na, dama 're siwaihu'u mono da. Uburé wa'ãma 're îpě'ézé mono zéb zarina, wa'ãma 're îsiwãrĩ za'ra mono norĩ ma, ma tô ãne na wama 're siwaihu'u, 'Re îhâimana u'âsi mono hã. Wa norĩ hã ma tô oto te te 're wa'apisutu siro, rowě uptabi ãma î'rata 're wahâimana u'âsi za'ra mono da. 24 Wa norĩ hã ma tô 'Re îhâimana u'âsi mono hã te te 're wa'apisutu, îsib'a'uwě uptabi hã oto 're wanomro mono da. E 'wam norĩ hã tawamhã, 'Re îhâimana u'âsi mono te te 're î'apisutu mono norĩ hã. Wa norĩ hã zudezu norĩ hã aihĩni õ nherẽ, duré zudezu'õ norĩ hã aihĩni õ nherẽ, ma tô wasiwazari te te 're

wa'apisutu, ĩsib'a'uwẽ oto 're wanomro mono da, wasiré. ²⁵ Duréihã 'Re ĩhâimana u'âsi mono zadawa wasu'u'wa hã ma tô ĩmreme na rob'ui'ééré, Ozéza na ĩsisi hã. Zudezu'õ wasu'u na ma tô ãne na rob'ui'ééré:

“Īnhib'a'uwẽ'õ, aré 're ĩnomro mono norĩ hã, wa za oto ĩnhib'a'uwẽ na te 're sisi za'ra.

Aré te 're ĩsawi za'ra mono õ norĩ hã, wa za oto ĩma ĩsawi pese na te 're waptẽrẽ za'ra.

²⁶ Tirob ãma 're si'ubumroi mono ré, wa tô aré te tãma 're nharĩ za'ra, ãne: A norĩ wa'wa hã ĩnhib'a'uwẽ'õ te 're aihâimana za'ra wa'aba mo. Tane nherẽ, tame 're si'ubumroi mono ré, wa za oto ĩ'ra na te 're sisi za'ra, wa hã 'Re ĩhâimana u'âsi mono 'ra na.”

Ãne Ozéza, ĩmreme na te te ĩrob'ui'éérézé wasu'u hã.

²⁷⁻²⁸ Iza'iza hã ma tô duré ãne na ãma rob'ui'ééré, Izarazéhé nhihudu norĩ ãma hã:

“Re ĩhâimana u'âsi mono hã Wanhib'apito hã te za sa'ětẽ da'ahã za'ra waptu sina, daro mono bâ dawasété na te te 're ĩda'awaihu'u mono zéb zarina. Taha wa, Izarazéhé nhihudu norĩ hã â poré zaihã na supara 're ĩsimi'wara mono ne, ahã uptabi nherẽ, te za umro na si te te 're anho'reptu, 'Re ĩhâimana u'âsi mono hã.”

Ãne Iza'iza hã, Izarazéhé nhihudu norĩ ãma te te ĩrob'ui'éérézé hã.

²⁹ Iza'iza hã ma tô duré ãne na rob'ui'ééré:

“Wanhib'apito hã danhipai u ĩsiptete uptabi, te 're hâimana. O hã uburé wahi'rata norĩ hã zudezu norĩ hã te te wawi 're a'uprosi mono 'wa'âhã, wa aré wasiré zudezu norĩ hã 're wasi'utõrĩ pese, Sodoma na 'ri nho'õmo nhisi ãma uburé ĩdasi'utõrĩ ne, duré Domora na 'ri nho'õmo nhisi ãma ĩdasi'utõrĩ ne. Tane nherẽ, ma tô ni'wam norĩ ãma tipẽ'ézé za'ra, te te sõ'reptu za'ra da, uburé si'utõrĩ tã da, wasiré zudezu norĩ hã.”

Zudezu norĩ hã Cristu te te siwi 're ĩwẽ'õ za'ra mono zé wasu'u

³⁰ E marĩ te wama wasu'u za'ra, tawamhã, ã hã. E niha, wa za tawamhã ãma waihu'u za'ra ni, ãhã wasu'u na hã. Ãne, wa za ãma waihu'u za'ra ni. Zudezu'õ norĩ hã 'Re ĩhâimana u'âsi mono, ĩwasédé hã te te ãma 're ĩ'ab'madââ mono õ zarina, te te 're ĩwẽsãmri za'ra mono zéb da hã, te te aré sô 're rob'ruiwapari za'ra mono õ nherẽ, ma tô te te 're awẽsãmri, taré te te 're ĩsaze za'ra mono zém na si nherẽ. ³¹ Tane nherẽ, Izarazéhé nhihudu norĩ hã 'Re ĩhâimana u'âsi mono nhimiroti 'rata na Mozési te te ĩrob'ui'ééré hã te te 're ĩ'madââ pese za'ra mono na, 'Re ĩhâimana u'âsi mono,

ĩwasédé te te oto ãma 're ab'madâ'â tō mono da, duré taha zarina te te 're awēsãmri mono da, te te sima ãma 're aroti mono newa, ma tō ta norĩ hã taré sô 're si'wapé za'ra, te te 're ĩ'awēsãmri mono zéb zô. 'Re ĩhâimana u'âsi mono hã, ĩwasédé hã te te ãma 're ĩ'ab'madâ'â mono ô zarina, te te 're ĩwēsãmri za'ra mono zéb da hã, te te sina tãma 're uwaimrami za'ra mono ô di, ta norĩ hã. ³² E marĩ wa, te te sina tãma 're uwaimrami za'ra mono ô di. 'Re ĩhâimana u'âsi mono te te 're ĩsazei pese za'ra mono zém na si, te te 're ĩwēsãmri za'ra mono zéb da hã, 're si'madâ'â za'ra mono ô wa, 'Re ĩhâimana u'âsi mono nhimiroti 'rata na rob'ui'ééré na si 're si'madâ'â ze za'ra mono wa. Cristuhu ãma, wa za oto ĩne hã aima ãma simir'éé za'ra wa'wa. Ĕtē tōmo wawē hã bådâdi wa, 're sa'wari mono wa, te za ãma 're dasi'marõpãrĩ za'ra. Taha wa, te za 're dasirēme za'ra. Tane duré, zudezu norĩ hã ma tō Cristu te te siwi 're ĩwē'ô za'ra mono zém na si'uihã na sima 're simiza'repese za'ra, wedepo'o nhonhi'rãmi na dazada ĩdã'ázé hã taré newa, Cristu hã da te 're ĩsaze za'ra mono zém na, 'Re ĩhâimana u'âsi mono te te 're ĩda'anho'reptui mono ô newa. ³³ Duréihã Iza'iza hã ma tō ãne na ãma rob'ui'ééré, 'Re ĩhâimana u'âsi mono mreme na:

“Ma'ãpé, ĩwapari pese za'ra wa'aba. Zeruzarē u, wa za ni'wa hã satō, Si'ã na sa'a nhisi u. Ĕtē tōmo wawē hã bådâdi wa, dawĩ 're ĩsa'wari mono hã, te te 're da'marõpãrĩ za'ra mono wa, 're ĩdasirēme za'ra mono ne, 'Re ĩhâimana u'âsi mono 'rata 're ĩdanomro u'âsi mono zé hã da te dasina 're uwaimrami za'ra mono ô di za, da te dasiwi 're wē'ô pese za'ra mono wa, 'Re ĩhâimana u'âsi mono Zeruzarē u te te ĩsatõrĩ hã.

Tane nherē, ni'wam norĩ hã te te sina 're umnhasi za'ra mono wamhã, taré te te sina 're umnhasi baba za'ra mono ô di za. ĩwē hã te za tō te te tãma ãma 're a'uwaimrami, 'Re ĩhâimana u'âsi mono hã. Taha wa, tãma 're rowē u'âsi za'ra mono di za.”

Ãne ma tō duréihã Iza'iza hã ãma rob'ui'ééré siro, Cristu za da te dasiwi ĩwē'õzém na hã.

10 ¹ ĩsisãnawã norĩ, 'Re ĩhâimana u'âsi mono te te 're ĩda'anho'reptui mono zé hã, uburé ĩsiré zudezu norĩ hã te te sina tãma 're uwaimrami za'ra mono da, wa tō ĩsima wē uptabi za'ra. Taha da, wa ta norĩ ãma 're ĩmreme u'âsi za'ra, 'Re ĩhâimana u'âsi mono ma. ² Ta norĩ hã te te sima 're wē uptabi za'ra, 'Re ĩhâimana u'âsi mono ma, 're sisõmri u'âsi za'ra mono da, õhõ ma si, te te 're romhuri pese za'ra mono da. Ãne na, wa tō ĩsi'uihã na ãma waihu'u pese za'ra, tō sena. Tane nherē, 'Re ĩhâimana u'âsi mono ma, da te 're ĩromhuri pese za'ra mono zé hã te te waihu'u pese

za'ra ã wa, te te sina tãma 're uwaimrami za'ra mono õ di. ³ 'Re ãhãimana u'ãsi mono, dawasédé te te oto da'ãma 're ã'ab'madã'ã mono õ zarina, te te 're ãda'awêsãmri mono zé hã, tãma waihu'u pese za'ra ã di. Te te 're ãda'awêsãmri mono zéb da, 'Re ãhãimana u'ãsi mono te te tãma 're ãpisutu za'ra mono zé hã, te te 're 'madã'ã pese za'ra mono õ di, ta norĩ hã. Si'uihã na te te sima 're ãpisutu za'ra mono zéb zarina si, ma tô 'rãwi sô 're si'wapé za'ra, taha na te te 're wêsãmri za'ra mono da newa. ⁴ 'Re ãhãimana u'ãsi mono nhimiroti na Mozési te te ãrob'ui'ééré hã da te 're ã'madã'ã pese za'ra mono na, da te ãma 're rosa'rata u'ãsi za'ra mono õ di za oto, taha zarina 'Re ãhãimana u'ãsi mono, te te sima da'ãma 're aroti mono newa, dawasédé te te oto da'ãma 're ab'madã'ã tã mono da, duré taha zarina te te 're ãda'awêsãmri mono zéb da hã. Tãibã. ãne hã ma tô Cristu hã dawu uprosi. Ta hã Danho'reptui'wa na te te sina 're ã'umnhasi za'ra mono norĩ si, te za 'Re ãhãimana u'ãsi mono hã te te 're awêsãmri, ãwasédé hã te te oto ãma 're ã'ab'madã'ã mono õ zarina, po're'õ nherẽ, te te 're ahã za'ra tã mono da.

'Re ãhãimana u'ãsi mono te te 're ãda'anho'reptui mono zé wasu'u

⁵ Duréihã Mozési hã ma tô ãne na rob'ui'ééré:

“Ni'wa hã ãsimiroti na rob'ui'ééré hã uburé te te 're 'madã'ã pese uptabi mono wapsi, nimahã na marĩ na misi ãsimiroti na te te upai õ wapsi, tawapsi te za rowẽ na 're hãimana u'ãsi, 'Re ãhãimana u'ãsi mono 'rata.”

ãne ma tô Mozési hã ãma rob'ui'ééré. ⁶⁻⁸ Tane nherẽ, ni'wa hã ãne te te 'manharĩ waihu'u õ di, ãsimiroti zarina uptabi hã. Ni'wa hã ãsimiroti upai'õ'wa hã 're morĩ õ di. Robaba di. Até ãne na te za 'rãwi asima 're ãnharĩ za'ra wa'aba mo: “E 'wa hã te za hãiwa u mo, Cristu hã apã we te te saprõni da, wa'upana wazada ãdã'ã za'ra da hã.” ãne hã asima 're nharĩ za'ra wa'aba mono õ di za, Cristu hã Danho'reptui'wa da, 'Re ãhãimana u'ãsi mono te te ãpisudu hã wei morĩ õ newa, ti'ai u.

Até te za duré ãne na 'rãwi asima 're ãnharĩ za'ra wa'aba mo: “E 'wa hã te za mo, adã 're ãhãimana za'ra mono zéb u, Cristu hã te te hãiwa'utu da apã.” ãne hã asima 're nharĩ za'ra wa'aba mono õ di za duré, Cristu hã apã hãiwa'utu õ newa, ab're hawi. 'Re ãhãimana u'ãsi mono, da te 're saze za'ra mono wapsi, te te 're ãda'awêsãmri mono zém na, ma tô Mozési hã ãne na ãma rob'ui'ééré, duréihã:

“Re ãhãimana u'ãsi mono zadawa wasu'u hã ma tô aipẽ 're, 're ãsazei pese za'ra wa'aba mo, 'rãwi. Taha na, ma tô duré dama 're asiwasu'u u'ãsi za'ra wa'aba mo, asadawa na.”

Ñe Mozési te te ãma ïrob'ui'érezé hã. Taha na, wa tô duré wa norĩ hã wa te dama 're sadawa wasu'u za'ra, Cristu, da te 're sazei pese za'ra mono wapsi, 'Re ïhâimana u'âsi mono te te 're ïda'awêsãmri mono zém na, dawasédé te te oto da'ãma 're ï'ab'madâhã mono õ zarina. **9** Zezusi hã Asib'apito uptabi na, asadawa na danho'a 're sisi za'ra wa'aba mono wamhã, duré rãwi aipẽ'ẽ 're 'Re ïhâimana u'âsi mono, Zezusi te te ïhãiwa'utuzém na, 're sazei pese za'ra wa'aba mono wamhã, tawapsi te za te te 're asõ'reptu za'ra wa'wa, 'Re ïhâimana u'âsi mono hã. **10** Zezusi hã wapẽ'ẽ 're, wa te wasina 're ï'umnhasi za'ra mono zém na, 'Re ïhâimana u'âsi mono hã te te 're ïwa'awêsãmri mono zé hã. Zezusi hã Wanhib'apito na danho'a, wa te dama 're ïsisi za'ra mono zém na, 'Re ïhâimana u'âsi mono te te 're ïwa'anho'reptui mono zé hã. **11** Duréihã Iza'iza hã ma tô duré ãne na ïbaihã na rob'ui'ére: “Re ïhâimana u'âsi mono hã, Danho'reptui'wa da, te te ïpisudu hã da te dasina 're umnhasi za'ra mono wamhã, niwamhã te te sina 're umnhasi baba za'ra mono õ di za. Te za te te dama ãma 're a'uwaimrami u'âsi.” ãne Iza'iza hã te te ãma ïrob'ui'érezé hã. **12** Zudezu norĩ hã zudezu'õ norĩ me, 'Re ïhâimana u'âsi mono ma hã, tô õhõ si, tãma 're ïhâimana za'ra mono zé hã. Siwanhizari, tãma 're hãimana za'ra mono õ di oto ta norĩ hã. 'Re ïhâimana u'âsi mono, uburé Danhib'apito uptabi, te dama 're hãimana. Taha wa, ni'wam norĩ hã 'Re ïhâimana u'âsi mono te te 're sõ'reptu za'ra mono da, te te tiwi 're waptẽrẽ za'ra mono wamhã, ta norĩ ma, te za tô te te tãma ãma 're a'uwaimrami, dama 're ïsõpru mono zéb zarina. **13** Duréihã 'Re ïhâimana u'âsi mono zadawa wasu'u'wa hã ma tô duré ãne na rob'ui'ére:

“Ni'wam norĩ hã Danhib'apito uptabi te te 're sõ'reptu za'ra mono da, te te tiwi 're waptẽrẽ za'ra mono wamhã, ta norĩ hã te za tô te te 're anho'reptu, ïhãiba mono bâ.”

Ñe duréihã 'Re ïhâimana u'âsi mono zadawa wasu'u'wa te te ãma ïrob'ui'érezé hã.

14 E niha te za tawamhã da te tiwi 're waptẽrẽ za'ra, te te 're da'apawapto mono da hã, Cristu, da te dasina 're umnhasi za'ra mono õ nherẽ. ãne wamhã, dama waihu'u õ di. Duré Zezusihi wasu'uwẽ hã dapo're'õ na da te 're wapari za'ra mono õ ré hã, e niha te za da te dasina 're umnhasi za'ra, Zezusi hã. Da te dasina 're umnhasi waihu'u za'ra mono õ di. E niha te za duré Zezusihi wasu'uwẽ na, da te 're dapawapto za'ra mono õ nherẽ, da te 're wapari za'ra. Dama waihu'u õ di. **15** Duré, e niha te aré Zezusihi zadawa wasu'u'wa norĩ hã daro mono bâ datẽme 're nomro, ïmreme na te te 're dapawapto za'ra mono da, 'Re ïhâimana u'âsi mono hã te te datẽme 're satõrĩ za'ra mono õ nherẽ. ãne wamhã, te te ãma 're dapawapto waihu'u za'ra mono õ di aré. Tane nherẽ, 'Re

ĩhâimana u'âsi mono, ma tô te te datême 're satõrĩ za'ra tô. Duréihã Iza'iza hã ma tô ãne na ãma rob'ui'ére:

“Rowasu'u wẽ hã nima hawi da te dama 're ãwisi za'ra mono wamhã, dama 're rowẽ uptabi za'ra mono di za.”

Ãne ma tô Iza'iza hã romhã ré rob'ui'ére, Zezusihi wasu'uwẽ hã ĩsadawa wasu'u'wa norĩ hã te te oto datême 're ĩãwisi za'ra mono zém na hã.

16 Tawamhã Zezusihi wasu'uwẽ hã, ĩsadawa wasu'u'wa norĩ hã te te oto datême 're ãwisi za'ra mono nherẽ, uburé da te ãma 're saze za'ra mono õ di, wẽ nherẽ. Iza'iza hã ma tô duré ãne na ãma rob'ui'ére, 'Re ĩhâimana u'âsi mono ma, te te ĩnharizém na: “Wanhib'apito, wa te dama 're asadawa wasu'u za'ra mono wamhã, e ma tô aiwasu'u na da te 're wazaze za'ra. Mare di. Da te ãma 're wazaze za'ra mono õ di.” 17 Tane nherẽ, Cristuhu wasu'uwẽ na, da te ãma 're dapawaptob za'ra mono õ nherẽ, da te ãma 're sasõmri waihu'u za'ra mono õ di. Cristuhu wasu'uwẽ hã dapo're na da te 're wapari za'ra mono wapsi, te za da te 're saze za'ra.

18 E zudezu norĩ hã zahadu ĩwasu'uwẽ hã te te 're wapari za'ra mono ã bâ bété. ĩwasu'uwẽ hã ma tô te te 're wapari za'ra aré ta norĩ hã, tô sena. Duréihã Dawi hã ma tô ãne na ãma rob'ui'ére:

“ĩsadawa wasu'u'wa norĩ mreime hã ma tô daro mono bâ te te 're ropé.

Ta hã ma tô ropâ dapo're na da te 're wapari za'ra, daro mono bâ.”

Ãne ma tô Dawi hã ãma rob'ui'ére.

19 E tawamhã, Izarazéhé nhihudu norĩ hã ĩwasu'uwẽ te te 're wapari za'ra mono wamhã, e te te 're waihu'u za'ra mono õ di. Ma tô te te 're waihu'u za'ra. Tane nherẽ, tipẽ'ẽ na te te sima 're wẽ za'ra mono õ di, te te 're ĩsaze za'ra mono da hã. Zudezu'õ norĩ si, ma tô te te sima 're wẽ za'ra, te te 're saze za'ra mono da. Ãne na, ma tô Mozési hã duréihã ãma rob'ui'ére 'rata, zudezu norĩ ma 'Re ĩhâimana u'âsi mono te te tãma ĩrowaihu'u za'ra zém na hã:

“ĩnhib'a'uwẽ'õ aré 're ĩnomro mono norĩ hã oto ãma 're ĩnhib'a'uwẽ za'ra mono wa, te za oto ta norĩ hã asiwi 're ĩruiwapari za'ra wa'aba mo, ĩzadawa parab õ nherẽ.

Ta norĩ hã aré te te 're ĩwaihu'u pese za'ra mono õ nherẽ, wa tô ãma 're ĩnhib'a'uwẽ za'ra aré. Taha wa, te za asib'ru na sada 're aihâimana u'âsi za'ra wa'aba mo, ĩzadawa parab õ nherẽ.”

Ãne zudezu norĩ ma, 'Re ĩhâimana u'âsi mono te te ĩrowaihu'u mono zé hã.

20 Iza'iza hã ma tô duré ãne na ĩsa'u ãma rob'ui'ére, zudezu'õ norĩ wasu'u na hã. Zudezu norĩ hã te te siwi 're ĩwẽ'õ pese za'ra mono

zém na, ma tô siptete sina ãma rob'ui'ééré, 'Re ìhâimana u'âsi mono mreme na:

“Ni'wam norĩ hã aré ìzô 're sôpré u'âsi mono ò nherê, ma tô te te siwi 're ìsãmri za'ra.

Ìzô 're sinharĩ za'ra mono ò nherê, wa tô ta norĩ ma 're ìsiwaih'u za'ra.”

21 ãne na ma tô duré Iza'iza hã zudezu norĩ ãma rob'ui'ééré, 'Re ìhâimana u'âsi mono mreme na:

“Wa hã wa tô aré Izarazéhé nhihudu norĩ zô 're ìnhimiwê u'âsi za'ra, te 're azawi pese mono wa, apâ ìtême we 're sihutu mono da. Ta norĩ hã po're ãna 're nomro u'âsi mono wa, te te siwi 're ìwê'ô pese za'ra mono nherê, wa tô aré sô 're ìnhimiwê u'âsi za'ra, te 're ìsawi pese za'ra mono zéb zarina.”

ãne ma tô Iza'iza hã 'Re ìhâimana u'âsi mono mreme na ãma rob'ui'ééré, Izarazéhé nhihudu norĩ ãma hã.

'Re ìhâimana u'âsi mono, Izarazéhé nhihudu norĩ ãma 're ìpê'ézé mono zé wasu'u

11 1 E tawamhã, 'Re ìhâimana u'âsi mono hã tinhib'a'uwê norĩ hã ma tô te te siwi 're wê'ô za'ra, Izarazéhé nhihudu norĩ hã. Mare di. Te te siwi 're awê'ô mono ò di. Mare uptabi di. Wa hã bété, Izarazéhé nhihudu 're ìmorĩ hã, duré Abra'ãhã nhihudu 're ìmorĩ hã. Duré Bêzamihĩ nhihudu norĩ siré 're ìmorĩ wamhã, e ma tô siwi ìwê'ô, Izarazéhé nhihudu 're ìmorĩ nherê. Mare di. Te te siwi ìwê'ô ò di, 'Re ìhâimana u'âsi mono hã. 2-3 Tinhib'a'uwê norĩ hã, tô sena te te siwi 're awê'ô mono ò di 'Re ìhâimana u'âsi mono hã, duréihã ìsãna'rata hawimhã, te te sima 're ì'apisutu mono norĩ hã. Duréihã Eriasi hã 'Re ìhâimana u'âsi mono zadawa wasu'u'wa hã ma tô Izarazéhé nhihudu norĩ ãma ìwasété na ãma sa'ra, 'Re ìhâimana u'âsi mono ma. ãne na te te ãma ìrob'ui'éérézê hã, aima waih'u'u pese za'ra wa'aba di. ãne ma tô ãma rob'ui'ééré:

“Wanhib'apito, asadawa wasu'u 'rata 'wa norĩ hã ma tô ta norĩ hã te te 're simro. Duré êtê za'ra 'manharĩ hã, ìsisiwi aima danhoprubzéb da, marĩ, da te ìwa 're ìsa'ra za'ra mono zé hã ma tô uburé te te 're prub za'ra, êne hã.

Ìsiwaprosi uptabi, wa oto 're ìhâimana, te 're ìsasawi pese mono hã. Taha 'ru te, te duré ìzada 're hâimana za'ra, ìzama te te siwi ìwĩrĩ da.”

ãne Eriasi hã 'Re ìhâimana u'âsi mono ma, Izarazéhé nhihudu ãma ìwasété na te te ìsa'razém na te te ãma ìrob'ui'ééré hã, ìbaihã na.

4 Tawamhã 'Re ìhâimana u'âsi mono hã e niha ma tô asa tãma waih'u'u, Eriasihi ma. ãne ma tô tãma waih'u'u:

“Áme ãnhib'a'uwẽ nhipti'ai ãma hã, wa tô te ãsima 're sawi pese za'ra, 7 miu na ãhãiba za'ra hã, tisiré norĩ wazari si'utõrĩ tã da dame, ãhãiba'õ na dame ãma 're ãwata za'ra mono õ norĩ hã, Ba'a na romhãiba nhisi ãma hã. Ta norĩ si, te ãzarina 're hãimana u'ãsi za'ra.”

Áne 'Re ãhãimana u'ãsi mono hã Eriasihĩ ma, asa te te ãwaihũ'uzém na rob'ui'éré hã. 5 Tane te duré ãhãna hã dama 're romhãimana za'ra. Da'ãma 're pẽ'ézé mono wa, da'ãma 're ãsiwãrĩ mono zéb zarina, ma tô 'Re ãhãimana u'ãsi mono hã Izarazéhé nhihudu norĩ hã te te sima 're apisutu, umro na, ãsib'a'uwẽ uptabi si oto 're hãimana za'ra mono da. 6 E tawamhã, marĩ hã te te 're ãmanharĩ wẽ za'ra mono zéb zarina, ma tô te te sima 're apisutu, 'Re ãhãimana u'ãsi mono hã, zudezu norĩ hã. Mare di. Taha zarina te te sima 're apisutu mono õ di. Taré ãma 're ãpẽ'ézé za'ra mono zéb zarina, ãma 're siwãrĩ ze za'ra mono wa, ma tô si'uihã na te te sima 're apisutu, õhõ ãma si 're hãimana u'ãsi za'ra mono da. Marĩ hã da te 're ãmanharĩ wẽ za'ra mono zéb zarina, te te sima 're da'apisutu mono 'wa'ãhã, ãne zarina 'wa'ãhã, aré senai õ di, 'Re ãhãimana u'ãsi mono, da'ãma 're ãpẽ'ézé mono zéb zarina si, da'ãma 're ãsiwãrĩ mono zé hã.

7 Tawamhã e niha, wa za ãne na hã ãma waihũ'u pese za'ra ni. Áne, wa za oto ãma waihũ'u za'ra ni. Izarazéhé nhihudu norĩ hã 'Re ãhãimana u'ãsi mono, ãwasédé hã te te oto ãma 're ab'madã'ã tã mono da, duré taha zarina te te 're ãwêsãmri za'ra mono zéb da hã, sô 're sôpré u'ãsi mono nherẽ, te te sina tãma ãma 're uwaimrami za'ra mono õ di, ta norĩ hã. 'Re ãhãimana u'ãsi mono, umro na te te sima 're ãpisutu za'ra mono norĩ si, ma tô te te sina tãma 're uwaimrami za'ra, 'Re ãhãimana u'ãsi mono te te 're ãwêsãmri za'ra mono zém na hã. Tane nherẽ, ni'wam norĩ hã Izarazéhé nhihudu nherẽ, 'Re ãhãimana u'ãsi mono nhiti 're ãhãimana za'ra mono norĩ hã, ta norĩ si ma tô 'Re ãhãimana u'ãsi mono hã po're nhitob za'ra, ãmreme hã te te 're waihũ'u za'ra mono ãna, a'ã 're nomro mono da. 8 Duréihã Mozési hã ma tô ãne na ãma rob'ui'éré:

“Re ãhãimana u'ãsi mono hã ma tô ta norĩ hã tiwaihũ'u pese na te te 're po're nhitob za'ra, simipari ãna 're hãimana za'ra mono da a'ã. Ta norĩ hã ma tô duré te te 're 'rãiwamnarĩ za'ra, rosa'rata waihũ'u ãna, a'ã 're nomro mono da. Taha wa, te ta norĩ hã 'Re ãhãimana u'ãsi mono te te siwi 're waihũ'u za'ra mono ãna, siwa'ru 're hãimana za'ra.”

Áne duréihã Mozési hã te te ãma ãrob'ui'érézé wasu'u hã. 9 Dawi hã ma tô duré ãne na ta norĩ ãma rob'ui'éré za'ra, zudezu norĩ ãma hã:

“Re ãhãimana u'ãsi mono hã ta norĩ ma, ãwẽ na tãma 're sôprub za'ra mono wẽ te, ma tô 're si'madã'ã ze za'ra, taha

na tãma 're rowě za'ra mono da newa. Taha wa, marĩ wasété pire na 're si'marõpãrĩ za'ra mono neza, 'rãwi. Duré 'Re ãhãimana u'ãsi mono hã te te hã za'ra neza.

10 Te te duré 're tãmo nhitob za'ra mono neza, datob'a na 're ãdanomro mono ne, 're nomro mono da oto. Duré ta norĩ hã marĩ pire hã da te 're 'wasari mono wa, ãré 're ãdanhihãpã za'ra mono ne, te te 're robzépata u'ãsi za'ra mono neza.”

ãne duréihã Dawi hã Izarazéhé nhihudu norĩ ãma, te te ãrob'ui'érézé wasu'u hã.

11 E tawamhã, zudezu norĩ hã 'Re ãhãimana u'ãsi mono wi, 're si'marõpãrĩ za'ra mono nherě, apã ãtẽme 're wahutu waihu'u za'ra mono õ di za. E tawamhã apã ãtẽme 're sipizari waihu'u za'ra mono õ di za. Te za tã apã ãtẽme 're sipizari za'ra. Ta norĩ hã 'Re ãhãimana u'ãsi mono wi, 're sipizari za'ra mono wa, tiwasédé hã te te 're 'manharĩ za'ra mono wa, ma tã 'Re ãhãimana u'ãsi mono hã zudezu'õ norĩ ma a'ã pisutu za'ra, te te 're ãda'anho'reptui mono zé hã. Zudezu norĩ hã te te ãma 're 'ruiwapari za'ra mono da, ma tã zudezu'õ norĩ ma a'ã pisutu za'ra, te te 're ãda'anho'reptui mono zé hã, zudezu norĩ hã apã ãtẽme 're sipizari za'ra mono da, te te 're ãda'anho'reptui mono zém niwĩ. **12** Zudezu norĩ hã 'Re ãhãimana u'ãsi mono te te 're ãwěsãmri za'ra mono zéb da hã, te te sina tãma 're uwaimrami za'ra mono õ wa, ma tã 'Re ãhãimana u'ãsi mono hã zudezu'õ norĩ ma, hãiwa hawi marĩ ãwě na tãma 're sõprub za'ra, daro mono bã. Tawamhã zudezu norĩ hã 'Re ãhãimana u'ãsi mono niwĩ, ahã uptabi na apã za ãtẽme 're sipizari za'ra mono wamhã, tawapsi, te za oto marĩ ãwě uptabi hã te te dama 're anhomri, 'Re ãhãimana u'ãsi mono hã hãiwa hawi, uburé tinhib'a'uwě norĩ ma hã.

Zudezu'õ norĩ, 'Re ãhãimana u'ãsi mono te te 're ã'anho'reptui mono zé wasu'u

13 Zudezu'õ norĩ, wa za oto aima ãsiwasu'u za'ra wa'wa. Wa hã Cristuhu zadawa wasu'u'wa, wa aima 're ãhãimana za'ra wa'wa. Wa hã te aima 're ãromhuri za'ra wa'aba mono zé hã, taréi õ di. Taha wa, wa za tã ãnhimi'ě na te aima 're romhuri u'ãsi za'ra wa'wa. **14** Wa hã te aima 're romhuri za'ra wa'aba mono wa, ãsiré zudezu norĩ hã te te ãma 're ai'ruiwapari za'ra wa'aba mono da, wa tã ta norĩ si te ãsima 're wě za'ra, ni'wam norĩ hã apã 'Re ãhãimana u'ãsi mono u 're sipizari za'ra mono wa, te te 're anho'reptui mono da. **15** Ta norĩ hã te te 're saze za'ra mono õ wa, ma tã 'Re ãhãimana u'ãsi mono hã asa te te siwi 're awě'õ, a'ã. ãne wa, ma tã a'ã ai'ãma si 're siwadi za'ra wa'wa, zudezu'õ norĩ ãma hã. Tane nherě, ta norĩ hã niwapsi 'Re ãhãimana u'ãsi mono u, apã 're ãsipizari za'ra mono zéb zarina, te te 're wěsãmri za'ra mono wa, te za oto rowě uptabi

na 're hâimana za'ra, ãwasédé hã te te oto ãma 're ã'ab'madâ'â mono õ zarina. 'Re dadâ'â za'ra mono wa, apâ 're dahâiwa'utu za'ra mono wa, dama 're ãrowê za'ra mono ne, te za oto ta norĩ hã rowê uptabi na 're hâimana za'ra.

16 ãne na, wa za oto aima ãma romnhimiré'é za'ra wa'wa. ã'u'ëtê wapu hã da te 're 'manharĩ za'ra mono wamhã, sebre õ ré, te za syry na da te 're po'o za'ra, 'Re ãhâimana u'âsi mono ma, da te 're sômri za'ra mono da. Misi ã'u'ëtê wa'õno hã da te tãma 're sômri za'ra mono nherê, wahuré da te tãma 're ãsômri za'ra mono zé, te wasu'u. Duré ãté ni'wa hã te za 'Re ãhâimana u'âsi mono ma tinha, ãne: “ã hã wede 're ãsa mono zari hã wa aima pisutu, ate da.” ãne hã wede hã zahadu 're sa mono ré, ni'wa hã wedezari si 'Re ãhâimana u'âsi mono te da, te te tãma pisutu nherê, ãpanhipti zama ãte hã za. ã hã wedezari hã, Izarazéhé nhihudu norĩ hi'rata norĩ, te wasu'u. Duré ãpanhipti hã ta norĩ nhihudu norĩ, te wasu'u. Izarazé norĩ hi'rata norĩ hã, 'Re ãhâimana u'âsi mono ma si, 're hâimana za'ra mono da, te te 're ãpisutu za'ra mono ne, te za duré ãsihudu norĩ zama tãma 're hâimana za'ra, wedezari si 'Re ãhâimana u'âsi mono te da, da te tãma 're pisutu za'ra mono nherê, ãpanhipti zama ãte ne. 17 ãne na, wa za duré aima ãma romnhimiré'é za'ra wa'wa. ãté azeitona wede hã te a'ubuni wi 're sa, oriwera na ãsisi hã 'madâ'â ãna ãprédu hã, tede'wai õ nherê. Ta hã zudezu'õ norĩ, te wasu'u. Duré azeitona wede hãiba amo hã te duré 're sa, danho'a da te dasiwi 're ã'madâ'â pese mono hã. Ta hã zudezu norĩ, te wasu'u. Tawamhã ãté azeitona wede hã danho'a 're ãsa mono panhipti hã te za nima niwĩp si panhipti nhi'ê za'ra ni, taré simi'wara da, dasiré 're rã za'ra mono õ wa. Ta hã, zudezu norĩ hã 'Re ãhâimana u'âsi mono te te 're ãsaze za'ra mono õ norĩ, te wasu'u. ãté a'ubuni wi azeitona wede 're ãsa mono panhipti hã te za misi wê'ê ni, azeitona wede hãiba amo hã dama ã'madâ'â pese u ãwede wãi wa, da te ãma wasisi da, dasiré oto 're rãi mono da. Ta hã, zudezu'õ norĩ ãma, 'Re ãhâimana u'âsi mono, oto ãma 're ãsib'a'uwê za'ra mono zé, te wasu'u. Tawamhã azeitona wede, dama ã'madâ'â pese wede wa'u na te za oto tipanhipti prédu, wê na, a'ubuni wi azeitona wede 're ãsa mono panhipti hã rob'rãi wede amoi u, da te ãma ãwasi hã. Tane duré, zudezu norĩ ma, 'Re ãhâimana u'âsi mono hã marĩ wê na tãma 're ãsõprub za'ra mono zé hã, te duré aima 're hâimana za'ra wa'wa oto, zudezu'õ norĩ na 're aihâimana za'ra wa'aba mono ma hã. 18 Taha wa, rob'rãi wede, dama ã'madâ'â pese panhipti hã 're rã za'ra mono õ wa, da te 're ãsi'ê za'ra mono ne, 'Re ãhâimana u'âsi mono a'â te te siwi 're ãawê'õ mono norĩ ma, aipire na tãma 're aihâimana za'ra wa'aba mono zém na, asina 're sa'ra wa'aba mono õ di za. E ãwede panhipti wa'ui hawi, te ãwede zari hã 're prédu za'ra. Mare di.

Ĩwede zari hawip si, te ĩwede panhipti hã 're prédub za'ra. Tane, a norĩ wa'wa hã zudezu norĩ ma, aipire na 're aihâimana za'ra wa'aba mono õ di. Taha wa, aipire na tãma 're aihâimana za'ra wa'aba mono zém na, 'rãwi asina 're aiwata waihu'u za'ra wa'aba mono õ di za.

19 Zudezu'õ norĩ, átê ãhã wasu'u zarina, te za ãne asima 're ĩnharĩ za'ra wa'aba mo: “Re ĩhâimana u'âsi mono hã rob'rãi wede panhipti, da te 're ĩsi'ẽ za'ra mono ne, e marĩ da, ma tô te te siwi 're awẽ'õ, zudezu norĩ hã. Wa norĩ hã ĩwa'rãmi 're wahâimana za'ra mono da, ma tô ta norĩ hã te te siwi 're awẽ'õ. Rob'rãi wede amo panhipti hã ĩwede amo na da te ãma 're ĩwasisi za'ra mono ne, wa oto wa norĩ hã 're wahâimana za'ra, ĩ'upana za'ra.” 20 ãne na asima 're nharĩ za'ra wa'aba mono wamhã, ĩ'uwaibaba te za tô asima ãma 're ĩrowaihu'u za'ra wa'aba mo, ta norĩ ãma hã. Ta norĩ hã ma tô te te 're awẽ'õ tô siwi, te te 're saze za'ra mono õ wa. A norĩ wa'aba si 're sazei pese za'ra wa'aba mono wa, te tô ta norĩ wa'rãmi 're aihâimana za'ra wa'aba mo. Tane nherẽ, a norĩ wa'wa hã asina 're aiwata za'ra wa'aba mono õ di za. Tõ'ã. Taha wa, te za 'Re ĩhâimana u'âsi mono si asiwi 're ĩwazéb za'ra wa'aba mo. 21 E 'Re ĩhâimana u'âsi mono hã zudezu norĩ ma, tinhimihâzé te te tãma 're ba'a za'ra mono õ nherẽ, te za bété a norĩ wa'aba ma tinhimihâzé hã te te aima 're ba'a za'ra wa'wa, tiwi 're aipizari za'ra wa'aba mono wamhã. Mare di. Te za tô te te 're aihã za'ra wa'wa, tiwi 're aipizari za'ra wa'aba mono wamhã. Taha wa, te za 'Re ĩhâimana u'âsi mono si asiwi 're ĩwazé pese za'ra wa'aba mo. 22 ãhã wasu'u na, wa za 'Re ĩhâimana u'âsi mono nhimizawi pese zé hã ãma waihu'u za'ra ni. ĩsimihâzé pire na zama, wa za duré ãma waihu'u pese za'ra ni. Tiwi 're ĩsi'marõpãrĩ pese za'ra mono norĩ si, te za te te 're ahã za'ra za'ëtê. Tane nherẽ, a norĩ wa'wa hã 'Re ĩhâimana u'âsi mono te te 're asawi pese za'ra wa'aba mono zéb zarina, marĩ ĩwẽ na te te 're aipawaptob za'ra wa'aba mono zéb da hã, tãma asina 're uwaimrami u'âsi za'ra wa'aba mono wamhã, te za tô rowẽ hã te te aima 're pisutu u'âsi za'ra wa'wa, hãiwa hawi, ai'ãma 're ĩpẽ'ézé za'ra wa'aba mono zéb zarina. ãne na tãma asina 're uwaimrami za'ra wa'aba mono õ wamhã, a norĩ wa'aba zama te za te te siwi 're aiwẽ'õ pese za'ra wa'wa, rob'rãi wede panhipti hã 're 'rã za'ra mono õ wa, da te 're ĩsi'ẽ za'ra mono ne. 23 Duré zudezu norĩ hã Zezusihi zazei'õ'wa na 're ĩhâimana za'ra mono norĩ hã, 'Re ĩhâimana u'âsi mono u oto 're sipizari za'ra mono wamhã, te za oto apã ãma 're sib'a'uwẽ za'ra, ta norĩ ãma. ãne hã 'Re ĩhâimana u'âsi mono ma, waihu'u pese di, zudezu norĩ ma, apã te te 're ĩmanharĩ wẽ za'ra mono zéb da hã. 24 ãne na, wa za oto rowasu'u na aima 'rãsutu za'ra wa'wa, azeitona wede panhipti wasu'u na ãma ĩsimiré'ézém na hã. A norĩ wa'wa hã zudezu'õ na 're aihâimana za'ra wa'aba

mono norĩ hã, a'ubuni wi azeitona wede panhipti, da te 'maiwẽ'ëi wa, azeitona wede dama ã'madâ'â pese wede u, da te ãma ãwede wasisi ne, te oto simisutu 're aihâimana za'ra wa'aba mo, zudezu norĩ me. Duré zudezu norĩ hã azeitona wede dama ã'madâ'â pese panhipti ne, te 're hâimana za'ra. Taha wede panhipti hã da te 're si'ëi mono wa, da te 're ãsãmra mono hã ã'madâ'â'wai ma, tãma wapure di, tô ãwede na apã te te ãma 're ã'ato mono da hã. Tane duré, 'Re ãhâimana u'ãsi mono ma hã wapure di, zudezu norĩ ãma apã 're ãsib'a'uwẽ za'ra mono zéb da hã, ta norĩ hã tiwi 're sipizari za'ra mono nherẽ, aré.

Zudezu norĩ hã, ahã na 'Re ãhâimana u'ãsi mono u, za apã 're ãsipizari za'ra mono zé wasu'u

25 ãsisãnawã norĩ, zudezu'õ na da te 're aiwaptẽrẽ za'ra wa'aba mono norĩ hã, marĩ aré dama ãwaihu'u'õ na roti pire wasu'uzém na wa za oto aima rowasu'u za'ra wa'wa, asimiza'rese ãna 're aihâimana za'ra wa'aba mono tã da. Zudezu norĩ upana, 'Re ãhâimana u'ãsi mono hã ai'ãma wa'aba si 're sib'a'uwẽ mono newa, 'rãwi asi'ãma 're aiwata za'ra wa'aba mono tã da, wa za oto ãne na aima rowasu'u za'ra wa'wa. Izarazéhé nhihudu norĩ hã 'Re ãhâimana u'ãsi mono wi, pẽẽ tete uptabi na 're hâimana za'ra mono nherẽ, pẽẽ tete u'ãsi, tiwi 're hâimana za'ra mono õ di za. Duréihã, 'Re ãhâimana u'ãsi mono te te sima ãpisutu sirõmo zéb zarina, zudezu'õ norĩ hã da'ahã uptabi na Cristu za da te 're ãsaze za'ra mono norĩ za'ratazê hã, oto ãwa waptã'ã wapsi, te za oto zudezu norĩ hã ahã uptabi na ãtẽme 're sipizari za'ra, õhõ ãma si oto 're nomro mono da. 26 ãne 'Re ãhâimana u'ãsi mono te te 're ãsõ'reptu za'ra mono zéb da hã, Izarazéhé nhihudu norĩ hã. ãne na ma tô duréihã Iza'iza hã ãma rob'ui'ére siro, ta norĩ ãma hã:

“Danho'reptui'wa da hã, Zeruzarẽ ãma Si'ã na sa'a nhisi ãma, dasiré za 're ãhâimana mono hã, tame.

Ta hã Zacoho nhihudu norĩ 're ãwasété za'ra mono zé hã te za te te tãma 're aparĩ.

27 'Re ãhâimana u'ãsi mono hã ma tô ta norĩ ãma tinhimirosa'rada hã waihu'u siro, ãne: ‘Ta norĩ ma, te ãropisutuzé hã wa za tô tãma ãma uwaimrami za'ra, ãwasédé te tãma 're ã'aparĩ mono zém na.’ ”

ãne Iza'iza hã ta norĩ ãma te te ãrob'ui'érezé wasu'u hã.

28 Zudezu norĩ hã Cristuhu wasu'uwẽ hã ma tô ahã na te te siwi 're wẽ'õ za'ra. Taha wa, te oto 'Re ãhâimana u'ãsi mono nhitob'ru ne 're hâimana za'ra. Taha wa'rãmi, ma tô ai'ãma 're siwadi za'ra wa'wa, asiré zudezu'õ norĩ ãma hã. Tane nherẽ, ãsib'a'uwẽ 're nomro mono da, te te pisutu za'ra wa, te ta norĩ hã te te 're azawi pese u'ãsi sima,

ta norĩ hi'rata ma, te te sina ĩropisutu za'ra zéb zarina. **29** 'Re ĩhâimana u'âsi mono te te sima 're da'apisutu mono nherẽ, duré marĩ ĩwẽ na dama 're sôprub za'ra mono nherẽ, e te za tinhimirosa'rata na te te âma 're saprĩ. Mare di. Misi haré, ĩsimirosa'rada hã te tãma 're hâimana u'âsi. **30** Duréihã, aih'i'rata norĩ wa'wa hã 'Re ĩhâimana u'âsi mono nhimiroti hã te te 're wapari za'ra mono âna, ma tô aré 're hâimana za'ra, zudezu'õ norĩ hã. Tane nherẽ, zudezu norĩ hã 'Re ĩhâimana u'âsi mono si te te 're sazei pese za'ra mono õ wa, ma tô oto ai'ãma 're pê'êzé za'ra wa'wa, ai'ãma 're sib'auwẽ za'ra wa'aba mono da, zudezu'õ 're aihâimana za'ra wa'aba mono nherẽ. **31** A norĩ wa'wa hã aré asimipari âna 're anomro aba mono nherẽ, ai'ãma 're ĩpê'êzé za'ra wa'aba mono ne, te za oto duré zudezu norĩ âma zama 're pê'êzé 'Re ĩhâimana u'âsi mono hã, po're âna duré ta norĩ hã tiwi 're hâimana za'ra mono nherẽ. **32** 'Re ĩhâimana u'âsi mono wi, danhimipari âna 're danomro mono wa, ma tô te te siwi 're da'awẽ'õ pese, dawasédé hã te te da'ãma 're ĩ'ab'madâ'â mono hawi. Dazazéb 're, da te 're danheme mono wa, apâ dasi'uihã na 're ĩdawairébé waihu'u mono õ ne, dawasété hawi 'rãwi 're dasisõ'reptui waihu'u za'ra mono õ di. Taha na, dasi'uihã na da te dasina 're waihu'u za'ra mono da, ma tô te te siwi 're da'awẽ'õ. Uburé da'ãma 're pê'êzé mono da, ma tô âne hã te te dama 're apisutu, 'Re ĩhâimana u'âsi mono hã.

Īwaihu'u pese na 'Re ĩhâimana u'âsi mono wasu'u

33 'Re ĩhâimana u'âsi mono hã uburé da'ãma 're ĩsiwamri mono zé hã tãma sa'êtẽ uptabi di, te te dama 're ĩ'ab'manharĩ wẽ mono zéb da hã. Īwaihu'u pe hã tãma sa'êtẽ uptabi di duré. E 'wa hã te za marĩ hã te te sima 're ĩ'apisutu mono zé hã tiwi waihu'u. E 'wa hã te za duré tiwi waihu'u, uburé marĩ hã te te 're ĩ'ab'manharĩ mono zé hã. **34** Duréihã Iza'iza hã ma tô âne na âma rob'ui'ére:

“E 'wai ma, Wanhib'apito nhimirosa'rada hã waihu'u pese di.
E 'wa hã roti na tãma ĩwa'rãmi'wa da hã, te 're hâimana.
Robaba di.”

35 Wahi'rata hãiba amo hã ma tô duré âne na âma rob'ui'ére, Zo na ĩsisi hã:

“Re ĩhâimana u'âsi mono si, roptede'wa 're hâimana mono nherẽ, e niha te za ni'wa hã marĩ hã tãma tisõ, ĩwa'rãmi marĩ na te te tãma ĩwa'âbã da hã. Âne hã robaba uptabi di, tãma hã.”

Âne ma tô Zo hã rob'ui'ére, duréihã.

36 'Re ĩhâimana u'âsi mono si ma tô uburé te te aropoto, sima. Taha wa, te uburé marĩ hã te te 're ab'madâ'â, tiwaihu'u pese na. Âne wa, 'Re ĩhâimana u'âsi mono âma, aihĩni, âma 're wawata u'âsi za'ra wa'aba mono za. Tane tô.

'Re ìhâimana u'âsi mono ma, 're ìdasisômri za'ra mono zé wasu'u

12 ¹ Ìsisānawā norī, 'Re ìhâimana u'âsi mono hã e wa'āma 're pē'ēzé mono ò di, wa'āma 're ìsiwārī mono zéb da hã. Wa'āma 're ìpē'ēzé mono zé hã, tãma sa'ētē uptabi di. Taha wa, wa za oto aima roti pese za'ra wa'wa, āne na hã. 'Re ìhâimana u'âsi mono ma si, te za 're asisômri u'âsi za'ra wa'aba mo, tiwi 're asisawī za'ra wa'aba mono āna. Taha ma si, te za aiwē uptabi na tãma 're aihâimana za'ra wa'aba mo, te te 're ai'madâ'â wē u'âsi za'ra wa'aba mono da. Āhã zarina, āma 're anomro wē u'âsi aba mono wamhã, taha si tô sena, āma 're ìaiwata za'ra wa'aba mono zé hã. ² Ti'ai āma dahâimana wasété na 're ìdanomro mono norī āma hã, 're sasômri za'ra wa'aba mono ò di za. 'Re ìhâimana u'âsi mono wi si, te za 're ìrowaptērē u'âsi za'ra wa'aba mo, asimirosa'rata wē na si, aipē'ē 're, 're aihâimana za'ra wa'aba mono zé hã te te aima 're pisutu za'ra wa'aba mono da, 're aihâimana za'ra wa'aba mono zép tém na si, oto 're anomro aba mono da. Tawapsi te za 'Re ìhâimana u'âsi mono, te te aima 're ìpisutu za'ra wa'aba mono hã asina 're ìwaihu'u pese za'ra wa'aba mo, marī ìwē si tãma 're ìmanharī za'ra wa'aba mono zém na hã.

³ 'Re ìhâimana u'âsi mono hã tinhimizawi pese zéb zarina, ma tô ìpisutu, ìsadawa wasu'u'wa na oto 're ìhâimana mono da. Taha wa, wa za oto āne na aima roti pese za'ra wa'wa. Dama aipire na, duré dama aiwē na 're aihâimana za'ra wa'aba mono ò nherē, râwi aipire na 're asi'madâ'â za'ra wa'aba mono ò di za. 'Re ìhâimana u'âsi mono, ma tô te te sima 're aipisutu za'ra wa'wa, ôhō āma si oto 're anomro aba mono da. Tane nherē, aihīni ìsazei'wa, asiré 're anomro aba mono nherē, ni'wam norī si te ìsazei pese 'wa hã 're hâimana za'ra. Duré ni'wam norī hã ìsazei prāi 'wa, te 're hâimana za'ra. ìsazei prāi 'wa norī hã 're sazei pese za'ra wa'aba mono newa, râwi asi'āma 're rosa'rata za'ra wa'aba mono ò di za, 're sazei pese za'ra wa'aba mono ò nherē. ⁴ Dahâiba misi nherē, dahâiba na hã marī hã dama 're ìhâimana za'ra mono hã ahâ di, tite mono bâ te te 're ìromhuri za'ra mono zéb da hã, dapara hã duré danhib'rada hã, duré dato hã, uburé ìrē 're ìdahâimana za'ra mono hã. ⁵ Tane hã wa oto wa norī hã wasiré ìsazei'wa norī hã Cristuhu āma, wa'ahâ nherē, 're wahâimana za'ra, simisutu. Dahâiba misi nherē, dahâiba na marī hã ahâ na dama 're ìhâimana za'ra mono hã, tite mono bâ te te 're ìromhuri za'ra mono ne, wa oto wa norī hã wasiré ìsazei'wa norī hã wanhimromhuri mono bâ sipu'u pese na, wa te 're romhuri za'ra, 'Re ìhâimana u'âsi mono ma, dahâiba misi 're ìdahâimana za'ra mono ne, simisutu wasiré 're wahâimana za'ra mono wa oto. ⁶ Taha wa, 'Re ìhâimana u'âsi mono hã simizawi pese uptabi wa, romhuri te te wama 're ì'apisutu mono zéb zarina, wasipu'u pese

na, wa za wa te tãma 're romhuri za'ra, wate mono bâ, ãma 're ïwasipawaptob za'ra mono zéb da hã. 'Re ïhâimana u'âsi mono zadawa wasu'u na, sena na ïsazei'wa norĩ ma si te te ãma 're ïrowasu'u za'ra mono zéb da, te te sima 're wa'apisutu mono wamhã, taha zarina si, wa za tô ãma 're wasipawaptob u'âsi za'ra. ïsimiroti zarina si, wa za wa te 're sadawa wasu'u za'ra, wasiré ïsazei'wa norĩ ma. **7** Duré ni'wam norĩ hã ïsazei'wa norĩ pawapto'wa da, te te sima 're apisutu mono wamhã, ta norĩ zama te za tô taha zarina si te te tãma 're dapawaptob u'âsi za'ra. Duré 'Re ïhâimana u'âsi mono nhimiroti na dama rowahutu'wa da, te te sima 're ï'apisutu mono norĩ hã te za tô ta norĩ zama ïsarina si te te ãma 're dapawaptob za'ra. **8** Duré ni'wam norĩ hã 'Re ïhâimana u'âsi mono hã te te sima 're apisutu mono wamhã, te za ïsazei'wa norĩ ma, ïsimiroti zarina si te te 're rowahutu za'ra, te te 're wapari za'ra mono wa, pẽẽ toi u'âsi, ãma 're hâimana za'ra mono da, siptete sina. Duré ni'wam norĩ hã tinhibrom na dama 're sôprub za'ra mono da, te te sima 're apisutu mono wamhã, te za tô ta norĩ hã dawĩ 're sôti za'ra mono ãna, dama ãma 're sôprub za'ra, sa'ëtẽ na. Duré ni'wam norĩ hã ïsazei'wa norĩ 'madâ'â'wa da, te te 're apisutu mono wamhã, te za tô simi'ẽ na te te 're 'madâ'â u'âsi za'ra, ta norĩ zama. Duré ni'wam norĩ hã te te sima 're apisutu mono wamhã, ta norĩ zama te za da'ãma 're pẽ'ézé za'ra, dahâzé ré norĩ ãma, duré dawĩ 're ïrobzei'õ za'ra mono norĩ ãma. To sina, te za ãne zarina te te 're dapawaptob za'ra, ta norĩ hã. ãne wa za wa te wasima 're rob'ma'wamarĩ, romhuri mono bâ, dahâiba hã misi nherẽ, dahâiba na marĩ hã ahã na dama 're ïhâimana za'ra mono hã tite mono bâ te te sima 're ïromhuri za'ra mono ne.

9 Taré asimizawizé hã aima 're hâimana za'ra wa'aba mono tõ da, te za tô sena asimizawi pese zé hã aima 're hâimana u'âsi za'ra wa'wa. Uburé marĩ wasété nhiti, te za 're aihâimana za'ra wa'aba mo, asiwi 're wẽõ pese za'ra wa'aba mono sina. Uburé aihâimanazé ïwẽ na si te za oto 're aihâimana za'ra wa'aba mo. **10** Dasisãnawãĩ uptabi hã 're ïdasisawi pese za'ra mono ne, te za a norĩ wa'wa hã 're asisawi pese za'ra wa'aba mo, Cristuhu ãma asisãnawã oto asiré 're aihâimana za'ra wa'aba mono wa. Te za duré 're asiwazé pese za'ra wa'aba mo. **11** Aiwa'a ãna, te za duré 're ïromhuri pese za'ra wa'aba mo. Wanhib'apito ma si, te za asimi'ei uptabi na 're ïromhuri u'âsi za'ra wa'aba mo, aihâiba tiwi 're sawi za'ra wa'aba mono ãna. **12** Uburé marĩ ïwẽ hã 'Re ïhâimana u'âsi mono, za te te wama 're ï'apisutu mono zéb zô, wa za sô 're wanhimipari za'ra mono sina, 're wahâimana za'ra, wato sina. Zesusihi zazei'wa oto 're anomro aba mono wa, da te 're ai'ruiwapari za'ra wa'aba mono nherẽ, te za asiptete sina ãma 're anomro u'âsi aba mo. 'Re ïhâimana u'âsi mono

ma, te za 're aimreme zusi u'âsi aba mo. **13** Asiré ïsazei'wa norĩ wi, marĩ zô tiwi 're ïrowaptâ'â za'ra mono zéb zarina, te za asimarĩ na 're ïpawaptob za'ra wa'aba mo. Duré darob amoi hawi atême 're sihutu aba mono wamhã, te za sô 're atob'uzu za'ra wa'aba mo, asiré ïsazei'wa norĩ zô hã, asôrôwa u 're 'mazasi za'ra wa'aba mono da.

14 Duré Zezusihi zazei'wa 're anomro aba mono 'ru te, da te 're ai'ruiwapari za'ra wa'aba mono wa, da te aima 're rob'manharĩ wasété za'ra wa'aba mono wamhã, ãne wamhã, 'Re ïhâimana u'âsi mono ma, 're dahâiba 'ru za'ra wa'aba mono ô di za, te te 're da'ahã za'ra mono da. Rowẽ hã te te tãma 're ï'apisutu mono da si, te za da'ãma tãma 're aimreme zusi aba mo. **15** Ni'wam norĩ hã toi uptabi na 're hâimana za'ra mono wamhã, ïsine te za 're atoi uptabi za'ra wa'aba mo, ïsiré. Duré ni'wam norĩ hã pẽ'ézé uptabi na 're hâimana za'ra mono wamhã, ïsine te za duré aipẽ'ézé uptabi na ïsarina 're aihâimana za'ra wa'aba mo. **16** Duré simisutu te za asimirosa'rata na 're asisazei pese za'ra wa'aba mo, asiré ïsazei'wa nherẽ, asisada 're rosa'rata wasété za'ra wa'aba mono tã da. Duré aiwẽ na 'rãwi asina 're aiwata za'ra wa'aba mono ô di za. Duré dama ïpire norĩ zapari, marĩ na romhuri wapu na da te dasima 're ïromhuri za'ra mono zé hã asiwi 're wẽ'ô za'ra wa'aba mono ô di za, 're 'manharĩ za'ra wa'aba mono tã da, ta hã wapu nherẽ. Duré asiré norĩ nhipai u aiwaihu'u pese na 'rãwi asi'ãma 're rosa'rata za'ra wa'aba mono ô di za.

17 Duré da te aima 're rob'manharĩ wasété za'ra wa'aba mono wamhã, asa dama ãma 're wa'rãmi wasété za'ra wa'aba mono ô di za. Marĩ ïwẽ si 're ï'manharĩ za'ra wa'aba mono na si, te za asima 're asôpré u'âsi aba mo, ïsazei'wa 're anomro aba mono wa, da te ai'ãma 're rosa'rata wasété za'ra wa'aba mono tã da. **18** Asada 're dahâimana za'ra wa'aba mono nherẽ, rowẽ na si dasiré 're aihâimana u'âsi za'ra wa'aba mono da, te za asina 're ïrosa'rata wẽ u'âsi za'ra wa'aba mo. **19** Duré nimahã na, da te aima 're rob'manharĩ wasété za'ra wa'aba mono wamhã, 'Re ïhâimana u'âsi mono upana asi'uihã na 'rãwi 're asi'ruiwa'ãbã za'ra wa'aba mono ô di za. Taha si, tinhimihâzém na te te 're ai'ruiwa'ãbã za'ra wa'aba mono da, te za ôhõ si 're ï'madã'ã za'ra wa'aba mo. Duréihã ãne na ma tô Wanhib'apito mreme na rob'ui'ére, Mozési hã:

“Wa hã ïsiwaprosi, wa za te 're da'a'ruiwa'ãbã. ïwétési, wa za te dama ãma 're awa'rãmi, marĩ, da te 're ï'manharĩ wasété za'ra mono zém na hã.”

Ãne duréihã Wanhib'apito mreme na rob'ui'ére wasu'u hã, ïbaihã na hã. **20** Duré ãne 'Re ïhâimana u'âsi mono nhimiroti amo na rob'ui'ére wasu'u hã:

“Asitob'ru norĩ hã mra te te 're sépata za'ra mono wamhã, ïsa na te za 're ïpawaptob za'ra wa'aba mo. Duré 'rubu

wamhã, te za tãma 're ãõb za'ra wa'aba mo. ãne zarina, asitob'ru norĩ ma, 're 'manharĩ wẽ za'ra wa'aba mono wamhã, ta norĩ hã 'rãwi 're siwaihu'u za'ra mono wa, te za aima 're siséb za'ra wa'wa.”

ãne duréihã 'Re ãhãimana u'ãsi mono nhimiroti na rob'ui'éré wasu'u hã. ãhã zarina si te za dama 're ãmanharĩ wẽ u'ãsi za'ra wa'aba mo. Taha wa, a norĩ wa'wa hã 'rãwi asi'uihã na 're asi'ruiwa'ãbã za'ra wa'aba mono õ di za. ²¹ ãhã wasu'u na, wa za oto ãnhimirowasu'u na hã aima 'rãsutu za'ra wa'wa. 'Rãwi dasi'uihã na 're ãdasi'ruiwa'ãbã za'ra mono zém na hã da'ãma 're sasõmri za'ra wa'aba mono õ di za. Marĩ ãwẽ si te za dama 're ãmanharĩ wẽ u'ãsi za'ra wa'aba mo, taha na dahãimana wasédé hã dawĩ 're uprosi za'ra wa'aba mono da, duré taha zarina, tã sena oto ai'ãma 're dasiwadi za'ra wa'aba mono da.

Ti'ai ãma dama ãpire norĩ nhimiroti, da te 're ãwapari pese za'ra mono zéb da na rowasu'u

13 ¹ Ti'ai ãma dama ãpire norĩ hã, roti'wa norĩ hã si'uihã na 're sipisutu za'ra mono õ di, dama 're si'apito za'ra mono da hã. 'Re ãhãimana u'ãsi mono te te 're ã'apisutu mono zarina si, te dama 're hãimana za'ra uburé. Taha wa, te za uburé aihĩni 're ãwapari pese za'ra wa'aba mo, ãsimiroti hã. ² Ni'wam norĩ hã dama ãpire norĩ nhimiroti te te siwi 're wẽ'õ za'ra mono wamhã, taha si te te siwi 're wẽ'õ za'ra mono õ di za. ã'u'ãbã te za duré 'Re ãhãimana u'ãsi mono te te 're ã'apisutu mono zé hã te te siwi 're wẽ'õ za'ra. ãne hã ni'wam norĩ te te 're 'manharĩ wasété za'ra mono wamhã, 'rãwi te za si'uihã na te te sisada 're sani za'ra, ti'ai ãma dama ãpire norĩ nhimihãzê hã, 'Re ãhãimana u'ãsi mono zadawa para. ³ ãne, marĩ te te 're ãmanharĩ wasété za'ra mono norĩ si, te za dama ãpire norĩ nhimihãzê ma, 're pahi za'ra. Tanei õ di, marĩ te te 're ãmanharĩ wẽ za'ra mono norĩ hã. Dama ãpire norĩ ma, 're pahi za'ra mono õ di za. Taha wa, te za ãwẽ si 're ãmanharĩ za'ra wa'aba mo, dama ãpire norĩ ma, tãma 're aipahi za'ra wa'aba mono ãna, 're aihãimana za'ra wa'aba mono da. Tawapsi te za te te 're aiwêsãmri za'ra wa'wa, ti'ai ãma dama roti'wa norĩ hã. ⁴ Ta norĩ hã te 'Re ãhãimana u'ãsi mono zadawa para, te te 're romhuri za'ra, ãwẽ na si te te 're aipawaptob za'ra wa'aba mono da, taha zarina, rowẽ na 're asimroi wa'aba mono da. Tane nherẽ, marĩ ãwasété si 're 'manharĩ u'ãsi za'ra wa'aba mono wamhã, te za tã tãma 're aipahi za'ra wa'aba mo. E marĩ wa. Dama ãpire norĩ hã tã sena siptete uptabi wa, te te 're ãdahã za'ra mono zéb da hã. 'Re ãhãimana u'ãsi mono zadawa para, te ãsimipari'õ norĩ hã te te 're hã za'ra. ⁵ ãne wa, te za uburé ti'ai ãma dama roti'wa norĩ nhimiroti hã 're ãwapari pese za'ra wa'aba mo, asimipari õ wa, 'Re ãhãimana u'ãsi mono te te 're aiwẽ'õ pese

za'ra wa'aba mono zéb zarina, te te 're aihâ za'ra wa'aba mono tō da. Duré 're aihâimana wẽ za'ra wa'aba mono zém na, 'Re ìhâimana u'âsi mono ma, tâma âma 're ìuwaimrami za'ra wa'aba mono na, aipẽ'ẽ 're asimirosa'rata na asina 're waihu'u pese za'ra wa'aba mono da, te za ìsarina dama ìpire norĩ nhimiroti hã 're ìwaparĩ pese za'ra wa'aba mo.

⁶ Taha wa, dama ìpire norĩ nhimipisutuzéb zarina te za duré rob'uiprazé hã syry na tâma 're ìpo'o za'ra wa'aba mo, ti'ai âma dama ìpire norĩ ma. E marĩ wa. Dama ìpire norĩ hã 'Re ìhâimana u'âsi mono zadawa para, te te 're romhuri za'ra mono wa. ⁷ Taha wa, te za tō ìsarina tâma 're ìpo'o za'ra wa'aba mo, aipawa'âbâzé hã duré uburé marĩ uiprazé hã. Te za duré tâma 're aihâimana prédub za'ra wa'aba mo, dama roti'wa norĩ ma.

'Re ìdasisawi pese za'ra mono zé wasu'u

⁸ Wa'âbâ âna, dawĩ 're ìrowaibui wa'aba mono zém na hã, taré dama 're ropisutu za'ra wa'aba mono õ di za. Te za dama âma 're ìuwaimrami za'ra wa'aba mo, dama 're ìropisutu za'ra wa'aba mono zéb zarina. Asimizawizém na si te za 're ìdazawi pese za'ra wa'aba mo. 'Re dazawi pese za'ra wa'aba mono wamhã, uburé 'Re ìhâimana u'âsi mono nhimiroti 'rata na Mozési te te ìrob'ui'érézém na te za asina tâma âma 're ìuwaimrami za'ra wa'aba mo. ⁹ Duréihã 'Re ìhâimana u'âsi mono, Mozésihi ma, te te ìwaihu'uzéb zarina te te âma dama ìrob'ui'érézé hã, âne:

“Aimro na asiwi 're asipsaihuri za'ra wa'aba mono õ di za. Duré 're danhimroi wa'aba mono õ di za. Duré dawĩ 're asipsaihuri za'ra wa'aba mono õ di za. Duré marĩ ìwẽ hã dawĩ 're ruiwaparĩ za'ra wa'aba mono õ di za.”

Ãne duréihã 'Re ìhâimana u'âsi mono nhimiroti hã, dahâimanazé mono bâ. Ã norĩ hã, duré aimawi hã ìsimiroti hã ahâ uptabi nherẽ, simisutu haré te wasu'u ìsimiroti hã, âne:

“Te za 're ìdazawi pese za'ra wa'aba mo, duré aihâimanazé hã 'rãwi asima 're ìsawi pese za'ra wa'aba mono ne.”

Ãne ìsimiroti hã sa'êtẽ uptabi nherẽ, misi ìsimiroti hã te wasu'u, simisutu haré. ¹⁰ Ni'wam norĩ hã te te 're dazawi pese za'ra mono wamhã, marĩ hã ìwasédé hã te te dama 're 'manharĩ waihu'u za'ra mono õ di za. Taha wa, ni'wam norĩ hã te te 're dazawi pese za'ra mono wamhã, ta hã uburé 'Re ìhâimana u'âsi mono nhimiroti 'madâ'â pese 'wa, te za 're hâimana za'ra.

¹¹ Zezusi hã we apâ wazó ìmorizéb u hã romhuture di oto, te te ìwanho'reptu za'ra zé hã te te oto wama ìrãsutu za'ra da hã. Cristu hã duréi, wa te wasina 're ìumnhasi na'rata za'ra mono hawim nherẽ, romhuture di oto, wama hã. Taha wa, te za oto asimiza'rese

're aihâimana za'ra wa'aba mo, darési ãna 're ãdanhotõ za'ra mono ne, asimiza'rese ãna 're aihâimana tõ za'ra wa'aba mono da. ãne na ti'ai ãma 're ãwahâimana hutu za'ra mono zé hã aima waihu'u pese za'ra wa'aba di. ãne wa, te za 're ãdazawi pese za'ra wa'aba mo.

12 Robra ãsi'utõrízéb u hã romhuture di oto, ti'ai ãma ré dawasédé, da te 're ãmanharĩ za'ra mono hã. Tãibã za oto. Cristu hã we apã morĩ wapsi, rowa'a si te za oto 're hãimana u'ãsi, robra wa'rãmi. Taha wa, robra 'rowi dawasédé, da te 're ãmanharĩ za'ra mono ne, 're wanomro mono õ di za oto. Wawasédé hã wa za oto wa te 're saharĩ pese za'ra. Duré Zezusihi nhimirowa'a na si wa za 're wanomro, robra wi wanhiptete sina ãma 're ãwahâimana za'ra mono zéb da hã, danhimnhi'ãsi na dawi 're ãdasisõpa za'ra mono ne. **13** Wawasété ãna, wa za oto 're wanomro wê, rowa'a na 're ãdanomro mono ne. Ázé wa te dame 're áhuri mono õ di za, dato ãwasété u 're dasi'rã'õtõ mono wa, siwa'ru da te 're ãhuri mono ne, 're wa'rã siwamnarĩ tõ za'ra mono da. Duré siwa'ru wahâimanazé ãwasédé hã wa te 're 'manharĩ u'ãsi za'ra mono õ di za, pi'õ na aibã na zama. Duré marĩ na 're ãwasiwê'õ za'ra mono hawi, wa te wasima 're nharĩ za'ra mono õ di za. Duré marĩ na 're wasi'ruiwapari za'ra mono õ di za. **14** Siwa'ru 'rãwi asima ãwézéb zarina, aipê'ê 're asimirosa'rata wasété aba na ãma 're rosa'rata za'ra wa'aba mono õ di za. Wanhib'apito Zezu Cristu 're ãmorízém na si te za oto 're aihâimana za'ra wa'aba mo, ãsine.

Ísazei'wa nherê, sib'uware na 're ãnomro mono norĩ wasu'u

14 ¹ Ísazei'wa nherê, sib'uware na 're ãnomro mono norĩ zô, te za asitême sô 're aihãsi aba mo. Ísimirosa'rata za'ra hã aimawi nherê, aiwab õ nherê, tãma 're nharĩ wasété za'ra wa'aba mono õ di za. Tane nherê, te za sô 're atob'uzu za'ra wa'aba mo. ² Ni'wam norĩ hã ãsazei'wa norĩ hã uburé tisazéb zô te 're sôpré, te te 're huri mono da, romnhi zô zama, 'Re ãhâimana u'ãsi mono te te tiwi 're ãsawi za'ra mono õ na, 'rãwi 're ãsisaze za'ra mono zéb zarina. Tane nherê, ni'wam norĩ hã ãsazei'wa nherê, te za romnhi hã te te siwi 're wê'õ za'ra, te te 're huri mono tõ da, 'Re ãhâimana u'ãsi mono te te tiwi 're sawi za'ra mono newa. ³ Taha wa, ni'wam norĩ hã uburé romnhi te te 're ãhuri mono norĩ hã te te siwi 're wê'õ za'ra mono õ di za, romnhi na dame 're ãsaihuri mono õ norĩ hã. Duré ni'wam norĩ, romnhi na dame 're ãsaihuri mono õ norĩ zama, te te siwi 're wê'õ za'ra mono õ di za, uburé siwa'ru romnhi te te 're ãhuri mono norĩ hã. E marĩ wa. 'Re ãhâimana u'ãsi mono hã ma tõ te te 're awêsãmri õ norĩ hã, romnhi na dame 're ãsaihuri mono õ norĩ me. ⁴ E a norĩ wa'wa hã ãsib'apito za'ra wa'aba bâ, te za marĩ tiwi 're ãwê'õ za'ra wa'aba mo, ãsib'apito upana. Taha si te za te te 're

waihu'u za'ra, ihâimana wasété na, duré ihâimana wě na zama. Tawamhã isazei'wa norĩ hã te za siptete u'âsi 're hâimana za'ra. E marĩ wa. Wanhib'apito 'Re ihâimana u'âsi mono hã tiwaihu'u pese na te te 're siptete u'âsi za'ra mono wa.

⁵ Ni'wam norĩ hã isazei'wa norĩ hã te 'râwi te te si'ãma 're rosa'rata za'ra, nima hã bådâ hã romhuri'özé hã iwa 're irere'e mono sidâpâsi, bådâ dama 're ipire za'ra mono zém na hã. Duré ni'wam norĩ, isazei'wa norĩ hã te te da'ãma 're rosa'rata za'ra asa, aiwapsi bådâ hã uburé dama 're hâimana za'ra mono nherẽ, ãma 're idahâimana za'ra mono zéb da hã. Taha wa, ate wa'aba mono bâ romhuri'özé båtâ mono na asimirosa'rata mono bâ te za asiptete sina ãma 're aihâimana za'ra wa'aba mo, tô õhõ na si. ⁶ Ta norĩ hã nimahã bådâ hã romhuri'özé hã dama 're ipire za'ra mono zém na te te si'ãma 're irosa'rata za'ra mono norĩ hã, Wanhib'apito ãma 're wata za'ra mono da, te ãne te te 're 'manharĩ za'ra. Duré ni'wam norĩ hã uburé siwa'ru romnhi te te 're ihuri mono norĩ hã te ãne te te 're 'manharĩ za'ra, Wanhib'apito 'Re ihâimana u'âsi mono ãma 're wata za'ra mono da, dasa na dama 're sõpru mono wa. Duré ni'wam norĩ hã romnhi na dame 're isaihuri mono õ norĩ hã, te ãne duré te te 're 'manharĩ za'ra aiwa, 'Re ihâimana u'âsi mono ãma 're wata za'ra mono da, waihu'u pese wa, duré sõprub uptabi wa. ⁷⁻⁸ Wasi'uihã na 'râwi wahâiba misire nherẽ, wasina 're wahâimana za'ra mono õ di za. Wanhib'apito te te wama 're i'apisutu mono zéb zarina si, wa tãma 're wahâimana za'ra. Duré wasi'uihã na bådâ hã wadâ'ázé hã wa te wasima 're pisutu waihu'u za'ra mono õ di za. Wanhib'apito te te wa'ãma 're i'apisutu mono zéb zarina si, wa za 're wadâ'â za'ra, õhõ ma. Taha wa, wahâiba ré 're wahâimana za'ra mono ré, duré oto 're wadâ'â za'ra mono wamhã, isib'a'uwě, wa za 're wahâimana u'âsi za'ra, simisutu. ⁹ Cristu hã dâ'â nherẽ, ma tô apâ hâiwa'udu, hâiba ré 're ihâimana za'ra mono norĩ nhib'apito da hã, duré 're idâ'â za'ra mono norĩ nhib'apito da zama. Uburé isazei'wa norĩ nhib'apito da, ma tô hâiwa'udu apâ. Taha wa, wa isib'a'uwě 're wahâimana u'âsi za'ra oto, simisutu. ¹⁰ Tane nherẽ, e marĩ wa, te bété asisãnawã norĩ hã 're iwě'õ za'ra wa'aba mo, asiré isazei'wa 're anomro aba mono nherẽ. E marĩ wa, te 're i'ruwapari u'âsi za'ra wa'aba mo, asisãnawã nherẽ. Niwapsi wa za uburé 'Re ihâimana u'âsi mono nho're aimasam ni, te te wa'awaihu'u da, wahâimana wě na, wahâimana wasété na zama. Tamep si za te te da'awě'õ na dâ'âsina, asi'uihã na 're asiwě'õ pese za'ra wa'aba mono õ di za, ti'ab ré. ¹¹ Duréihã 'Re ihâimana u'âsi mono zadawa wasu'u'wa, ma tô ãne na ãma rob'ui'ééré, imreme na:

“Wa hã uburé Danhib'apito, tô sena 're ihâimana mono zé hã aima waihu'u pese za'ra wa'aba di. Duré tô sena aima

ĩsiwasu'u za'ra wa'aba zéb zarina, wa duré tô sena aima ropisutu za'ra wa'wa. Āne, wa aima ropisutu za'ra wa'wa. Niwapsi te za a'uwē mono bâ dahi'rātītō ĩnho're ĩma ana ni, dama ĩpire uptabi wa. Tawamhã tame dapoto mono bâ te za ĩnhisi za'ra ni, ĩnhisi na 'Re ĩhâimana u'âsi mono na." Āne ma tô ĩbaihã na ãma rob'ui'ééré, 'Re ĩhâimana u'âsi mono mreme na rob'ui'ééré'wa hã.

12 Tamep si, wa za oto wasi'uihã na tãma wasiwasu'u za'ra ni wahãiba mono bâ, ti'ab ré wahâimanazém na, uburé marĩ hã wa te 're ĩmanharĩ za'ra mono zém na hã.

13 Taha wa, wasiré ĩsazei'wa nherē, 're ĩwasiwē'õ za'ra mono zé hã wa za oto rēme pese za'ra ni. Āne zô si, te za asina 're asõpré wa'aba mo, marĩ ĩwē hã 're ĩmanharĩ za'ra wa'aba mono zéb zô. Marĩ hã 're 'manharĩ za'ra wa'aba mono ré, asiré ĩsazei'wa norĩ hã te te 're ai'madâ'â za'ra wa'aba mono wa, asarina wa'aba tiwasété na 're si'marõpãrĩ tō za'ra mono da, te za marĩ ĩwē si 're ĩmanharĩ u'âsi za'ra wa'aba mo. 14 Wa hã Wanhib'apito Zezusihi ãma 're ĩhâimana mono wa, wa tô ĩsina waihu'u sena na, uburé dasa hã ĩwē na hã, duré ĩwasété õ na si. Tane nherē, ni'wam norĩ hã te za ãne hã te te ãma 're rosa'rata upa za'ra: "Ā hã romnhi hã, wasétére di. 'Re ĩhâimana u'âsi mono ma hã wē õ di, wa te 're ĩhuri mono da hã." Āne hã ni'wam norĩ hã te te ãma 're rosa'rata za'ra mono wamhã, õ norĩ ma si, romnhi hã wasété di tô. Tane nherē, te te siwi 're wē'õ za'ra mono nherē, te te 're huri mono wamhã, dawasédé te wasu'u.

15 Āté marĩ dasa hã te za 're ĩhuri aba mo, asiré ĩsazei'wa norĩ te te siwi 're ĩwē'õ za'ra mono hã. Tawamhã, 're huri aba mono wamhã, 'Re ĩhâimana u'âsi mono te te dawĩ 're awē'õ mono newa, ãté te za ãne na tiwi 're ĩrobzei'õ za'ra wa'aba mo, tô õ norĩ wi hã. Āne wamhã, asimizawi pese zé hã tãma ãma 're uwaimrami za'ra wa'aba mono õ di za. Tãma sawi uptabi za'ra wa, ma tô Cristu hã sada tidâ'â za'ra. Taha wa, romnhi hã asiré ĩsazei'wa norĩ te te 're ĩwē'õ za'ra mono hã, 're huri aba mono õ di za, 're huri aba mono wa, ta norĩ hã asa na tiwi 're ĩrobzei'õ za'ra mono zéb zarina, tiwasété na 're ĩsi'marõpãrĩ za'ra mono na 're si'utõrĩ tō mono da.

16 Āne hã marĩ hã aima wasété aba õ nherē, 're 'manharĩ za'ra wa'aba mono õ di za, da te 're aiwasu'u wasété za'ra wa'aba mono tō da. 17 E marĩ wa. 'Re ĩhâimana u'âsi mono hã ĩsazei'wa norĩ ãma 're ĩsib'a'uwē mono zé hã, dasa hã da te 're ĩwē'õ za'ra mono zé, te te wasu'u õ di. Uburé marĩ hã da te 're ĩ'ãhuri mono zéb zama te te wasu'u õ di duré. E marĩ te wasu'u tawamhã, 'Re ĩhâimana u'âsi mono, da'ãma 're ĩsib'a'uwē mono zé hã. Ta hã 'Re ĩhâimana u'âsi mono nhimiroti zarina 're ĩdanomro wē mono zé, te wasu'u. Duré 'Re ĩhâimana u'âsi mono, Tipē'ězani na te te 're ĩda'apawapto mono

zéb zarina, rowě uptabi na 're ĩdanomro mono zé, te wasu'u, dato sina. **18** Āne na ni'wam norĩ hã Cristuhu ma, te te 're romhuri wě za'ra mono wamhã, 'Re ĩhâimana u'âsi mono ma, te za te te sina 're rowě zani za'ra, uburé 're ĩhâimana wě za'ra mono zém na. Tawamhã te za duré da te 're wēsãmri za'ra, ti'ai āma ré.

19 Taha wa, rowě na wasiré 're ĩwahâimana za'ra mono zéb zô si, wa za wasima 're wanhopré. Wanhib'apito āma wahâimana nhiptete u'âsi 're wanomro mono da, 're ĩwasipawaptob za'ra mono zém na, wa za duré 're wanomro u'âsi. **20** Tawamhã dasa siwa'ru 're huri aba mono wa, 'Re ĩhâimana u'âsi mono, danhiptete sina āma 're ĩdanomro mono zéb da, te te da'āma 're ĩromhuri wě mono zé hã tiwi 're uprosi za'ra wa'aba mono tō da, ātê 're huri aba mono ô di za, siwa'ru dasa hã, romnhi hã. Tō sena uburé dasa hã ĩwě si da te 're ĩhuri mono da hã. Tane nherě, dasa hã siwa'ru 're huri aba mono ré, asiré ĩsazei'wa nherě, sib'uware na 're ĩnomro mono norĩ hã te te 're ai'madâ'â za'ra wa'aba mono wa, asarina wa'aba tiwasété na 're si'marôpãrĩ za'ra mono wamhã, tawamhã, aiwasédé te za tō 're ĩmanharĩ za'ra wa'aba mo. **21** Taha wa, romnhi hã siwa'ru 're huri aba mono ô di za, duré uwa 'rã wa'u ĩsé hã 're āhuri aba mono ô di za, taha zarina asiré ĩsazei'wa norĩ hã tiwasété na apâ 're si'marôpãrĩ tō za'ra mono da. Duré siwa'ru marĩ aimawimhã 're 'manharĩ za'ra wa'aba mono wa, ni'wam norĩ hã tiwasété na apâ 're si'marôpãrĩ tō za'ra mono da, 're 'manharĩ za'ra wa'aba mono ô di za. **22** 'Re ĩhâimana u'âsi mono si te te āma 're awaihu'u mono da, te za 'rãwi asima si āma 're ĩrosa'rata za'ra wa'aba mo, siwa'ru romnhi 're huri aba mono wa, āma 're ĩ'upa za'ra wa'aba mono ô zém na hã. Ni'wam norĩ hã uburé siwa'ru, tisa te te sima 're ĩwě uptabi za'ra mono zéb zarina, te te 're ĩhuri mono na, 're siwě'ô za'ra mono ô wamhã, ĩpě'ě 're tãma 're rowě uptabi za'ra mono di za. Duré ni'wam norĩ hã siwa'ru dasa hã te te siwi 're ĩwě'ô za'ra mono zéb zarina, te te 're ĩhuri mono ô na, 're siwě'ô za'ra mono ô wamhã, ĩpě'ě 're tãma 're rowě uptabi za'ra mono di za duré, āne hã aiwa. **23** Tane nherě, ni'wam norĩ hã romnhi siwa'ru te te 're huri mono nherě, 'rãwi āma 're siwawã za'ra mono wamhã, 'Re ĩhâimana u'âsi mono hã te za te te 're wě'ô za'ra, tisa na 're ĩsiwawã za'ra mono zéb zarina. Tane hã marĩ hã wa te 're 'manharĩ za'ra mono nherě, 'rãwi āma 're wasiwawã za'ra mono wamhã, taha na wa za wawasédé hã wa te 're 'manharĩ za'ra.

Īsazei'wa norĩ, prédup sina 're ĩsipawaptob za'ra mono zé wasu'u

15 ¹ Wa norĩ hã wanhiptete sina, Wanhib'apito āma, wa te 're ĩsasômri u'âsi za'ra mono norĩ hã, marĩ, wa te wasima 're ĩwě za'ra mono zéb zarina si, wa te 're 'manharĩ za'ra mono ô di za.

Wasiré ãsazei'wa nherẽ, hâimana nhib'uware na 're ãhâimana za'ra mono norĩ hã, wa za wa te 're pawaptob za'ra, hâimana nhiptete na wasiré ãma 're hâimana u'âsi za'ra mono da. ² Wasiré ãsazei'wa norĩ hã marĩ te te sima 're ãwẽ za'ra mono zéb zarina, wa za wa te ãma 're sazei pese za'ra, marĩ ãwẽ na si, wa te ãma 're pawaptob u'âsi za'ra mono da, hâimana prédub sina oto ãma 're hâimana u'âsi za'ra mono da. ³ Cristu hã bété, ti'ai ãma 're morĩ ré hã, e sima si ma tô tihâimanazéb da hã 're si'madâ'â. Mare di. 'Râwi tihâimanazém na si, 're si'madâ'â mono õ di. ãne na duréihã ma tô ni'wa hã ãwasu'u na ãma rob'ui'ére siro:

“Ïmama, ni'wam norĩ hã te te ai'ãma 're ãwasété za'ra mono norĩ hã ma tô ai'u'âbâ ããma zama te te 're wasété za'ra. Tane nherẽ, aimawi 're ãhâimana mono zéb da hã, te ãsima pisutu õ di, ãsi'uihã na hã.”

ãne na ma tô duréihã ãbaihã na ãma rob'ui'ére, ãwasu'u na hã. ⁴ Uburé 'Re ãhâimana u'âsi mono nhimiroti 'rata na rob'ui'ére hã, e taré ma tô tinhimiroti hã te te dama 're apisutu, da te ãma 're ãrob'ui'ére za'ra mono zéb da hã. Mare di. Taré te te dama 're apisutu mono õ di. ãsimiroti hã wa te 're waihu'u pese za'ra mono da, ma tô ãne hã te te dama 're apisutu. 'Re ãhâimana u'âsi mono nhimiroti 'rata na rob'ui'ére hã wa te 're sõré u'âsi za'ra mono wanhã, wanhiptete sina wa za ãma 're wahâimana u'âsi za'ra, marĩ na uburé wa te 're robzépata za'ra mono nherẽ. Wa te 're sõré u'âsi za'ra mono wanhã, te za wama 're rowẽ za'ra, wawi 're robzei'õ za'ra mono ãna, 're ãwahâimana za'ra mono zéb da hã. Õhõ umnhasi sina, wa za tô ãhã zarina si 're wahâimana za'ra, 'Re ãhâimana u'âsi mono 'rata 're ãwahâimana u'âsi za'ra mono zéb zô, wasina 're wanhimipari za'ra mono sina. ⁵ 'Re ãhâimana u'âsi mono si dapisutu'wa hã, uburé marĩ na da te 're robzépata za'ra mono nherẽ, danhiptete sina ãma 're ãdahâimana u'âsi za'ra mono da hã. Taha si te te sina dama 're ãarowẽ zani mono hã, dawi 're robzei'õ za'ra mono ãna, ãma 're ãdahâimana za'ra mono zéb da hã. Taha wa, wa tô te ãsima 're aiwẽ za'ra wa'wa, ta hã aihĩni te te 're aipawaptob za'ra wa'aba mono da, asiré ãsazei'wa norĩ hã simisutu asimirosa'rata na 're asisazei pese za'ra wa'aba mono da oto, Cristu Zezusi 're ãmorĩ wẽ zéb zarina. ⁶ Asimirosa'rata na 're asisazei u'âsi za'ra wa'aba mono wapsi, te za 'Re ãhâimana u'âsi mono ãma Wanhib'apito Zezu Cristuhu mama ãma simisutu u'âsi, ãma 're aiwata za'ra wa'aba mo.

**Zudezu'õ norĩ hã, Cristuhu wasu'u'wẽ te te oto ãwaihu'u
za'ra zé wasu'u**

⁷ Cristu hã sitẽme te te 're ãaiwaibui wa'aba mono ne, te za aihãiba zô asisõ 're atob'uzu za'ra wa'aba mo, 're asisawi pese za'ra

wa'aba mono sina. Taha zarina, 'Re ìhâimana u'âsi mono âma 're dawata u'âsi za'ra mono da, te za âne asima 're ì'manharĩ wê u'âsi za'ra wa'aba mo. ⁸ Cristu hã ma tô we ti'ai u datême mo, zudezu norĩ hã te te 're apawapto mono da, durêihã zudezu norĩ hi'rata ma, dama ìpire za'ra norĩ ma, 'Re ìhâimana u'âsi mono te te tâma 're ìropisutu za'ra mono zêb zarina, te te dama âma 're a'uwaimrami mono da, duré uburé 'Re ìhâimana u'âsi mono te te dama âma 're ì'a'uwaimrami mono zém na, tô sena na da te âma 're waihu'u pese za'ra mono da. ⁹ Duré zudezu'ô norĩ hã 'Re ìhâimana u'âsi mono, da'âma 're ìpê'ézé mono zé hã te te oto sina 're waihu'u za'ra mono wa, âma 're wata za'ra mono da, ma tô we Cristu hã zudezu norĩ u satô, 'Re ìhâimana u'âsi mono hã. Durêihã âne rob'ui'ére na ìwasu'u hã:

“Wa hã zudezu'ô norĩ siré 're ìhâimana mono ré, wa za ìsiré za'ra, ai'âma 're ìwata u'âsi.

Ìnho're na zama, wa za duré ai'âma 're ìwata u'âsi.”

¹⁰ Duré rob'ui'ére amo na ìwasu'u hã, âne:

“A norĩ wa'wa hã zudezu'ô na 're aihâimana za'ra wa'aba mono norĩ, ma'âpé simisutu asiré atoi uptabi na, âma 're aihâimana za'ra wa'aba mono, 'Re ìhâimana u'âsi mono nhib'a'uwê norĩ me.”

¹¹ Duré rob'ui'ére amo na ìwasu'u hã, âne:

“Zudezu'ô na 're aihâimana za'ra wa'aba mono norĩ, ma'âpé Wanhib'apito âma si 're aiwata u'âsi za'ra wa'aba mono, uburé aipoto mono bâ 're aihâimana za'ra wa'aba mono norĩ hã.”

¹² Iza'iza hã ma tô duré âne na âma rob'ui'ére siro:

“Niwapsi te za Zéséhé nhihudu hã we datême wi, apito Dawihi mama nhihudu hã.

Wei wisi wapsi, te za 'Re ìhâimana u'âsi mono hã tâma pisutu, zudezu'ô norĩ nhib'apito, 're hâimana mono da oto, daro mono bâ.

Tawamhã ta norĩ hã te za te te siwi 're umnhasi, marĩ ìwê hã te te tâma 're ìpisutu za'ra mono zêb zarina, za te te tâma âma 're ì'uwaimrami za'ra mono zém na hã.”

Âne durêihã Iza'iza hã te te âma ìrob'ui'érezé hã, 'Re ìhâimana u'âsi mono nhimiropisutuzém na. ã hã, 'Re ìhâimana u'âsi mono te te dama ìropisutuzém na, ma tô oto dama âma uwaimra.

¹³ 'Re ìhâimana u'âsi mono hã waihu'u pese wa, te za te te 're wa'apawapto u'âsi, marĩ ìwê hã te te wama 're ìpisutu za'ra mono zêb zarina, za te te wama âma 're ì'a'uwaimrami mono zêb zô, wa te wasiwi 're umnhasi za'ra mono sina, sô 're wanhimipari u'âsi za'ra mono da. Taha wa, wa ai'âma tâma 're ìmreme u'âsi za'ra wa'wa, atoi uptabi na 're aihâimana u'âsi za'ra wa'aba mono da,

duré rowē si te te aima 're pisutu za'ra wa'aba mono da, asina 're umnhasi za'ra wa'aba mono wa. Īpē'ēzani nhimipawaptobzéb zarina, marĩ ĩwē uptabi hã 'Re ĩhâimana u'âsi mono, za te te aima 're ĩsômri za'ra wa'aba mono zéb zô, asiwi 're umnhasi za'ra wa'aba mono sina, sô 're asimipari za'ra wa'aba mono zém na, 'râwi asima âma 're sa'êtē za'ra wa'aba mono da, wa tô te ĩsima 're aiwē za'ra wa'wa.

Paru hã, 'Re ĩhâimana u'âsi mono nhimipawaptobzém na te te 're ĩda'apawapto mono zé wasu'u

14 Īsisânawã norĩ, wa hã wa tô ai'âma waihu'u pese za'ra wa'wa, asimizawi pese sina oto 're anomro wē wa'aba mono zém na hã. Duré aima waihu'u pese za'ra wa'aba di oto, 're aihâimana wē za'ra wa'aba mono zéb da hã. Âne hã wa tô duré ai'âma waihu'u pese za'ra wa'wa, Wanhib'apito nhimiroti na oto asima 're ĩroti waihu'u pese za'ra wa'aba mono zém na zama. 15-16 Tane nherē, âhãna ĩnhimi'ui'ére na, wa tô sô'awi aima rowasu'u za'ra wa'wa, ĩsina ĩpahi âna, rowasu'u ahâ na te âma aipo're pu'u za'ra wa'aba da. Te aiwi udâ waihu'u za'ra wa'aba âna, wa tô ĩnhimi'ui'ére na hã aima rowasu'u pese za'ra wa'wa, 'Re ĩhâimana u'âsi mono hã sôprum na te te ĩpisutu wa, Cristu Zezusihi ma si te oto 're romhuri mono da, zudezu'ô norĩ hã te tãma 're apawapto mono da. Sasedoti norĩ hã 'Re ĩhâimana u'âsi mono ma, te te da'âma 're ĩromhuri za'ra mono ne, wa duré wa hã zudezu'ô norĩ âma te 're romhuri u'âsi, 'Re ĩhâimana u'âsi mono ma, Zezusihi wasu'uwē na te 're pawapto za'ra mono wa, te te 're ĩsaze za'ra mono zéb zarina, 'Re ĩhâimana u'âsi mono te te 're wēsâmri za'ra mono da. 'Re ĩhâimana u'âsi mono pē'ēzani nhimipisutuzéb zarina, ta norĩ hã ĩsib'a'uwē oto 're nomro mono wa, 'Re ĩhâimana u'âsi mono te te 're ĩwēsâmri za'ra mono zéb da hã, wa âne na hã te tãma 're romhuri u'âsi. 17 Cristu Zezusihi âma si oto 're ĩhâimana mono wa, wa 're ĩsi'uze, 'Re ĩhâimana u'âsi mono ma si, te 're ĩromhuri mono zém na hã oto. 18 Te 're ĩrowasu'u wē mono zéb zarina, duré te 're ĩromhuri wē mono zéb zarina ma tô zudezu'ô norĩ hã te te 're wapari pese za'ra, 'Re ĩhâimana u'âsi mono hã. E tawamhã ĩsi'uihã na ĩwaihu'u pese na te 're ĩ'ab'manharĩ wē mono na, wa za dama ĩsina 're ĩwata. Mare di. Âne hã ĩ'uwai'baba ô di. Cristuhu nhimipawaptobzéb zarina si, wa tô te tãma 're romhuri u'âsi za'ra, ĩwasu'uwē na hã. 19 'Re ĩhâimana u'âsi mono pē'ēzani hã tiwaihu'u pese na te te 're ĩpawapto mono zém na si, wa tô marĩ dama ĩ'manharĩ waihu'u'ô hã te dama 're ab'manharĩ, zudezu'ô norĩ hã tô sena te te 're saze za'ra mono da, ta norĩ hã. Zeruzarē hawi, Iririza u 're ĩmorĩ ré, wa tô daza'rui mono bâ te dama 're rowasu'u, Cristuhu wasu'uwē na hã. 20 Wa hã wa tô âne hã te ĩsima 're rosa'rata u'âsi, Cristuhu

wasu'uwẽ hã zahadu dapo're na da te 're ïwapari za'ra mono õ norĩ u si, 're ïmorĩ da, daza'rui mono bâ ïwasu'uwẽ na te ãma 're da'apo're pu'u mono da. Wanhib'apito wasu'uwẽ na danhimi'u'ëi 'rata u 're ïzasi tõ mono da, wa tõi ãne na te ïsima 're rosa'rata u'âsi. ²¹ Duréihã Iza'iza hã ma tõi ãne na Cristuhu ãma rob'ui'ére:

“Ni'wam norĩ ma, ïwasu'uwẽ hã da te tãma 're ïwaihu'u za'ra mono õ norĩ hã te za oto ta norĩ hã 'rãwi ãma 're siwaihu'u za'ra, ïwasu'uwẽ hã da te oto tãma 're wasu'u za'ra mono wa.

Te te 're wapari za'ra mono ãna, aré 're ïhãimana za'ra mono norĩ hã te za oto 'rãwi si'ãma te te 're waihu'u pese za'ra, 're ïhãimana wẽ za'ra mono zém na hã.”

**Paru hã, timreme te te sisõwa ïsõmrizé wasu'u,
Roma u morĩ da**

²²⁻²⁴ Wa hã wahub ahã na, wa tõi te ïsima 're rosa'rata u'âsi, te ïsima 're ïrowẽ mono zéb uwaibaba, atême ïmorĩ za'ra wa'aba da, te asabu za'ra wa'aba da. Tane nherẽ, zahadu ãmemhã ïma romhuri ahã di. Taha wa, nimahã na hã ãma atême ïwatobro waihu'u aba õ di. Tane nherẽ, ãhãna hã ïnhimiromhuri hã ãmemhã te oto 'rãsutu wamhã, atême ãma ïmorĩ aba da si, wa tõi ïsima waihu'u. Taha wa, wa tõi ïsima pisutu pese, Esipãnha na romnhisi u ïmorĩ ré, te asabu za'ra wa'aba da. ãne wa tõi duré ïsima rosa'rata, atême ãma ïwisi za'ra wa'aba wamhã, niha båtã na a'ã ai'rata ïnhamra za'ra wa'aba da, ïma ïrowẽ zarina, duré marĩ na asiwi ïpawaptob za'ra wa'aba da, Esipãnha u ïmorizéb da hã. Taha parip si, wa za oto aihawi ïmorĩ 'wa. ²⁵ Tane nherẽ, wa za a'ã Zeruzarẽ u si mo, ã awa'awi hã, tame 'Re ïhãimana u'âsi mono nhib'a'uwẽ 're ïsi'ubumroi mono norĩ hã te duré pawaptob za'ra da a'ã. ²⁶ Masédoniza na danhipti'a nho'õmo nhisi ãma, duré Ataza na danhipti'a nho'õmo nhisi ãma, zudezu'õ na ïsazei'wa na oto 're ïhãimana za'ra mono norĩ hã ma tõi sima wẽ za'ra, rob'ui'prazé hã te te siwi ubumro da, Zeruzarẽ ãma ïsazei'wa norĩ te te siwi ãma pawaptob za'ra da, simarĩ ãna 're ïhãimana za'ra mono norĩ hã, zudezu norĩ hã. Ta norĩ nhoprub za'ra zé hã, ïsi'uihã na te tãma ãri za'ra da Zeruzarẽ u, taha da, wa za a'ã tamomop si mo. ²⁷ Ta norĩ hã zudezu'õ na ïsazei'wa norĩ hã si'uihã na ma tõi sima pisutu za'ra, te te siwi ãma ïpawaptob za'ra zéb da hã, zudezu norĩ hã. ãne hã tõi ï'uiwaibaba ma tõi siwi ãma pawaptob za'ra. E marĩ wa. Duréihã zudezu norĩ ma, ma tõi 'Re ïhãimana u'âsi mono hã tiwasu'uwẽ na tãma siwaihu'u na'rata za'ra, tipẽẽ na robzei u'âsi ãma 're nomro mono da. Taha na ma tõi zudezu'õ norĩ hã te te siwi ãma 're pawaptob za'ra ïwasu'uwẽ na, aiwapsi oto õhõ ãma si 're hãimana za'ra mono da. ãne wa'rãmi, te

za tô zudezu'ô norĩ hã tinhimaĩ na te te siwi 're pawaptob za'ra, zudezu norĩ hã, tô ĩsarina si. **28** Tawamhã âme ĩnhimiromhuri te 'rãsutu parimhã, rob'uiprazé, da te dasiwi ĩ'ubumro hã ubuni na ĩsazei'wa norĩ ma, te âwisi wê parip si, wa za oto mo, Esipãnha u ĩmorĩ da hã. Tawapsi, wa za aiwa'wai baba ĩmorĩ aba ré, asabu za'ra wa'wa oto. **29** Tawamhã, atême ĩwisi za'ra wa'aba wamhã, Cristuhu nhoprubzém na, sa'ětê uptabi na te za aihĩni wama âma tirowê za'ra.

30 ĩsisãnawã norĩ, wa za oto aiwi rowaptêrê za'ra wa'wa ĩsi'ãma, 'Re ĩhâimana u'âsi mono ma, asiptete sina ĩ'ãma 're aimreme zusi aba mono zéb da hã. Wanhib'apito Zezu Cristuhu zazei'wa, wasiré oto 're wahâimana za'ra mono wa, duré 'Re ĩhâimana u'âsi mono pê'êzani nhimipawaptobzéb zarina, oto 're wasisawi pese uptabi za'ra mono wa, wa âne na aiwi rowaptêrê za'ra wa'wa. **31** E marĩ da. Zudeza na danhipti'a nho'ômo nhisi âma ĩsazei'ô'wa norĩ 're ĩhâimana za'ra mono norĩ hã, niha te te ĩma rob'manharĩ za'ra tã da, te za ĩ'ãma tiwi ĩrowaptêrê u'âsi za'ra wa'aba mo. Duré Zeruzarê âma 'Re ĩhâimana u'âsi mono nhib'a'uwê 're ĩhâimana za'ra mono norĩ hã, ta norĩ hã zudezu na ĩwamri za'ra wê te, zudezu'ô norĩ nhoprubzê hã za te âma ĩ'ârĩ hã te te siwi wê'ô za'ra tã da, te za duré ta norĩ âma zama âma aimreme zusi u'âsi 'wa. **32** ĩtoi uptabi na âma atême ĩwisi za'ra wa'aba da, te za ĩ'ãma aimreme zusi u'âsi 'wa. 'Re ĩhâimana u'âsi mono, ĩmorízé hã te te ĩma pisutu wapsi, wa za tô âma atême ĩwisi 'wa. Tawapsi ĩma rowê uptabi di za, wasiré ĩsazei'wa norĩ hã 'rãwi wasisabu za'ra wê te. Te âma wazere wamhã, wa za a'â ai'rata ĩwa'utu za'ra wa'wa. **33** 'Re ĩhâimana u'âsi mono hã wama rowê nhomri'wa hã 'rãwi asiré 're hâimana u'âsi za'ra wa'aba mono da, wa tô te ĩsima 're aiwê u'âsi za'ra wa'wa. Tane tô.

Paru, tisiwadi norĩ te te ĩ'azawizé wasu'u

16 ¹Âne, wa za aima wasu'u za'ra wa'wa, wahidiba Pebi na ĩsisi hã. Ta hã simizawi pese di. Sêtireza na 'ri nho'ômo nhisi âma, te ĩsazei'wa norĩ hã te te 're apawaptob u'âsi. ² Da'ahã na ma tô te te 're da'apawapto pese. ĩzama te duré te te 're ĩpawapto. Taha wa, ma'ãpé asiwi âri wê wa'aba za, wasiré Wanhib'apito zazei'wai wa, 'Re ĩhâimana u'âsi mono nhib'a'uwê, 're ĩsiwaibui wê mono zém na. Marĩ zô tiwi rowaptã'ã wamhã, te za duré marĩ na asiwi ĩpawaptob za'ra wa'wa.

³ Ma'ãpé, duré ĩma sawi za'ra wa'aba, Prisira norĩ hã Atiraha me, te âma ĩsawi zahuré zéb zarina, rob'ui'ééré na. ⁴ Ta norĩ hã ĩsiré te te 're ĩromhuri zahuré mono, Cristu Zesusihi wasu'u na. Ta norĩ hã da te pãri da nherê, ma tô sisawi âna te te 're ĩpawaptob u'âsi zahuré,

pahi ãna. Taha wa, te te 're ĩpawaptob zahuré mono zém na, wa tó te 're uzei u'âsi zahuré. Tane nherẽ, ĩwétési te ãma 're uze zahuré mono ô di. Uburé zudezu'ô norĩ hã ĩsazei'wa norĩ hã te duré te te ãma 're uzei u'âsi za'ra, daro mono bâ siré 're ĩsi'rã'õtô mono norĩ hã. **5** Ma'ãpé, duré uburé ĩma sawi za'ra wa'aba, Prisira norĩ nhorôwa u ĩsazei'wa norĩ, siré 're ĩsi'rã'õtô mono norĩ hã, rowahutu u.

Duré asiwi ĩma sawi za'ra wa'aba, ĩsiwadi ĩma ĩsawi pe hã, Epenetu na ĩsisi hã. Ta hã ma tó saze na'rata Cristu hã, Azi'a na danhipti'a nho'ômo nhisi ãma. **6** Duré Mariza hã asiwi ĩma sawi wa'aba. Ta hã te te aima 're romhuri pese za'ra wa'wa, simi'ëi uptabi na. **7** Duré asiwi ĩma sawi zahuré wa'aba, Ādoronitu norĩ hã, Zuni'asihi me. Ta norĩ hã ĩsiré zudezu norĩ, ma tó ĩsiré tihâimana zahuré, dazazéb 'remhã. Cristuhu zadawa wasu'u'wa norĩ siré te te 're romhuri zahuré mono wa, tãma waihu'u pese za'ra di, ĩsiré romhuri'wa norĩ ma hã. Ta norĩ hã ma tó ĩwana saze na'rata zahuré, Cristu hã.

8 Ma'ãpé duré asiwi ĩma sawi wa'aba, ĩsiwadi uptabi hã, Āprizatu na ĩsisi hã. Ta hã te Cristu ãma si 're hâimana. **9** Duré Ubanuhu zama asiwi ĩma sawi wa'aba, wasiré romhuri'wa hã Cristuhu ma. Esitati hã ĩsiwadi zama te za duré asiwi ĩma ĩsawi wa'wa, ĩma ĩsawi pe hã. **10** Ma'ãpé duré asiwi ĩma sawi wa'aba, Aperi hã. Ta hã marĩ na da te 're pibui ahã mono nherẽ, niwa Cristuhu wi sipi'rai waihu'u ô di. Duré asiwi ĩma sawi za'ra wa'aba, Arisitoburuhu nhorôwa 're, 're ĩhâimana za'ra mono norĩ hã. **11** Duré, Erodĩ'ã hã asiwi ĩma sawi wa'aba, ĩsiré zudezu hã. Duré wasiré ĩsazei'wa norĩ hã Nasizuhu nhorôwa 're, 're ĩhâimana za'ra mono norĩ hã asiwi ĩma sawi za'ra wa'aba duré.

12 Tiripena norĩ hã te za duré asiwi ĩma ĩsawi zahuré wa'wa, Tiripozaha me. Ta norĩ hã te Wanhib'apito ma, te te 're romhuri zahuré. Duré wahidiba hã ĩma ĩsawi pe hã asiwi ĩma sawi wa'aba, Pezidi na ĩsisi hã. Ta hã simi'ë na te duré Wanhib'apito ma, te te 're romhuri pese, wa'a ãna. **13** Ma'ãpé duré asiwi ĩma sawi wa'aba, Rupu hã. Ta hã te duré te te 're romhuri pese, Wanhib'apito ma. ĩna zama te za duré asiwi ĩma ĩsawi wa'wa. Ta hã ĩna ô nherẽ, ma tó te te 're ĩpawapto pese, dana hã ti'ra te te 're ĩpawapto pese za'ra mono ne. **14** Asĩtitu norĩ hã te za duré asiwi ĩma ĩsawi za'ra wa'wa, Predotihĩ me, duré Emesi, duré Patorobasi, duré Emasi hã. Duré uburé ĩtême 're ĩsi'rã'õtô mono norĩ hã asiwi ĩma sawi za'ra wa'aba, ĩsazei'wa norĩ hã. **15** Ma'ãpé duré asiwi ĩma sawi za'ra wa'aba, Pirorodu norĩ hã, Zurizaha me, duré Nere'u norĩ hã ĩhidiba me, duré Orĩpasihĩ zama. Duré ta norĩ siré 're ĩsi'rã'õtô mono norĩ hã te za asiwi ĩma ĩsawi za'ra wa'wa, 'Re ĩhâimana u'âsi mono nhĩb'a'uwẽ norĩ hã.

16 Uburé asiré ãsazei'wa 're aihâimana za'ra wa'aba mono wa, te za asõ'utu na asisawi sina 're asitob'rata hârâ za'ra wa'aba mo.

Ãmemhã uburé Cristuhu zazei'wa norĩ hã, ã'upsãtã mono bã sitẽme 're ãsi'rã'õtõ mono norĩ hã te duré ãma asawi za'ra wa'wa.

Paru hã, roti na za oto te te ãrãsutuzém na rowasu'u

17 ãsisãnawã norĩ, wa za oto ãnhimiroti na aima 'rãsutu za'ra wa'wa. Ni'wam norĩ hã te aimawi tinhimirosa'rata na te te ãma 're 'wa'rutu za'ra, ãsazei'wa norĩ wi. Te te tiwi ãma 're 'wa'rutu za'ra mono wa, te ãsazei'wa norĩ hã ãmreme hã te te 're wapari za'ra. Taha zarina, te duré sima ãma 're siwanhizari. Ta norĩ nhimirob'manharĩ wasété zéb zarina, te ãsazei'wa norĩ hã 're si'marõpãrĩ za'ra, tiwasété na. Zezusihi nhimiroti na, da te aima 're ãroti za'ra wa'aba mono zéb upana, te ta norĩ hã te te dama 're roti za'ra, aimawi na si. Taha wa, te za tiwi 're asisawi pese za'ra wa'aba mo, ta norĩ siré 're aihâimana za'ra wa'aba mono tõ da. 18 Ta norĩ hã Wanhib'apito Cristuhu ma, te te 're romhuri za'ra mono õ di. Te te sima 're ãwẽ za'ra mono zéb zarina si, te marĩ ãwasété zõ si 're sõpré. Ta norĩ hã sadawa nhipese nherẽ, te ãsimiroti hã sena newa da te 're wapari ze za'ra, danhimirosa'rata nhib'uware na 're ãdahâimana za'ra mono norĩ hã. Mreme wapari ze wa, duré asa ãmreme hã da te dasima 're wẽ za'ra mono da, te taré timreme amo na te te dama 're rowasu'u za'ra, da'ãma 're wata za'ra mono sina. Tawamhã taha zarina, te za awa'awi ãmreme na da te 're saze za'ra. 19 Tanei õ di, a norĩ wa'wa hã. Zezusihi wasu'uwẽ 're ãwapari pese za'ra wa'aba mono zém na, ma tõ daro mono bã ãsazei'wa norĩ hã aiwasu'u za'ra wa'wa hã te te 're wapari ze za'ra. Taha wa, ma tõ ãma asina ãma 're ãrowẽ zani za'ra wa'aba mo.

Ãne wa, wa za duré aima roti za'ra wa'wa. Asimiza'rese sina, te za marĩ ãwẽ hã 're ãmanharĩ za'ra wa'aba mono zéb da si, asina 're asõpré wa'aba mo. Marĩ ãwasédé hã 're 'manharĩ za'ra wa'aba mono da, asima 're 'madãã za'ra wa'aba mono õ di za. Te za tiwi 're asiptete za'ra wa'aba mo, aiwasété wi hã. 20 Rowẽ na 're ãdanomro mono zé hã, 'Re ãhâimana u'ãsi mono hawimhã. Ta hã te za rowẽzé hã te te aima 're anhomri 'wa. Wahi hã dapara na da te 're ãwati'i za'ra mono ne, te za Satanasihi nhiptetezé hã romhutu na te te tiwi 're a'uprosi 'Re ãhâimana u'ãsi mono hã, tõ õ hã Satanasi hã asahãpã 're hâimana za'ra wa'aba mono da oto.

Wanhib'apito Zezusihi wi, wa wa te tiwi 're rowaptẽrẽ u'ãsi, tinhimipawaptobzé hã te te aima 're sõmri za'ra wa'aba mono da, ai'rata 're hâimana u'ãsi za'ra wa'aba mono da.

21 Timotiu hã, ãme ãsiré romhuri'wa hã te duré ãma asawi za'ra wa'wa. Duré ãsiré zudezu norĩ te duré ãma asawi za'ra wa'wa, Rusizu norĩ hã, Zasãhã me, duré Sosipaturu hã.

22 Wa hã, Tési'u hã wa duré ãma asawi za'ra wa'wa, Wanhib'apito ãma wasiré 're wahâimana za'ra mono wa. Wa hã Paru te te ĩma ĩawaihu'u mono zéb zarina, wa tô rob'ui'ére, ã ĩbaihã na hã.

23-24 Wa hã Paru, ãne wa za duré ãma aima waihu'u za'ra wa'wa. Da'izu hã tinhorõwa u te te ĩ'mazébré hã, te duré ãma asawi za'ra wa'wa. Taha nhorõwa ãma, te wasiré ĩsazei'wa norĩ hã 're si'rá'õtõ u'âsi. Duré Erasitu hã ãme 'ri nho'õmo ãma danhib'apito ma, rob'ui'prazé za'rata na romhuri'wa hã, te ãma asawi za'ra wa'wa. Wasisãnawã Tu'atu na ĩsisi zama, te duré ãma asawi za'ra wa'wa.

Paru hã, 'Re ĩhâimana u'âsi mono ãma ĩwatazé wasu'u

25-26 'Re ĩhâimana u'âsi mono ãma si, wa za 're wawata u'âsi za'ra. Taha ma si, tãma waihu'u pese di, te te 're ĩwa'apawapto mono zéb da hã, Zezu Cristuhu wasu'uwẽ hã wa te 're ĩsaze za'ra mono zé hã wa te 're rẽme za'ra mono ãna, wanhiptete u'âsi ãma 're ĩwanomro mono zéb da hã. Taha wasu'uwẽ hã wa tô te dama 're wasu'u u'âsi. Duréihã ĩwasu'uwẽ hã, 'Re ĩhâimana u'âsi mono te te dama 're awaihu'u mono õ di. ĩwasu'uwẽ hã dama sa'rese ãna, ma tô aré 're danomro. Tane nherẽ, ma tô 'Re ĩhâimana u'âsi mono hã ĩwasu'uwẽ hã dama waihu'u oto, ĩsadawa wasu'u 'rata 'wa norĩ nhimi'ui'ére hawimhã. Taha wa, te oto ĩsimiwada'urizéb zarina si, da te 're waihu'u za'ra daro mono bâ, da te ãma 're ĩsazei pese za'ra mono zéb da hã, duré da te 're ĩwapari pese za'ra mono zéb da hã oto.

27 'Re ĩhâimana u'âsi mono hã misire te 're hâimana. Ôhõ si siwaprosi uburé marĩ hã tãma waihu'u pese di, taha ma si. Taha wa, taha ãma si, wa za 're wawata u'âsi za'ra, Zezu Cristu te te wama 're ĩ'ab'manharĩ wẽ mono zéb zarina si. Tane tô.